

# *MISÙÙKÀ YÌDÌ MU*

## *BÙLOKÒ MPINDYEWU AYI*



Twasakidilaayi. Twinyaikaayi mitu yetu katanci kakese.

Taatù wa mu Dyulu, tudi tuKusakidila, leelu ewu, bwa dyèsè edi dya kudisangisha pamwe musangu ewu cyakabidi, bamanye ne dìngà dituku twadyakudisangisha bwa musangu wetu wa ndekeelu, bu baa cifwaka, ne pashiishe netudisangishe Neebe mu ngiikadilu mutumbishiibwe, ne bapikula bônsò baa bikondo byônsò nebasangile kwôkò aku.

<sup>2</sup> Kaa, myoyi yetu yidi yituuta bikole, bwa . . . ne dizuka dikole, mindile bwa dîbà adi kulwadi! Pa nanku, bwôwà bwônsò budi bujimina kutudi. Katwena ne cintu nansha cimwe cya diciina to, cintu nansha cimwe cya kupetela bwôwà. Twêtù tudi batekemene ne disanka dyônsò mulayi udi Nzambi wa Cyendeleele mutwénzèle, ne tudi bamanye ne m'Bulelela. Ki bwa cinyi tudi ne mwoyi. Tudi ne mwoyi bwa cyôcì aci, bwa dîbà diine adi, bwa cikondo ciine aci, piikala cya cifwaka cishintuluke, nenku netuvwijiibwe bafwanangane Nende Yéyè, ne kakwakwikala kabidi masaama, nansha tunyinganyinga, nansha bya myoyi yisaama to. Kaa, byônsò nebiikale bijike pa dîbà adi. Nenku ne disanka mu myoyi, twêtù, mu diitabuuja ne bukitu, tudi batekemene Dituku adi ne disanka dyônsò.

<sup>3</sup> Ki bwa cinyi tudi badisangishe kaaba aka leelu ewu, Mukalenge, bwa kutonda bilema byetu ne kulomba luse. Ki bwa cinyi tudi batume mpala yetu ku cyoshelu eku mu dinda emu, bwalu tudi bamanye ne tudi baa cifwaka, ne kudi ntupakanyi yâbûngì munda mwetu, kabidi tudi bûle tente ne bilema. Kadi tudi tulwa bwa kutonda bilema byetu, ne pashiishe kutangila kudi Taatù wetu wa mu Dyulu ne myoyi myunzulula, bwa mabeneshá ne divwijuluja dya dikanda dyetu ne diitabuuja dyetu bipyabipya, biikàlà Ye mwa kutupa mu dîbà edi, bu mutudi badisangishe kaaba aka bilondeshile mulayi, “mu myaba ya mu Dyulu mu Kilisto Yesu.” Bwalu tudi tujikula twamba ne tukaadi buumuke ku lufu baye ku Mwoyi, ku mulayi Wende, ne tukaadi bambwibwe mu cyuyûyà cya mu Dyulu, basòmbe Nende mpindyewu. Swaku bwa Yéyé atulongeshekù mu dinda emu bintu bidiYe muswe bwa twêtù kumanya, ne atupe Dyâmpà dya Mwoyi, bwa twamona mwa kudiishiibwa bwa matuku acilwalwa adi kumpala kwetu. Enzaku nanku, Mukalenge. Eci ki disambila dyetu ditudi tulomba mu Dînà dya Yesu Kilisto. Amen.

Nudi mwa kusòmbaayi.

<sup>4</sup> Mwoyi wenu awu mu dinda emu, muntu ne muntu. Nenku mbîmpè be bwa kwikalà badisangishe neenu cyakabidi kaaba aka mu dinda emu, mu cyuyûyà eci cya mu Dyulu cya dikuukwila.

<sup>5</sup> Ndi mulwe ndambu pashiishe, tuvwa ne...ndambu wa mabiikila, a mabi be kwénjì anu ndambu wa tusunsa; mwânà wa balume mulaadika pààpa, ùpunga ne lufu. Ne anu mudibi bulelela ne ndi mwimane kaaba aka emu, Mukalenge kulenga mubidi wende ne kumutuma mu njila. Pa nanku...

<sup>6</sup> Nenku mwâ—mwâ—mwânà wa balume mwimane kaaba aka, mwânà wa mwaneetu wa balume wa taatu mukwabo. Bavva beena Katolike baa menemene, kwônsò eku, kadi mbaye mu misà mu dinda emu kadi cintu kampanda kubambilà bwa kulwabo apa. Pa nanku bôbò...Kudi dishilangana. Pa nanku bakaadi—bakaadi mpindyewu balwa kumbelu, ne biikale badilongolola ku dibatijiibwa dya mu mâyì. Pa nanku badi—badi...bintu anu bya dikema's bidi Mukalenge wetu wenza dîbà dyônsò. Yéyè udi anu wenza maalu ku musangu ne ku musangu. Mbalwe bwa kubwela, kadi kî mbapete mushindu wa kubwela to. Bavva bamba ne kakuvwa anu mushindu wa kubwelabo to.

<sup>7</sup> Mêmè ne: "Ee, panwikala ne dijinga dya kuyikila naanyi," ki mêmè ne, "ee, nwâvwilaayi anu kumbelu's, nenku netuyiikile maalu ônsò awu, kwôkò aku."

<sup>8</sup> Ki mêmè kudyambidila, mu njila mutangile ku New York mpindyewu, ku diine disangisha dilwalwa edi, ne mbifwanyine kwikalà anu bilenga menemene...Ndi mumanye ne ndi mufwanyine kwikalà mupete cikondo cya citaleela bu mêmè mwa kunwelaku disù ne—ne kuteemeshilaku kapya kaanyi ku kapya kanudi nwêñù bônsò bapete aku, ki twêtù kwimana bwa dituku dimwe, mu dinda emu. Nènku tudi babwela makeelela awu, makeelela mushaale wawa, mu nkankala amu.

<sup>9</sup> Ne pashiishe netwikale ne cya kuumuka. Mvwa ne cya kuumuka, mu mappingaja emu, kadi ndi ngeela meeji ne nênye... Nenku tudi twasa lwendo mu dinda, pa bwebwebwe, pa bwebwebwe menemene paa...Tudi bafwanyine kupeta ndambu wa nêjè mu njila, ne bikwabo, kuumukila apa ne ku New York. Bikengela tupicile mu Virginie, biikale tupicila mu mikuna, tupicila kabidi mu ma-Allegheny, ne anu menemene mu citupa cya kwinshi kwa—kwa Adirondack kwaka.

<sup>10</sup> Pa nanku tudi tubangila ku, nyewu ngäpù mwoyi, cidi ncipalu kuntwaku, cipyacipyà. Mbuupule cipalu cya kale cya Saint Nicholas, mûndì ngumvwa bamba. Mbiibake cipyacipyà eci. Nenku ku dyanyi dimanya, netupete amwe a ku malolo a kumpala a kacya...bààbanga kucifucisha. Nenku tudi ne kusakidila bwa cyôci aci, bwa beena Mpenta baa mu New York udi mutambe bunene ewu. Ne ndi ncinka ne tudi ne ekeleeziya

yàbûngì yìkalà mwa kukwacishangana mu mudimu, nenku tudi batekemene cikondo cya dicyonkomoka.

<sup>11</sup> Nenku netwalukile, bu Mukalenge mwa kwanyisha, munkaci mwa lumingu lwalonda elu. Nenku—nenku cyôcì diswa dya Nzambi, mona's, tudi batekemene ne netwikalè mwa kwimana mu dyalumingu, dya lumingu lukwabo lwalwa, bwa—bwa disangisha dya mu dyalumingu mu dinda.

<sup>12</sup> Ne pashiishe ndi musake cyakabidi mpaasata wetu ku luseke, mûntù ngénzenza misangu yônsò amu, nudi numona's, nenku—nenku mvwa ndyambidila ne pàmwäpa bu mêmè mwa kwalukila, biine abi nansha nciyi mumulombe to. Ne pashiishe bu mudibi ne kudi kasumbu kîmpè kaaba aka, ne bantu bândi mmona baa pambelu paa cimenga, biikale apa; ngâdyâmbididi ne pàmwäpa, dilolo edi, mpaasata yêyè kayi ne cintu kampanda cya pabwaci to, mbifwanyine kwikala bîmpè bu twêtù mwa kwenzaku kaadisangisha kakese dilolo edi, anu kîpì menemene, nenku, ee, pàmwäpa kusambidilaku babeedi. [Disangisha didi dyàmba ne: "Amen."—Muf.] Twasakidilaayi.

<sup>13</sup> Tudi tutekemena ne netusambidile babeedi dilolo edi, kwakula pa dyondopa dya kudi Nzambi ne—ne kusambidila babeedi. Kubanga kumpala kwa dîbà bwa twamona mwa kupatuka kumpala kwa dîbà. Ne bu mpaasata mwa kuswa, cìdì... Nutu pa ciibidilu nubanga pa dîbà mwandamutekete ne tusunsa makumi asatu. Ncya bushuwa anyi? Udi wamba bishi bu twêtù mwa kubanga pa dîbà mwandamutekete dilolo edi, pa dîbà mwandamutekete? [Mwaneetu Neville udi wamba ne: "Amen."—Muf.] Nenku mbange pa dîbà mwandamutekete ne tusunsa makumi asatu, nenku aci necimpeeshe mushindu wa kupatuka anyi pa dîbà mwandamukulu anyi mwandamukulu ne tusunsa makumi asatu, nenku aci cidi cipa bantu dîbà dya—dya kuyabo, piikalabi ne aci cidi—cidi ci—cikumbane. Bantu bônsò bâfù mu tuseku pângâmbì—pângâmbì ne dîbà mwandamukulu, anyi dîbà mwandamukulu ne tusunsa makumi asatu. Ndi—ndi—ndi ntekemena ne nêmpatukè pa dîbà adi. Kusambidila kwa babeedi, nutu bamanye's, katütù bamanye to.

<sup>14</sup> Pa nanku tudi bapicishe cikondo cya—cya dicyonkomoka kacya twanushiya mu muvù wa mabeji apoopoka mushaale ewu, ku ntwadijilu kwawu, ne Mukalenge mmutubeneshe mu bintu binene byàbûngì. Aci... Nenku dilolo edi, bu Nzambi mwa kwanyisha, ndi muswe kunulondela bwa dimmwenekela dya musangu mushaale dîndì mupete, dya kudi Nzambi, mu Colorado, kukaadi ndambu wa mbingu. Nenku ki cîndì mwele meeji bwa kunutwadila mpindyewu, pàmwäpa kusalulaku diitabuuja bwa mudimu mwîmpè wa dyondopa dilolo edi, bwa babeedi ne beena ntatu.

<sup>15</sup> Mpindyewu, mu dinda emu, bwa kubwela buludi mu diyiisha, ndi... Cintu kampanda ncintuute ku mwoyi kukaadi

ngondo mujima. Ne ncifwanyine kwikala, mpindyewu, ngeela meeji ne badi... Badi munkaci mwa dikwata eci pa mikaba anyi? Badi munkaci mwa dikwata eci pa mikaba anyi? Eyo. Mbîmpè. Bwa mmone mwa kumanya ne mmwaba kaayi, piikala mukaba upatuka uya kudi bakwabo. Ncyêna mwa kwamba ne cîngììkalà mwa kwamba mu dinda emu... Ncyêna mwa kwamba ne cidi—cidi—cidi... Ndi mumanye ne ncilelela, nwamonu's, citupa cya Mukenji neciikale cilelela. Kadi cintu, cîndì njinga kwenza aci, cidi ndukonko mu meeji aanyi. Ncimweke cilelela menemene. Kadi nansha nanku kacya anu ngâlukila, ne kacya mêmè... baacimbuulwila, ndi mupete bwôwà bucole mu mushindu wa mêmè mufwanyine kwamba cintu cya cyanaana kadi mufwanyine kushiya didifwikakajila dibi kudi bantu. Nenku cidi... Nenku ndi...

<sup>16</sup> Bîmvwà mufunde pa kabeji, pa cîmvwà njinga kwamba, ndi mubikose citupa, bwa ncilu kucivwija cipitepite bucole to. Bwalu, nudi numona's, muntu yéyè—yéyè... Ntu—ntu munange Mukalenge Nzambi, nenku, mushindu umwepele wûndì mumanye ne ntu muMunange, mbwa pândì mununange nwénù aba. Nwamonu anyi? Ki mushindu umwepele wûndì mêmè mumanye. Kadi paabi ncyêna—ncyêna muswe kwikala ne cintu cimbuulwila kadi pashiishe kubenga kunwambilaci to, piikalaci ne ncyâ dinwambila. Ne pashiishe ndi nciina ne bu mêmè mwa kunwambila cintu cipitepite bucole ndambu, nkwépì kwalwaci kutapa muntu kampanda ku mwoyi. Nenku, nudi bamanye, cidi... Bikengela anu wêwè kubânda pa cibumba cya ku cyambilu ne pashiishe kudyumvwa mulombodiibwe bwa kwamba ciwikala mwa kwamba aci. Kwajiki. Ne pashiishe mîngà misangu udi mufwanyine kwamba cintu kampanda, kadi muntu kampanda mufwanyine kupeta... mukwabo ngumvwîlù pa cyôcì aci, nenku yéyè mufwanyine kuya lubilu mutangile ku *elu luseke*; ne pashiishe muntu mufwanyine kwamba ne: "Kaa, eci *ncikampanda*," nwamonu's.

<sup>17</sup> Kadi ndi muswe numanye ne cîndì njinga kwamba cidi anu ndidicinkila cyanaana, ne mwaku *kudicinkila* udi uswa kwamba ne "kudyela mu bwalu kakuyi bukenji." Pa nanku ndi... Ncyêna—ncyêna ngamba ne eci ncilelela to, kadi cidi anu kaadyeji kakese kândì mufwanyine kunuleeja, bwa nwamona mwa kupima bujitu bwaku kadi kumona ne nudi nucyelela meeji kaayi. Ne pashiishe neciikale, mu bushuwa bwa bwalu, ne—neciikale cya mu Mifundu, bwalu ncyêna mufwanyine kuyiisha cintu nansha cimwe...

<sup>18</sup> Kadi ki dîbà adi ditukaadi anyi? Eci cikaadi cifiike pa dîbà edi, ne bintu ebi mbiswe kwamba cyôcì aci anyi? Ndi ndomba, ne byônsò bidi munda mwanyi, bwa ne kaciikadi cyôcì aci to. Nwamonu anyi? Ndi ndomba ne kaciikadi cya bushuwa to, bwa ne kaciikadi dîbà adi to. Nedilwe's, kadi cikaadi cifiike pa dîbà adi anyi? Nwamonu's, ki cîndì ndikonka. Mpindyewu, muntu

yônsò mmumvwe, muumvwe menemene ne, ncyêna mumanye anyi? Ndi anu... Dîbà ndyôdì edi anyi? Piikaladi ne ndyôdì, Nzambi ikaleku neetu luse. Kadi, piikalabi ne kî ndîbà adi to, diikale... nedilwe.

<sup>19</sup> Mpindyewu, patudi anu tupeta mushindu, tucidi ne njila munene wa diya kumpala kwetu, bu Mukalenge mwa kwanyisha. Ne mêmè bikengela nye dyamwamwa dya mbû, padi anu Noël upita, ku Mputu ne ku Asie; ku Mputu, nangananga. Ne pashiishe ngaalukile muneemu mu États-Unis, bwa ndambu wa masangisha, ne pashiishe ngaalukile mu Afrike wa ku Sud. Ndi mbanga mu matuku abidi a ngondo wa—wa citeema, mu Durban, nenku nya kuumukila ku matuku abidi a ngondo, ngeela meeji, too ne ku matuku dikumi nanku awu, ne pashiishe ndi ne matuku asatu bwa kuumuka mwômò amu kuya ku Johannesburg kadi kubangulula. Kadi ndi ngeela meeji ne nku ngondo mwinâyi, kutwabangila nku matunga a Scandinavie, mu Norvège ne mu Suède ne—ne mu Finlande, ne—ne mu Hollande ne mu Suisse ne mu Allemagne, ne—ne Mputu mujima mwamwa. Pa nanku nwikalaya mu disambila bwetu twêtù.

<sup>20</sup> Tudi ne ndambu wa masangisha muneemu, mu cikondo cya Noël mpindyewu, padi anu Noël ujika. Byôbì biine, tudi baswe kupicishila Noël muneemu, kwetu kumbelu. Bânà mbaswe kupingana kumbelu, mu Noël mujima amu. Nenku tudi—tudi banange Arizona, kadi nudi bamanye ci—cintu cidi citupangika, ne twêtù peetu citudi katuyi mwa kupwa mwoyi to, ng'ekeleeziya ewu ne nwénù aba. Nansha twêtù baye penyi, nansha benze cinyi, bidi anu... Bânà, mêmè, mukajaanyi ne bônsò. Kakwenaku mwaba nansha umwe bu ewu to. Neya bushuwa. Kakwenaku mwaba nansha umwe to.

<sup>21</sup> Nkaadi musabûke mbû yônsò mwandamatekete, ne nkaadi—nkaadi myayaaye myaba yônsò, kadi kakwenaku mwaba nansha umwe udi umweka bwanyi mêmè wa cijila bu mwaba ewu nansha. Apa ki pôpò. Anji shiyangana anu naapu musangu umwe cyanaana, pawikala muswe kumanya. Kudiku anu cintu kampanda bwa mwaba ewu. Nkaadi muysiheyiishe pa buloba bujima, pabwîpì ne bwônsò, kadi kacyapu, musangu nansha umwe, mwaba nansha umwe, ncitukù muumvwe Nyuma wa Nzambi, mwikale ne budishikaminyi ne bikwabo, bu mûndi ngumvwa pândì mwimane mwaba ewu mene to. Apa ki pôpò.

<sup>22</sup> “Nzambi, bìkkalèku...” Bu mudi dituku dîngààkatèèkà dibwe dya mu ditumba adi mwaba wawa adi, mêmè kwamba ne: “Mukalenge Nzambi, kwitabiku bwa adishinde to.”

Bantu bavwa bamba ne: “Mu ngondo ibidi eyi, neciikale cilongolwedi cya mashinyi.”

<sup>23</sup> Mêmè kwamba ne: “Kwitabiku bwa adishinde to, Mukalenge. Enza bwa ikale mwimane, ne bantu munda emu

biikale baKutumbisha paapingana Yesu." Ndi mutwishiibwe ne nebiikale mushindu awu.

<sup>24</sup> Mpindyewu tubuululaayi mu Bible mpindyewu, ne—ne biikale batekemene ne Mukalenge neatupe mabeneshia Ende. Nenku tudi baswe kubala ndambu wa Mifundu. Ndi ne ndambu wa Mifundu kaaba aka mifunda pa mabeji yîndi muswe kwikalaa nteela, ne bimwe bintu bifunda pa mabeji. Nenku ndi muswe kubala mu myaba isatu mu Bible, ne nêngänjì kunupeesheyi, dyambedi. Ndi muswe kubala mu Yuda 5 ne 6. Yuda udi Mukanda anu umwepele, nudi bamanye. Ne pashiishe ndi muswe kubala Peetelo Mwibidì nshapita mwi2, 4 ne 5. Pashiishe ndi muswe kubala Peetelo wa Kumpala, 3.18 too ne ku 20.

<sup>25</sup> Nenku cyena-bwalu cyanyi mu dinda emu, bu Mukalenge mwa kwanyisha, cidi ne: *Misùùkà Yìdì Mu Bùlokò Mpindyewu Ayi*. Uh-huh. *Misùùkà Yìdì Mu Bùlokò Mpindyewu Ayi*, mikangilamu, myediibwe mulawu bwa kashidi. Kashidi, kakuyiku mushindu nansha umwe wa yôyi kusungidiibwa to, nwamonu's, misuuka yidi myela mu buloko mpindyewu ayi.

<sup>26</sup> Mpindyewu twänjâàyaaku kubala mu Mukanda wa Yuda, dyambedi. Ngeela meeji ne ndi mwenze cimanyinu mwaba ewu pa mwaba wa kumpala awu, mu Yuda; ne pashiishe mu Peetelo Mwibidì, ne pashiishe—pashiishe mu Peetelo wa Kumpala. Mpindyewu, Yuda, ndi muswe kumubala yônsò mujima; kadi anu bwa kulaminyina dîbà, bwalu tukaadi dîbà dikumi ne tusunsa makumi asatu, nêmbangilè ku mvensa mwi5. Mpindyewu, Yuda uvwa mwanaabo, mwânà wa mamwëndè, wa Yesu Kilisto, bu mutudi twêtù bônsò bamanye. Nwamonu anyi? Ùvwa mwânà wa Yozefu.

*Bwa bwalu ebu ndi muswe kunuvulwija, nansha munukaadi nwénù bamane kumanya bwalu ebu musangu umwe, mushindu uvwabi ne Mukalenge, mumane kusungila cisamba mu kucipatula mu buloba bwa Ejipitu, pashiishe wakabutula aba bavva kabayi biitabuuje.*

<sup>27</sup> Wakabasungila, dyambedi, kubapatula mu Ejipitu, ki pashiishe uvwa ne cya kubabutula bwalu kabaakatungunuka ne mukenji wabo to, nwamonu's.

*Ne banjelo bavva kabayi balame ngiikadilu wabo wa ku cibangidilu, kadi bààkashiyà cisòmbedi cyabo bôbò abu, yéyè wakabalamina mu dishintuluka dya kashidi kadiy-...nkanu ya mîdimà ya mwinshi too ne ku cilumbulwidi cya dituku dinene.*

<sup>28</sup> Banjelo baa bwena bàvwàku musangu kampanda basòmbèlè mu Dyulu abu, kadi kabayi balame ngiikadilu wabo ne mushindu uvwabo basanganyiibwa awu, badishinde, ne biikale mpindyewu mu nkanu ya mîdimà ya Cyendeleele, nkanu ya mîdimà ya kashidi, babalamine mu mushindu ewu

too ne ku Cilumbulwidi cya Dituku dinene piikalabo mwa kulumbulwishiibwa pamwe ne bakwabo bônsò beena bupidya.

<sup>29</sup> Mpindyewu mu Peetelo Mwibidì, nshapita mwi2, kubangila ku mvensa mwi4, udi anu mukanda umwe anyi ibidi paanyima pa wòwò ewu, nwamonus.

*Bwalu piikalabi ne Nzambi kaakalaminyina banjelo baakenza mpekaatu abu to, kadi mubakupe mwinshi mu iferno, ne mubélè mu nkanu ya mîdimà, bwa kulamiibwabo too ne ku cilumbulwidi;*

*Ne kayi mulaminyine baa pa buloba baa kale, kadi musungile Noa, ne bantu mwandamukulu, mugiishi wa bwakane, utuma mvula pa buloba bwa bantu bavva kabayi baneemeka Nzambi;*

<sup>30</sup> Kayi mulaminyine Banjelo to; mubélè mu nkanu ya mîdimà, kadi kupiisha buloba bujima ku kabutu, kaa—kaa Noa.

<sup>31</sup> Mpindyewu mu Peetelo wa Kumpala, nshapita 1 ku... Peetelo wa Kumpala, nshapita mwi3, kubangila ku mvensa wa 18, tudi tubala kabidi. Mpindyewu, teeleejaayaaku ne ntéma mpindyewu.

*Bwalu Kilisto pende wakakenga musangu umwe bwa mpekaatu, mwakane bwa babi, bwa wamona mwa kutufikisha kudi Nzambi, mwikale mushipiibwe mu mubidi, kadi mwikale muvvijiibwe ne mwoyi ku Nyuma: ... mushipiibwe mu mubidi, kadi muvvijiibwe ne mwoyi ku Nyuma:*

*Ku yéyè aku nkawakayaye kabidi kayiisha nyuma ya mu buloko; wakaiiisha bantu aba mu buloko;*

*Bavva cikondo kampanda ne cishiku, musangu kampanda uwua mwoyi mule wa Nzambi mwindile mu matuku a Noa, pavva bwâtù bwikale bwibakiibwa, muvwa bantu bakesee, mmumwe ne, misuuka mwandamukulu yakasungidiibwa ku mâyì.*

*...cimfwanyi cimwecimwe eci cya dibatiiza didi ditúsungilà kabidi mpindyewu (kaciyi dyumusha dya bukooya bwa mubidi to, kadi dyandamuna dya kondò kaa mwoyi kîmpè kudi Nzambi,) ku dibiika dya ku lufu dya Yesu Kilisto:*

*Udi mubwele mu dyulu, ne usanganyiibwa ku diboko dyabalume dya Nzambi; banjelo ne makookeshi ne makole biikale bivwijiibwe mu bukookeshi bwende.*

Tusambilaayi cyakabidi.

<sup>32</sup> Mpindyewu, Taatù wa mu Dyulu, mu—mulongolongo wa Mifundu kaaba aka mushindu ewu, bantemu basatu, myaba isatu mu Mifundu yifila bujaadiki. Ne Wêwè udi mwambe mu Dîyì Dyebe, ne: “Mukana mwa bantemu babidi anyi basatu, dîyì

dyônsò dijaadikiibwe.” Mpindyewu nyewu nkulomba Wêwè, Éyì Nzambi, bwa Wêwè kulwa kudi bantu ne kuumvwija Dîyi edi, Mukenji ewu, mu bukénkè mudibi ne cya kwikala, bwa mulume yônsò, mukaji yônsò, mwânà wa balume yônsò, anyi wa bakaji yônsò, amone mwa kuumvwila mu dikumbanyina dyûdì Wêwè mumuteekele bwa kuumvwilaye adi, ne mwikale mpindyewu mumanye ne bantemu basatu aba mbadi bafila bujaadiki bwa Bulelela.

<sup>33</sup> Nenku ndi ndomba bwa Wêwè kutuma Nyuma Mwîmpè pambidi peetu mpindyewu. Nenku twêtù netutangije mêsù etu kudi Ewu Udi Mfumu wetu, munkaci mwetu mu dinda emu, Mukalenge Yesu Kilisto; kutudi babândîshiibwe mpindyewu ku diitabuuja, basòmbe mu myaba ya mu Dyulu eyi mu Yéyè. Tudi bindile Mukenji Wende. Ùwâkwilè kutudi, Mukalenge, uwuteelejile kutudi, patudi tulomba bwa Wêwè kutengula mishiku yidi yakula ne maci adi ateeleja, bwa kwikalabi bwa luumu ne butumbi bwà Ewu Udi Mifundu awu. Bwalu tudi tulomba nunku mu Dînà Dyende. Amen.

<sup>34</sup> Mpindyewu, nwavulukaayi masangisha a dilolo edi, mudimu wa dyondopa. Ncyéna ngeela meeji ne mbifwanyine kukengela bwa kwabanya twarta twa disambila to, pa nanku tudi tusambidila anu babeedi cyanaana. Ndi ne cintu kampanda cîndì njinga kunwambila, ne ndi—ndi ntekemena ne necîbweje anu disangisha mu kaaba kaa ne nekwikale anu dyondopa dya mishindu ne mishindu. Ndi mumanye ne necyenzeke patwikala anu mwa kuciitabuuja mushindu awu.

<sup>35</sup> Mpindyewu eci, misuuka mu buloko mpindyewu, misuuka yidi mu buloko mpindyewu!

<sup>36</sup> Mpindyewu, musuuka wa muntu kî mmubidi wa muntu to, wôwò mmusuuka. Nwamonu anyi? Kadi musuuka ncintu kampanda cidi ciikale ngii—ngiikadilu wa nyuma. Ne pashiishe padi ngiikadilu wa muntu... Padiye mwambe ne: “Tudi bafwe,” Mufundu udi utwambila anu patooke ne, “tudi bafwe, ne myoyi yetu mmisokoka mu Nzambi kuplicila ku Kilisto, mitwibwemù citampi kudi Nyuma Mwîmpè.” Mpindyewu, kabivwa ne mubidi webe ngudi mufwe to; nyuma webe kî ngudi mufwe to. Ngiikadilu wa nyuma webe ngudi mufwe; wamonu’s, ngiikadilu, udi mwikale musuuka. Ngiikadilu wa musuuka webe udi—udi Nzambi, pawikala mulediibwe cyakabidi. Kabiyyi nanku to, ngwa pa buloba. Cintu cyônsò cidi cibange cidi ne cya kushiikila, ki bwa cinyi mushindu umwepele wa wêwè kwikala ne Mwoyi wa Cyendeleele ngwa kwikala ne Mwoyi utu kacya kawuyiku mubange to. Nenku pa dîbà adi webe mwoyi wakabanga pawakalediibwa, paakapwidija Nzambi mupuuya wa mwoyi mu mimpepmepyebe ne wêwè kulwa musuuka udi ne mwoyi apu, pa dîbà adi ki wêwè kubanga pa dîbà adi. Kadi paudi... .

<sup>37</sup> Ngiikadilu uvwa munda mwebe awu, ku ngiikadilu wêwè uvwa wa pa buloba, mushale mwenyi kudi Nzambi, wêwè uvwa anu nyama wa cya bushuwa ewu. Ncya bushuwa menemene. Muntu kana yônsò ewu mmumanye ne twêtù tudi nyama yidi yamusha. Mbanganyi badi bamanye aci? Twêtù aba, tudi nyama yidi yamusha, tudi nyama ya mashi masaluke, kadi aci's ki citidi ku difukiibwa dyetu dya pa buloba. Kadi, nudi numona's, cidi cituvwije bashiilangane ne nyama mikwabo yidi yamusha eyi, cidi—cidi ne Nzambi mmuteeke musuuka munda mwetu. Nwamonu anyi? Mpindyewu, nyama mikwabo yìdì yàmushà eyi kabyena bikengela yivwale bilàmbà to. Kakwena nyama mukwabo udibi bikengela bwa avwale bilàmbà bwa kusokokaye bundu bwende to, pa kuumusha twêtù. Anu twêtù nkaayeetu ki badi bacyenza, bwalu tudi ne musuuka. Kadi, nwamonu's, Nzambi, ku cibangidilu, uvwa mumanye ne muntu uvwa mwa kwikalala ne mmwenekelu kaayi. Ki Yéyè kufuka buloba, ne kutwala mishindu yônsò ya nyama, kuumukila ku udi mutambe kupwekela too ne ku udi mutambe kutumbuka; ne nyama uvwa mutambe kutumbuka wâkalwa, uvwa mmuntu.

<sup>38</sup> Nenku pashiishe, kumpala, muntu wâkenjiibwa awu, uvwa mmuntu-nyuma, mu cimfwanyi cya Nzambi.

<sup>39</sup> Bwalu: “Nzambi udi Nyuma,” Yone Munsantu 4. Mpindyewu: “Yéyè udi—udi Nyuma. Ne bàdi bàMukuukwila, badi baMukuukwila mu Nyuma ne mu Bulelala. Ne Dìyì Dyebe didi Bulelala.” Mpindyewu, tudi tuMukuukwila mu Nyuma ne mu Bulelala. Yéyè udi—udi Kampanda-Nyuma.

<sup>40</sup> Pa díbà adi kakuvwa muntu bwa kudima buloba to, ki pashiishe Nzambi kwenza muntu ku lupwishi lwa buloba.

<sup>41</sup> Pashiishe Yéyè kupatula mu lubadi lwende amu, cintu cyangata ku cikwabo, lubadi; nenku, ku lwôlò alu, kutapulula muntu ewu uvwa ne ngiikadilu ibidi, yivwa yônsò ibidi miikale bukaji ne bulume. Ki kupatulaYe bukaji abu, bwalu buvwa ndinanga, ne kubuteekaYe mu muntu wâkabiìkidiibwa ne ng'Eva, uvwa Adama mwinyike ne ng'Eva awu, uvwa mwikale mukajende awu. Ki mwaba awu uvwa dinanga dyende, dya mu mubidi, dinanga dya fileo, dilamate kudi mukajende. Mushindu awu ki udi ukengela bwa muntu kwikalaye leelu ewu, ne mukaji pende bwa bayende. Mulume, bulume; mukaji, bukaji.

<sup>42</sup> Nenku pa díbà adi, nwamonu's, paanyima paa Yéyè umane kwenza muntu mu cimfwanyi Cyende Yéyè mwine, “Wakabafuka, mulume ne mukaji,” kakuvwa muntu bwa kudima buloba to. Ki Yéyè kumuteeka mu lupwishi lwa buloba, ki bwa cinyi wakalwa... yéyè ki uvwa muntu awu. Muntu wa buumuntu ewu uvwa wa wamussha, nwamonu's, ùvwa nyama; kadi Yéyè kuteeka nyuma wa Nzambi ewu, mwoyi kampanda, munda mwende, ki kumwenzaye mu mushindu wa kumonaye mwa kwenza disungula. Ki pashiishe muntu ewu... .

<sup>43</sup> Mpindyewu twêtù tutu tudyelela meeji mutudi cintu kampanda. Anji vulukaayibi, twêtù aba tudi cinyi? Cimoto cya buloba. Kwajiki. "Nenku bwalu udi lupwishi, ku lupwishi nkuwapingana." Pa nanku panudi numona muntu ewu wenda upweka ne mùsèèsù, udyelela meeji mudiye kampanda, nudi bamanye's, mwikale ne ndambu wa dilonga dya tulaasa ne bikwabo, vulukaayi ne, ncimoto cya lupwishi lwa mu Indiana. Kwajiki. Ne mukaji udi muvwale kaputulu, wenda unwa mfwanka ne wenza maalu a lukutukutu mu mùsèèsù awu, wenda ujeekeja nyima byenze bu ne ditunga dijima edi ndyende yéyè awu, ncimoto cya lupwishi lwa mu Indiana, ne kwôku aku nkwapinganaye. Pa nanku kwêñà nansha ne bwa nsongo to twamb'eku twamb'eku, wamonu's. Pa nanku aci, neya bushuwa, s'ki cyûdì wêwè awu.

<sup>44</sup> Kadi, musuuka udi munda amu awu, nwamonu's, pa musuuka awu mpadi Nzambi ukwacila mudimu, nwamonu's. Bu Yéyè anu mwa kufikisha ngiikadilu awu, nyuma awu, ku diitabangana nende Yéyè, pa dîbà adi ngiikadilu awu udi ufwa, ngiikadilu awu ne dinanga dya maalu a pa buloba bidi bifwa, ne maalu a pa buloba mmafwé. Nwamonu anyi? Bwalu: "Pawikala munange maalu a pa buloba, anyi bintu bya pa buloba, dinanga dya Nzambi kadyena munda mwebe to." Nwamonu anyi? Nenku bikengela muntu aledilibwe cyakabidi. Pa nanku, bikengela ngiikadilu ewu afwe, ne ngiikadilu wa Nzambi alwe ne ikale ne mwoyi munda mwebe. Nenku Nzambi ki cintu cimwepele cidiku cîtù kacya kaciyiku cibange anyi kaciyiku mwa kwikala ne ndekeelu to.

<sup>45</sup> Pa nanku, ki bwa cinyi, Yéyè mmuswikakane nende, nwamonu's, ne mwangate muntu ewu, wa pa buloba ewu, ne Nyuma wa Cyendeleele ewu, ne mubiteeke pamwe. Bwalu, Nzambi uvwa uDimweneshila mu cyôcì aci, bwa Yéyè kulwa Muntu paakalwaYe Kilisto Yesu, ne Yéyè nguvwa Nzambi, nwamonu's. Nzambi uvwa munda mwa Kilisto; aci, nwamonu's, musòmbèle munda Mwende, upungisha baa pa buloba ne Yéyè mwine. Nenku, ku Muntu mupwangane awu, muntu ne muntu wa kutudi twêtù badi kabayi bapwangane kadi biikale twitabuuja Nzambi ne biitabe Cyôcì aci aba, ûdi ûlwa bupwangane Bwende.

<sup>46</sup> Nenku Yéyè kaakalekelaku bwa mubidi Wende kumonawu dibola, anyi Kaakalekelaku musuuka Wende mu iferno to, kadi WakaMubiisha ku lufu mu dituku diisâtù, ne Yéyè udi ne mwoyi kashidi ne kashidi. Ne twêtù netwikale ne mubidi mufwanangane ne mubidi Wende wa butumbi awu.

<sup>47</sup> Ki bwa cinyi tudi tubatijiibwa mu Dînà Dyende, bwa twamona mwa kupatuka mu Dînà Dyende, mu lufu Lwende, mu dibiika Dyende dya ku lufu, bwa twêtù kubiika cyakabidi ku lufu, biikale tujaadikila baa pa buloba ne tudi ne Mwoyi

mupyamupya ne, muntu mukulukulu awu ukaadi mufwe. Tukaadi bajiike ngiikadilu wa kumpala awu. Nwamonu anyi? Ngiikadilu wa kumpala awu ukaadi muye, ne mpindyewu tudi baa ku ngiikadilu wende Yéyè. Yéyè mmusòmbèle munda mwetu, ne katwena twenza diswa dyetu twétù to. Tudi twenza diswa dyende Yéyè. Katwena twela meeji etu twétù to. Meeji, meeji ncidi cyela meeji aci. Meeji avwa munda mwa Kilisto Yesu awu ngadi munda mwa mwena kwitabuuja yônsò. Nwamonu's, ki—ki musuuka ngwawu, ne pa cyôcì aci mpatudi twakwila apa. Mpindyewu, pa citupa aci mpândi ngeela meeji mpindyewu, ne neyôcì aci cidi munda mwetu, musuuka.

<sup>48</sup> Mpindyewu, bu twétù mwa kumona, mu cyôcì eci, mudi bintu byàbûngì bidi byenzeka misangu mikwabo, kadi biikale tudikonka ne mbwa cinyi bidi byenzeka, ne tudyela twétù biine nkonko, tuyeela kabidi bakwabo. Kadi ndekeelu wa byônsò, paanyima paa cikondo kampanda, tulwa kujandula ne, piikalabi ne tudi beena Kilisto, byônsò abi bidi byenzeka anu bîmpè, mu mushindu kampanda anyi kansanga. Nukaadi bamonemone cyôcì aci. Beena Kilisto bônsò batu bamona cyôcì aci. Tutu tudikonka ne mbwa cinyi tuvwa bacyénzè.

<sup>49</sup> Mwva anu ndikonka misangu mikwabo, pângààkabalà Bible musangu wa kumpala ne: “Bwa cinyi Nzambi wakalekela Abraham, muntu munene awu, wimana kwaka wamba ne Sarah kí mmukajende?” Ne mwakamulekela Ye wimana kwaka kadi kubanga kudinga pa bwalu abu, ne bintu byakenzaye abi, ne pashiishe mwakalekela Ye Abraham ushiya buloba bulaya bwine bwakamwambila Ye ne kashiyi abu. Mwena Yuda yônsò udi ushiya buloba bulaya mmutwe cimpingà, bwalu Nzambi wakabapabu ne wakabalaya bwa bôbò kushaala basòmbèlemù, nwamonu's, kadi bôbò kubushiya. Ki yéyè kupweka kuya mu Guerar. Kadi bu ne kabivwa bwa cyôcì aci to . . .

<sup>50</sup> Ki pashiishe Abimeleka, mfumu wa diine ditunga dya beena Peleshete adi, kukwacikaye dinanga bwa Sarah ne kuswaye bwa kumusela, kadi ûvwa muntu mwímpè, muntu mwakane. Ne pàmwápa paanyima paa yéyè mumane . . . Eci's cidi cimweka cicimbè, kadi mbwa kunutookeshilaci. Paanyima paa yéyè mumane kwowa mâyi ende a dilolo ne muvwale piijâmâ wende, ne mwenze masambila ende ne mukalaale mu bulaalu, Mukalenge kumumwenekela e kwamba ne: “Wêwè's udi mwomumwe anu ne muntu mufwe,” pende muntu awu kayi nansha ne civwaye mwenze to. Nwamonu anyi? Ùvwa anu museeswishiibwe kakuyi mpatà to, kudi Abraham ne Sarah bônsò babidi. Ncya bushuwa. Yéyè ne: “Udi ne mukaj'a bende, wamonu's. Ne Mêmè—Mêmè ncyakuumvwaku masambila ebe to, nansha wêwè mwenze masambila bûngì bishi. Wêwè udi mwomumwe anu ne muntu mufwe. Kadi muntu awu mmuprefeta Wanyi.” Nwamonu anyi?

<sup>51</sup> Nwamonu's, mbikole bwa kuumvwa cyôcì aci, nwamonu's. Kadi bu ne kacivwa cyôcì aci to, nunku katuvwa bafwanyine kumanya ne ngâsà ncinyi to.

<sup>52</sup> Bwa cinyi wakaya kasela Hagàà, paanyima paa mumane kupeta mukaji mulenga naka bu Sarah wawa? Ne yéyè mwine kavwa anu muswe kucyenza to, nwamonu's, kadi Sarah nguvwa mumwambile. Ki pashiishe Mukalenge kumwambila ne: "Teeleja cidi Sarah mukwambile aci." Bwa cinyi? Bivwa bikengela kwikale Ishamela, "bwa mukaji mupika ne mwanende kabàlu kwikala bapyanyi pamwe ne mukaji mudishikamine ne wende mwânà." Nudi bumvwe cindi muswe kwamba aci anyi?

<sup>53</sup> Bintu byônsò ebi mbifwanyikijilu. Bwa cinyi byakakengela bwa muprofeta awu akasele ndumba ne apete...ne bânà biine aba, kulela nende bânà babidi? Mbu cimanyinu. Bwa cinyi mukwabo wakalaadila kaseke kaa dyabalume matuku nkama isatu ne makumi anaayi, pashiishe kulaala matuku bûngì kampanda luseke lukwabo mushindu awu? Mbu cimanyinu. Mukwabo yéyè wakakopola bilàmbà kadi kwenda nanku kumpala kwa Izaleela. Nenku, mpindyewu, bintu byônsò abi, bivwa mbifwanyikijilu ne mindidimbi, nwamonu's; nenku bikengela twikale ne bintu abi, bwa kubyuza.

<sup>54</sup> Nenku, misangu yàbûngì, maalu atu atwenzekela atudi tudikonka ne mbwa cinyi. Nzambi ngudi udyanjila kutuleeja cintu kampanda.

<sup>55</sup> Mpindyewu, pâncìvwà mwânà mutekete, ne nudi bamanye bwali bulonda bwa nsòmbelu wanyi, mvwa—mvwa misangu yônsò anu ngiitabuuja, kacya anu ngâbanga kuvuluka... Cimwe cya ku bintu bya ntwadijilu bîndì mvuluka... Mpindyewu eci, mpindyewu, nudi bafwanyine kwikala bangambile cintu kampanda makeelela awu, kadi mêmè mufwanyine kucipwa mwoyi leelu ewu. Kadi kudi bimwe bintu, kale wawa, bitu byenzeke mu matuku etu a ku bwânà, bààbûngì beetu batu mushindu awu, bitudi anu tuvuluka misangu yônsò. Kadi bidi bimweka anu bu bicimbè bwa kwamba eci nunku, kadi ndi mvuluka pâncìvwà nkalaba, muvwale nkanzu mule. Bânà bakese, mpindyewu bamwe baa kunudi baa bukole bwanyi ebu mbafwanyine kuvuluka ne, bânà bakese bavwa ne ciibidilu cya kuvwala nkanzu mile menemene. Ne ndi mvuluka pâmvwà nkalaba, kadi ngangata nêjè ku makàsà a taatu mwakunyi mmudya, paakalwaye kwetu kumbelu ne kushala mwimane pabwípi ne mafuwa.

<sup>56</sup> Ne pashiishe cintu cidi cilondà cîndì mvuluka cyàkenzekà mu nsòmbelu wanyi, civwa ncikeena-kumona, cya kumpala cînkaadiku mumone, baakangambilà ne nênsombelè citupa cinene cya matuku aanyi a mwoyi pabwípi ne cimenga cidi dînà ne New Albany. Nenku mvwa mwânà mukese wa ku mikuna kuntu kwaka, kakuyiku nansha ngangabuka piine

paakandelabo apu to. Nenku—nenku mêmè—mêmè... Nudi bamanye, bôbò... Ndi musòmbèle muneemu emu kukaadi bidimu bitwe ku makumi ataanu, anu muneemu emu; cikeena-kumona's.

<sup>57</sup> Ne pashiishe mushindu wùntù misangu yônsò mumanye ne kuvwaku Nzambi mwaba kampanda, ne muvwaYe mwakule naanyi pâncivwà mwânà mutekete, "bwa ncînu mfwanka, anyi maala, anyi ncikooishi mubidi wanyi," mbwena kwamba ne kwenda masandi ne bakaji ne bikwabo. Mêmè mvwa anu naabi bwôwà misangu yônsò, mucikàle anu nsongaalume.

<sup>58</sup> Nenku pashiishe mvwa mupatuke muye katwa buluwà musangu kampanda, cìdì cimweka kûndì bu ngiikadilu mwibidì, kunanga ditwa dya buluwà. Nenku mvwa mupatuke muye katwa buluwà ne mwânà wa balume mukwabo, Jim Poole, mwânà mulenga be. Ngeela meeji ne mwanende wa balume utu ulwa mu ekeleziya emu, Jim mwânà, batu famiye wa bantu bîmpè be. Ntu mumanye ba-Poole abu. Jimmy ne mêmè tuvwa tulaala kaaba kamwe ne tuvwa basòmbèle kaaba kamwe kubangila anu patucivwa bânà batekete mu kalaasa. Tudi bashiilangane ku ngondo bu isambombo nanku, bwa ku bidimu byetu. Kadi Jimmy kulekelelaye cingoma cyende, ki kungaasaci mu mikolo yônsò ibidi, anu mu ntanta mwípì menemene naanyi, ne cingoma cya tundimba. Kuyabo naanyi ku lupitaadi, ne, kwine aku, nkaavwa mulaaleku mpùnga ne lufu, kakuyiku nî mpeneseliina nî ncinyi mu miine matuku awu to. Nenku, mpindyewu, bavva bantekele cipese cya cindundu mwinshi, ne ndi mumanye ne bufuku abu... Bavva ne cya kumpanda mu dinda dya pavwabu mwa kucya apu.

<sup>59</sup> Ki kusukulabo anu mputa awu cyanaana, nenku ne biimisunya binene bya munyiinyi bipandike, ne kwangatabo kashoola e kubikosabo, ne bivwa bikengela mêmè kwikalà mukwate byanza bya muntu kampanda. Nenku bavva ne Franckie Eich, mmufume ku didishipa anu abidi adi panshi aa, nenku byakakengela bwa kukwatabo, kukanunabo byanza byanyi bwa kubituula ku maboko ende, paa—paakajikijabo. Mvwa ngeela mbila mikole ndila mwadi, kacya anu ngaakwata mushindu awu, pavwabo bakosa cisunsukila cya mukolo aci bacyumusha. Mvwa ne bidimu dikumi ne binaayi, mucikàle anu mwânà's.

<sup>60</sup> Ki bufuku abu mêmè kuteeta bwa kuya mu tulu, ki bôbò... Mêmè kutabuluka, cintu kampanda cisotoka. Kadi ki mashi aa, matwe ku litres ibidi ngeela meeji, mapatuke mu mijilu. Ki kwangatabo...kukwatabo fôtô ku cyamu cya mîdimà, ki kwambabo ne kandimba kavwa kakiimanyine pabwípì menemene ne mujilu munene awu, ku luseke ne ku luseke, mu mushindu wa ne anu diwufyondola kakese cyanaana divwa difwanyine kuwukosolola mu bitupa bibidi,

bya mêmè mufwanyine kubanga kujimija mashi. “Ee,” mûngààkadyàmbidilà, “ki wanyi ndekeelu nyêyè ewu.” Ki mêmè kwela byanza mwinshi mushindu ewu e kucyambulula kuulu, ki mashi binzololokela mu byanza, mu mashi aanyi mêmè mwine ki mûmvwà mulaadile amu. Mêmè kubiikila, kuditisha kangonga. Munganga mukaji kulwayne, ki yêyè kuàbooya anu cyanaana ne nsùmè bwalu kakuvwa civwabo bafwanyine kwenza nansha cimwe to.

<sup>61</sup> Ki paakacyabu mu dinda, mu ngiikadilu ya butekete ayi, kabavwa beelangana mashi a mu mijilu mu miine matuku awu to, munudi bamanye, ki bôbò—bôbò kumpanda. Ki bôbò kuntwa bwanga bwa ether. Nenku pâmvwà... Ether wa kale awu, ngeela meeji ne nudi bavuluke, ki uvwa bwanga bwa dibenga kusaamisha bwa kale abu. Nenku ne ether awu mu mubidi, pavwaye unjika mu mubidi, ether uvwa unjika mu mubidi paanyima paa mêtba mwandamukulu. Bivwa bikengela kuntwabo wabûngì, bôbò kwela meeji ne mêmè ncivwa mufwanyine... ncivwa mufwanyine kubiika to. Kabavwa mwa kumfikisha ku dibiika to.

<sup>62</sup> Ndi mvuluka ne Mandamu Roeder nguvwa mwimane ku luseke lwanyi, mu lupitaadi amu. Ncyadyakupwaku mukaji awu mwoyi to. Nansha nî ncinyi nî ncinyi cyenzeke, ncyêna mufwanyine kumupwaku mwoyi to. Ucivwa anu mukaji mutekete mwine musangu awu. Bayende uvwa mfumu wa midimu mu cyapu cya dyenza dya mashinyi a tudyendelandela emu. Nenku ndi—ndi mvuluka muvwaye mwimane ku luseke lwanyi aku, ne yêyè ne Mandamu Stewart. Ne mu bushuwa bwa bwalu bôbò biïne abu mbaakamfucila mfranga ya lupitaadi. Mêmè... Katuvwaku nansha ne nshima miine ya kudya eyi to, kwetu kumbelu, kadi anji ambaayaaku tûng mutuvwa mwa kufuta mfranga ya lupitaadi, nkama ya ndola ayi? Kadi yêyè mukaji awu, kupicila ku kasumbu kaa ekeleziya wabo ne kaa Ku Klux Klan, kumfucilabo mfranga ya lupitaadi ayi, beena Mason. Ncyêna mwa kubapwaku mwoyi to. Nwamonu anyi? Nansha byôbi ne batu benza cinyi, anyi nî ncinyi, ntu anu... kudiku anu cintu kampanda, ne cyôci aci cidi anu cishaale cindamate, nwamonu’s, cyakangenzelabo aci. Ki kufutabo mfranga ayi kudi Ngangabuka Reeder. Yêyè ewu ucidi anu ne mwoyi, mmusòmbèle mu Port Fulton emu, yêyè ngudi mufwanyine kunulondela mudi bwalu.

<sup>63</sup> Paakanjika ether awu mu mubidi, kwakangenzekela cintu kampanda mwaba awu. Ntu anu misangu yônsò ngeela meeji ne civwa ncikeena-kumona. Bwalu, mvwa muteketangane bikole, nenku mêmè... Baakeela meeji ne nkaavwa mpunga ne lufu. Mukaji awu uvwa udila mwadi. Pângààkatâbajà mêsù, mvwa mwa kutangila, mvwa mwa kumuumvwa wakula, ki pashiishe mêmè kwalukila cyakabidi mu tulu, kadi kutabuluka, misang

ibidi anyi isatu. Ki pa dîbà adi mêmè kumona cikeena-kumona. Ki pashiishe mêmè kupeta . . .

<sup>64</sup> Paanyima paa ngondo mitwe ku mwandamutekete, ki kukengelabi bwa mêmè kuya bwa kukampatulabo tusunsukila twa tundimba ne bilàmbà bya mu buluwà biikale ne bifutafuta mu mikolo; ngangabuka kavwa mubipatule to. Pa nanku ki mêmè kupeta mulùngù mu mashì, mikolo yônsò ibidi yikaavwa myûle midyundakanangane lwà mwinshi mwanyi emu, nenku bavwa bakeba kukosela mikolo yanyi yônsò ibidi lwà mu cifuka emu. Nenku mêmè anu . . . Mémè ne: “To, bandishaayi nuyikosele anu lwà kuulu eku lwa *apa*.” Ncivwa mwa kuciitabaku to, nwamonu’s. Nenku ndekeelu wa byônsò, ki Ngangabuka Reeder ne Ngangabuka Pirtle, baa mu Louisville, kumpandabo, ne kupandabo muntwamu ne kubipatulabo; kadi leelu ewu ndi ne mikolo milenga milaya, ku ngâsà wa Nzambi.

Kadi mu ci—cikeena-kumona cya ndekeelu cîmmwènè aci . . .

<sup>65</sup> Cikeena-kumona cya kumpala, pângààkaalukilà mu mêmè, ki pashiishe mêmè kubwela mu nyuma emu. Ki mêmè kwela meeji ne mvwa mu iferno, anu bitooke tòò . . .

<sup>66</sup> [Mwaneetu wa balume kampanda udi wamba ne: “Mfwileku luse, mukalenge.”—Muf.] Uh-huh. [“Kaaba aka nyewu kudi muntu mukaji mufwe cipuuka, *pààpa* naka.”] Eyo, muntu amutentekeleku byanza, nenku yéyè . . . pàmwâpa bamupatwileku mwaba udi kapeepa kapita. Mpindyewu yônsò udi mwimanyinepu awu, amutentekele byanza.

Tusambilaayi.

<sup>67</sup> Mukalenge Yesu munanga, swaku bwa mwaneetu wa bakaji udi usaama mu dinda emu ewu, mwikale mufwe cipuuka mu cibambalu emu awu, swaku bwa ngâsà Webe ne dikanda ne bukole . . . nya’ kudi byanza bimutentekela mpindyewu, bileeja mpala Webe. Ne Mufundu mmwambe ne: “Bimanyinu ebi nebifile badi biitabuuja. Bôbô batentekele babeedi byanza, babeedi nebasangale.” Nenku mpiindyewu swaku bwa mwaneetu wa bakaji apatuke mu disaamà edi, ne ondopiibwe bwa butumbi bwa Nzambi. Mu Dînà dya Yesu Kilisto mmutudi tulomba nunku, ne tuKupeeshaye mu byanza. Amen.

<sup>68</sup> Mpindyewu mupatwilaayi mwaba udi kapeepa. Kudi—kudi cipwidiji cibi be. Mémè ndi mwa kucyumvwila kaaba aka, cibi, cibi menemene. Bidi anu bya muntu umvwa mwa kufwa cipuuka, pa cibumba cya ku cyambilu apa. Ndi mucyúmvwè, misangu inaayi anyi itaanu mijima kaaba aka. Piikalabi ne kudi . . . pakaadiye anu ubanga kudyumvwà ndambu bîmpè, mona’s, ndaayi nende mu mwaba udiye mwa kwikala upetaku kapeepa. Aci ncímpè. Uh-huh. Nwamonu’s, kudi cipwidiji anu cibi be, nudi bamanye’s. Bantu batu bapatula, muntu ne muntu wa kutudi, masaama àdì àyà too ne mu ntanta

wa mètres carrés bûngì kampanda. Panwikala, muntu yéyè ne ndambu wa mâyì mwaba awu, anyi cintu kampanda bwa kwelaku mwaneetu wa bakaji awu. Bikengela bwa yéyè—yéyè, mbîmpè mpindyewu. Nwamonu anyi? Eyo. [Mwaneetu wa balume kampanda udi wamba ne: “Tushiye anu biibi byunzulula’s, Mwaneetu Branham.”—Muf.] Eyo, pàmwàpa ne nudiku mwa kuunzulula biibi, pàmwàpa, anyi kafilaku anu ndambu wa kapeepa, mu mushhindu utudi mwa kukumbaja awu, mu mushhindu kampanda, nwamonu’s.

<sup>69</sup> Mpindyewu pa diine dîbà edi, bu mûngààkamònà cikeena-kumona aci, ne ndyambidila ne nkaavwa—nkaavwa muumuke mu ewu mwoyi mukabwele mu dikengeshiibwa.

<sup>70</sup> Nenku ngondo mwandamatekete mimane kupita, mu Lupitaadi lwa Clark County Memorial emu, kumpandabo bwa musangu mwibîdi. Ne mwine musangu awu, pângààkapinganà mu mêmè, mêmè kwela meeji ne mvwa mwimane lwà mu Wesete mwamwa. Mvwa mupete cikeena-kumona cikwabo. Nenku kuvwa nkuruse munene wa ngôlò mu maulu, ne Butumbi bwa Mukalenge bupongoloka bufumina ku mwine nkuruse awu. Nenku mvwa mwimane ne byanza byanyi bibaalula mushindu ewu, ne Butumbi abu bwikale bumpwekela mu cyâdì. Ki mêmè... Cikeena-kumona aci kunguumükaci. Taatu uvwa musômbe mwaba awu muntangile, paakalwa cikeena-kumona aci apu.

<sup>71</sup> Ntu anu ndyumvwa misangu yônsò, nudi... Bantu bônsò bâtù bammanye bidimu byônsò ebi abu, batu bamanye ne mêmè ntu anu njinga bwa kuya ku Wesete. Nutu bamanye mutubi amu. Kutu anu cintu kampanda pa bidi bitangila Wesete. Kadi bwalu mulongi kampanda wa mabulunga a muulu wakangambilà musangu kampanda, cintu cimwecimwe aci ne, bivwa binkengela mêmè kuya ku wesete... Mitooto, patuyi yikosolola mu bijengu byayi ne bikwabo, ntu mulediibwe mwinshi mwa cimanyinu aci, ne ncyadyakututaku dyakalenga mu Esete to; bivwa bikengela anu mêmè kuya ku Wesete. Nenku cidimu cishaale eci mêmè kukuya, ku Wesete, bwa kuuja civwa dijinga dya kacya bandela adi, nwamonu’s, bwa—bwa kucyenza.

<sup>72</sup> Ndi kwôkò aku bwa cinyi? Ncintu cya citambe kwikalà cicimbè’s. Mukasòmbèle mu cipeela mwamwa, mfuta ndola lukama ne dikumi ku ngondo, ya difucila dya nzubu, nzubu pende kaaba aka ulaala munda mutupu, nzubu wa mpaasata, mundongolwela, nwamonu’s. Kadi nkulonda kwa Mukalenge, nwamonu’s, ki—ki cyônsò cîndì mumanye cya dyenza. Ne nudi bamanye bikeena-kumona ne byônsò bitu byenzeke kwine kuntwaku abi. Mpindyewu—mpindyewu mu eci ndi muswe kwamba bwa...

<sup>73</sup> Mpindyewu piikalabi ne mwaneetu wa bakaji awu udi udyumvwa ne mateketa ndambu, Mwaneetu Roy, ne yéyè

mufwanyine...muswe bamupatwileku mwaba kampanda ne bàmusòmbèshè mu cibambalu kampanda mwaba ewu, mudiye mwa kwikalaku upeta kapeepa kààbùngì anyi cintu kampanda, aci ncímpè menemene, bwalu, ndi ngumvwa ne neàdyùmvwè bímpè mpindyewu, nwamonu's. Mbikumbane. Cidiye udi anu muteketangane, usaama. Ne pa nanku ndi—ndi nkwwambila ne, piikalaye...bu wêwè mwa kuswa bwa kulwa nende lwà apa padi kapeepa...bandisha madidiishi aa, Mwaneetu Roy, nenku piikala mwaneetu wa bakaji muswe bwa kupicila apa, aci—aci neciikale címpè. Wamonu's, yéyè muswe ku—kuvwila lwà apa nunku, ee, kuciinyi aci to.

<sup>74</sup> Ndi muswe kumutentekela byanza paapicilaye kaaba aka. Nwénù bônsò numfwilaayiku luse ndambu. Ne Nzambi amfwileku luse bwa...Aci, aci ncyá bushuwa, mwaneetu.

<sup>75</sup> Taatù wa mu Dyulu, mwan'Ebe wa bakaji ewu nyewu musòmbe kaaba aka mu dinda emu, ne mmulwe bwa kuteeleja Mukenji, kadi nyewu wapeci...Sataana ngudi ukeba bwa kumupangishaci, kadi kêna mwa kucyenza to. Kêna mwa kucyenza to.

Akubeneshe, mwaneetu wa bakaji, mu Dînà dya Yesu Kilisto.

Eyo. Ee, cyacya ciibi, ngeela meeji ne bu ndambu wa...?... bânà beetu baa balume, pa dîbà adi kapeepa kadiku mwa kupicila apa, too ne kûdì eku.

<sup>76</sup> Kaa, nwénù badi bambaa bwa cipwidiji, s'bivwa bikengela nwénù kubwelaku mu yimwe ya ku myaba ya dyamwamwa dya mbù yaya yidibo anu bambakaja bantu pamutu paa bakwabo, biikale ne nsudi ne kansere. Nenku, kaa, ekelekele, kuyiku mwa kupeta mushindu wa kweyela to, nudi bamanye's, mu bintu bya mushindu bu nanku. Kubateeka mu bizùbuzubu binene bya menemene abi, bitampakane anu ne—ne masaama. Kadi nudi bamanye anu cidi nsudi mifwanyine kwikala aci. Muntwamu, balààdika muntwamu kabayi ne maci to, ne cyabibidi cimwe cya mpala cidiike cyônsò, kabayi ne maboko to, ne tupompokoto tukese bu ne ki makàsà, ne bintu bya mushindu awu, balààdika, bambakajangana. Ne bamwe baa kudibo biikale bafwa anu pa dîbà adi, balààdika mwaba awu, bwa dibambahakajangana adi, bateeta mwa kubwelela mwaba kampanda, nudi bamanye's, bwa kuteeleja Mukenji.

<sup>77</sup> Kadi mpindyewu—mpindyewu mu eci, ndi nnwambila cyakenzeka. Mu ciine cikeena-kumona cíngààkamònà aci, nêngààlukilè paanyima, bwalu ndi mutwale cyôcì aci, bikeena-kumona byônsò bibidi abi, bwa kunuleeja pa bidi bitangila cimwe cya ku byôbì. Bivwa bikengela mêmè kusanganyiibwa mu Wesete. Ntu misangu yônsò anu njinga cyôcì aci.

<sup>78</sup> Nenku mpindyewu, kiipacila kaa Diyisha dya mu dinda edi mbwa kumanyisha ekeleesiya, mu byônsò biikalaYe mwa

kundekela mêmè mmoneyisha ekeleziya abi, bwa ku dyanyi dimanya, too ne . . . pândì ngenda nya apu. Nenku eci ncindenge, pa nanku mvwa muswe kumoneyisha ekeleziya. Mpindyewu, eci cidi anu bwa tabernacle ewu nkaayende, nwamonus's, kaaba aka. Mpindyewu, ne mu cikeena-kumona eci, cya kumpala eci, cidi cyenzeke ncyôcì eci.

<sup>79</sup> Paanyima paa cikeena-kumona cimane kundenga, ne mêmè mushaale muteketangane bikole, ne mujimije mashî ônsò awu, ne muye . . . mvwa ngeela meeji ne mvwa munkaci mwa kwikala ngenda ntukina mu Cyendeleele kampanda cya kaciyi ne nshiikidilu. Bââbûngì baa kunudi bakaadi bangumvumvwe ndonda bwalu ebu kwônsò eku, ne—ne ngenda ntukina mu Cyendeleele cya kaciyi ne nshiikidilu. Kumpalampala, mvwa ngenda mpicila bu mu mavuba nanku awu, ne pashiishe mpicila mu mîdimà, ngenda ntukina mwikale ngenda mpweka, ngenda mpweka, ngenda mpweka. Kadi katanci aka, mêmè kubwela mu myaba ya bajimine, ne mwômò amu mêmè—mêmè kwela lubila lukole. Ki mêmè kutangila, mwômò amu, anu bintu byônsò, kabiyi ne ntaku wa kwimanyina to. Nciyiku mwa kulekela dyenda dikuluka adi to. Bwa Cyendeleele, muvwabi bimweka, mmûmvwa ne cya kwikala anu ngenda nkuluka. Kakuyi diimana to, mwaba nansha umwe.

<sup>80</sup> Ne pashiishe mushindu mwine uvwaku dishiilangana's pankaci paa cikeena-kumona cîmvwà mupete mwaba ewu, abidi adi pansi aa, cya mwikale nsanganyiibwa mu Butumbi ne bantu, dipangakana dya dikema's! Kadi mu eci, pâmvwà ngenda nkuluka apu, ndekeelu wa byônsò, mêmè—mêmè kwela lubila nkeba papa wanyi. Mu bushuwa bwa bwalu, bu mûncìvwà anu mwânà, ki cîmvwà mufwanyine kwenza. Mêmè kwela lubila nkeba papa wanyi, kadi papa wanyi kayimu to. Ki mêmè kwela lubila nkeba maamu wanyi ne: "Muntu ankuate kwôkwèè!" Kamuyi maamù nansha umwe. Mvwa anu ngenda nya. Ki pa dîbà adi mêmè kwela lubila kudi Nzambi. Kamuyi Nzambi nansha umwe. Kamuyi cintu nansha cimwe to.

<sup>81</sup> Ki paanyima paa katanci mêmè kuumvwa dîyî ditambe kwikala dya mwadi dîntù kacya mêmè ewu ngûmvwakù, ciikale njiyà ya mibyämibyâlè. Kakwenaku mushindu nansha umwe . . . Nansha mudilu wetu wa bushuwa utu woshangana ewu mmufwanyine kwikala cintu cya cisankishaku bwa baswe kuwufwanyikija ne civwa cyôcì eci. Mpindyewu bikeena-kumona abi kabituku byanji kwikala bya mashimi to. Nenku civwa anu yimwe ya ku njiyà ya yitamba kukwacisha bwôwà ya kacya mêmè ewu ngûmvwakù paanyi, ne cyâkenzà . . .

<sup>82</sup> Mêmè kuumvwa dîyî kampanda, dyumvwika bu mudi ci—ci—cintu kampanda cya bu mwaba utu mikishi misombèle awu. Mbyenze anu aci cyenzeke, mêmè kutangila, bâvwà benda balwa abu, bavwa mbantu bakaji. Nenku bavwa ne bintu bya diikala

dya mâyì a matamba, mvwa mwa kumona anu mpala yabo cyanaana, ne bavwa ne bintu bya diikala dya mâyì a matamba bilaaba mwinshi mwa mêsù abo emu. Ne mêsù abo miine avva menze anu bu maleepakane maye paanyima, mudi bakaji leelu ewu badipenta ku mêsù amu, maleepakane maye paanyima mushindu *ewu*, nenku anu mêsù abo ne mpala. Nenku bavwa benza ne: “Uuh, uuh, uuh, uuh!” Kaa, ekelekele!

<sup>83</sup> Mvwa anu ngeela mbila mikole ne: “Éyì Nzambi, mfwileku luse’s we. Fwaku luse’s, Éyì Nzambi! Udi penyi Wêwè? Bu Wêwè mwa kundekelaku ngaalukila nshaala ne mwoyi, ndi nKulaya ne, nêngììkalè mwânà wa balume mwîmpè.” Mpindyewu, aci ki cintu cimwepele cîmvwà paanyi mwa kwamba. Mpindyewu, Nzambi mmumanye ne, ku Dituku dya Cilumbulwidi, Yéyè neandumbulwishe bwa dîyi adi. Ki cîngààkambà ncycòci aci ne: “Mukalenge Nzambi, lekelaku ngaalukile, nenku nénKulayè ne nêngììkalè mwânà wa balume mwîmpè.”

<sup>84</sup> Kadi paakangaasabo cingoma apu, mêmè’s nkaavwa mwambeku mashimi, mwenzenze bintu pabwîpì ne byônsò bivwaku bya kwenza ebi, cintu anu cimwepele cîndì ngamba... Mbipiciibwe ne mêmè mucitookeshe pâncidì mwaba ewu mpindyewu apa. Nenku pângààkapwekeshà mêsù e kumona ne nkaavwa anu bu bankose bitupa bibidi, pabwîpì ne ciine aci’s, mêmè kwamba ne: “Nzambi, mfwileku luse. S’Ùdi mumanye ne mêmè ewu ncitu mwendeku masandi.” Aci ki cintu cimwepele cîmvwàku mwa kwambilà Nzambi. Ncivwaku mwanji kwikala mwitabe luse Lwende to, ne bintu byônsò ebi. Ndi ngamba anu ne, mvwa mufwanyine kwamba ne: “Ncitu mwanji kwendaku masandi to.”

<sup>85</sup> Ki pashiishe kuyabo naanyi mwômò amu. Ki pa dîbà adi, mu cyôci aci, mêmè kwela lubila ne: “Nzambi, mfwileku luse. Nêngììkalè mwânà wa balume mwîmpè, bu Wêwè anu mwa kundekelaku ngaalukila,” bwalu mvwa mumanye ne kuvwaku anu Nzambi mwaba kampanda. Kadi ndi ngamba ngambilamu ne, mwikalè munyungulukila kudi bifukiibwa bacyokakane abi, mvwa anu muttu uvwabo bafuma ku dyakidila’s. Kadi ne njiyà ya mibi kumona, yitamba kwenzeja bwôwà, ne mibi mu mwaba awu ayi... Byenze bu biimêsù binene menemene, binkofya binene bipatuke mushindu *ewu*, ne bileepakane biye paanyima bu bya kampuuusu, byenze bu biye paanyima nunku *ewu*; ne bintu bya diikala dya mâyì a matamba, byenze bu ne mbidya kudi kamunguji anyi cintu kampanda.

Nenku bavwa—bavwa benza ne: “Uuh, uuh, uuh!” Kaa, njiyà kaayi’s we! Mpindyewu pângààvu...

<sup>86</sup> Pashiishe mu katanci kakese, nkaavwa mwalukile cyakabidi ku mwoyi wa panu ewu. Cintu aci citu cintacishe be. Mêmè kudyambidila ne: “Kaa, kabenzekiku bwa mêmè kuya mu

mwaba bu naka to; bikengela bwa muntu mukwabo nansha umwe kayiku mu mwaba bu naka to.”

<sup>87</sup> Paanyima paa ngondo mwandamatekete, mêmè kupeta cikeena-kumona cya mêmè mwimane mu Wesete aci, mûmvwâ mumone nkuruse wa ngôlò awu mwikale umpwekekela amu. Ki mêmè—mêmè kumanya ne kutu myaba ya beediibwe mulawu mwaba kampanda.

<sup>88</sup> Mpindyewu, ncivwa mutambe kukutumina meeji to too ne mu mbingu mitwe ku inaayi eyi. Mukajaanyi... Ncivwaku mucyélèle meeji mu mushindu ewu to. Kukaadi mbingu mitwe ku inaayi, mêmè ne mukajaanyi tuvwa baye ku Tucson, bwa kuyaku kasumba bintu ku makajiinyi. Kadi patuvwa basòmbe... Mukajaanyi, tuvwa bapweke mu nzubu wa pansi, nenku—nenku muvwa musùmbà wa nsongaalume myenze bu blîumaabikàjì miikale ne nsuki myenze tubulu tubulu, nudi bamanye's, mütù bakaji benza amu, kadi—kadi beeble cisaku bapwekeshile mwalala wa nsuki mu mpala emu, ne bavwale tupanu tukòsela kuulu menemene eku, bu nanku, ngeela meeji ne mbaamuyàpàndì, anyi nî mbanganyi munutu nubabiikila amu. Nenku bavwa muntwamu, ne bantu bônsò bavwa anu kacya baabatangila, ne bavwa ne mitu *mona* bunene, benze bu bakaji batu ne nsuki mikosa “bisuba” aba, nudi bamanye's. Nenku bavwa mwinshi amu.

<sup>89</sup> Ki nsongaakaji mukwabo kulwaye mwaba awu, kwambaye ne: “Nudi nwelaku peenu meeji bishi bwa byôbì abi?”

<sup>90</sup> Mêmè ne: “S'bivwa bikengela wêwè kudyumvwaku bundu, pawikala mwa kwela awu meeji.” Mêmè ne: “Yéyé's udi ne bukenji bwa kucyenza anu bu mûdi peebe naabu amu. Nansha umwe wa kunudi kêna ne bukenji abu to.”

<sup>91</sup> Ki mêmè kubànda ku nzubu wa kuulu, e kusòmbela pansi. Pângâbândi, kuvwa cibandilu cya cinyunguluka mwaba awu, muvwa mmu makajiinyi a J.C. Penney, nenku cibandilu cya cinyunguluka aci ciikale cibànda ne bantu kuulu aku. Ee, kadi ki kungendeshabi ku mwoyi bikole, pa kumona bakaji abu bàbànda kuulu aku; baa batekete, baa bakole, ne baa kabayi bacyuka myanda abu, baa minyengu kwîsù, baa batekete, ne mu mushindu kana wônsò, bavwale tuputulu tukese menemene twípì; mibidi yabo mikooiyike ayi, ne bakaji bavwa bavwale mvwadilu wa disalulangana nende masandi abu, ne mitu minene menemene ayi mushindu awu, kadi ki bôbò bàlwalwà aba. Kadi mukwabo utuuluka ku cibandilu cya cinyunguluka aci, ucifuminaku ku dibànda mushindu awu, mwine mwaba wûmvwâ mêmè musòmbe mudyüpwele mu nkwaswa awu, musòmbe mwaba awu ne mutu wanyi mwinyika.

<sup>92</sup> Ki mêmè kukudimuka e kutangila. Nenku umwe wabo uvwa mubàndile ku cibandilu aku awu uvwa wenda wamba ne: “Uuh,” wakula cyena Espagne, wakula ne mukaji mukwabo.

Ùvwà mmukaji wa batooke mwikale wakula ne mukaji wa beena Espagne awu. Nenku ndi mwenze anu ntangila anyi, [Mwanetu Branham udi utuuta cishonto—Muf.] dyakamwe mêmè kushintuluka. Mwaba awu, nkaavwaku mumone aci kumpala. Mêsù ende awu, s'nuди bamanye mushindu udi bakaji benza mpindyewu awu, badipenta mu mêsù, anu abidi adi panshi aa, mwenze bu kampuuusu, nudi bamanye mudibo bacyenza cibànde mushindu *ewu*, ne muvwale binete bya kampuuusu ne bikwabo byônsò, nudi bamanye's, ne mêsù mabàndisha mushindu *ewu*, ne bintu bya diikala dya mâyì a matamba abi mwinshi mwa mêsù emu. S'ki cyôcì aci cintu cîmvwà mumone pâmvwà mwânà aci. S'ki yêyé mukaji awu anu yêyé menemene. Ki mêmè kushaala mukwacike tukulakaji mubidi mujima ewu, ne kubanga kukenzakana, nenku kuvwa bantu bavwa bu bâdì baakwila mu ménù, nudi bamanye's, biikale baakula bwa mishinga ne bintu bikwabo mu nzubu amu. Nenku ki mêmè . . .

<sup>93</sup> Kwenzabi anu bu ne mêmè kushintuluka mu katanci kekese. Ki mêmè kutangila, mêmè kudyambidila ne: "S'ki cyôcì cîngààkamònà mu iferno aci." Ki bôbò abu mwaba awu, kamunguji aku. Mvwa ndyambidila ne mbwalu bavwa mu iferno ki civwa cibenza mushindu awu, diikala dya mâyì a matamba adi ne bleu mwinshi mwa mêsù. Kadi monaayaaku bakaji abu badipente ne diikala dya mâyì a matamba ne bleu, anu menemene muvwa cikeena-kumona aci cyambe kukaadi bidimu bitwe ku makumi anaayi.

<sup>94</sup> Nwamonu's, kukaadi bidimu bitwe ku makumi anaayi, ki kwakenzekabi. Nkaadi ne bidimu makumi ataanu ne binaayi; mvwa ne bidimu dikumi ne binaayi. Pa nanku kukaadi bidimu bitwe ku makumi anaayi, mêmè . . . Nenku ki—ki . . . Ki nomba nyêyé awu's, twamb'eku twamb'eku, wa dilumbulwisha, nudi numona's. Mpindyewu kuvwa . . .

<sup>95</sup> Mêmè mumane kumona ciine aci nenku nciyiku mufwanyine nansha kwakula ne mukajaanyi paakalwaye to. Yêyé uvwa muye kuntwaku bwa kuteeta bwa kupetela Sarah ne bânà cintu kampanda, nka—nkanzu wa mushindu kampanda anyi cintu kampanda bwa mu kalaasa, ne mêmè—mêmè nciyiku nansha mufwanyine . . . nciyiku mene mufwanyine kwakula nende to. Yêyé ne: "Billy, ncinyi cidi cikutacisha?"

Mêmè ne: "Munanga wanyi, ndi bu . . . Ndi anu bu muntu mufwe."

Ki yêyé ne: "Ncinyi? Udi usaama anyi?"

Mêmè ne: "To. Cintu kampanda ncifume ku dyenzeka."

<sup>96</sup> Mpindyewu yêyé kí mmumanye to. Mmwindile bwa mukaba wa mêtì ewu walukile. Ncitu mwanji kucyambilaku muntu nansha umwe to. Nenku mvwa ngeela meeji ne nênganjì

kwindila, bu mûmvwà mulaye, bwa kwanji kucitwadila ekeleesiya dyambedi. Nwamonu anyi? Kucitwadila ekeleesiya. Ki civwa mulayi wanyi ncyôcì aci. Kadi nenufike ku dyumvwa, paanyima paa dilolo edi, kabingila kadi kenze ne nteete kulama mulayi wanyi. Nwamonu anyi?

<sup>97</sup> Mêmè kwela meeji piine apu, pângààkamònà mêsù avva mamweke bu madya kudi kamunguji a bakaji abu awu. Kuvwa beena Espagne, beena France, ne beena Inde, ne batooke, ne bônsò pamwe, kadi mitu minene menemene ayi, nudi bamanye, ne nsuki mijudila kuulu, ne bisaku abi, mushindu utubo bayisaamuna batuma paanyima awu, minene menemene, ne pashiishe ipatuka. Nudi bamanye, nutu bamanye mutubo bayenza amu, bayiswika mutubo bayenza amu. Ne pashiishe mêsù adi ne mmwenekelu wa madya kudi kamunguji awu, ne mêsù miikale ne tupenta, maleepakane maye paanyima menze bu mêsù a kampusu. Nenku biikale bayikila, nenku ke mêmè ukààvwamù awu cyakabidi, mwimane mu makajiinyi a J.C. Penney amu, mwalukile cyakabidi mu iferno.

<sup>98</sup> Mêmè—mêmè—mêmè kukwacika bwôwà bwa dikema. Mêmè kudyambidila ne: “Mukalenge, ncy a bushuwa ne ncyêna mufwe to, ne ndekeelu wa byônsò Wewè kundekela ngaalu cyakabidi mu ewu mwaba.”

<sup>99</sup> Kadi ki bôbò abu’s, benza... anu mu nyungulukilu amu mushindu awu, byenze bu mu cikeena-kumona, bivwa lutatu lwàbûngì menemene bwa kubyumvwa ne maci, udi umanye’s. Anu dyakwila dya mu ménù ne bivwa byenzeka abi, bya bantu abu abi, ne bakaji abu balwa biikale bàbàndila ku cibandilu cya cinyunguluka aci ne biikale banyungulukila mwaba awu, benza ne: “Uuh, uuh!” S’ki mêsù a diikala dya mâyì a matamba awu mwaba awu, ne a mmwenekelu wa lukutukutu, ne wa wenza mwadi.

<sup>100</sup> Ki mukajaanyi kuvwilapu. Ki mêmè kwamba ne: “Anji ndekelaku kakese, munanga wanyi.” Mêmè ne: “Piikalabi kabiyi bikutacisha to, ndi—ndi—ndi muswe kwalukila kumbelu.”

Ki yêyè ne: “Udi usaama anyi?”

<sup>101</sup> Mêmè ne: “To, tungunuka anu cyanaana, munanga wanyi, piikalabi ne ucidi ne bya disùmba.”

Yêyè ne: “To, nkaadi mujikije.”

<sup>102</sup> Ki mêmè ne: “Enza nkukwateku ku diboko.” Nwamonu anyi? Ki mêmè kupatuka.

Yêyè ne: “Ncinyi’s?”

Mêmè ne: “Meda, ndi—ndi—ndi... Nkwenzeke cintu kampanda mwaba wawa.”

<sup>103</sup> Nenku pâncìvvà mu cyôcì aci apu, ki mêmè kudyambidila nunku: “Mmu dituku kaayi mutudi ne mwoyi emu? Eci

ncifwanyine kwikala Nkokelu Mwisâtù anyi?" Mpindyewu ndi ne ndambu wa bintu bifunda mwaba ewu.

<sup>104</sup> Yesu. Tudi tusangana ne, Yesu, mu mudimu Wende wa bwambi, paanyima paa Yéyè mumane kuyiisha bantu... Mpindyewu netwikale batukine mu Mifundu menemene pa bwalu ebu. Paanyima paa Yesu mumane kujikija mudimu Wende wa bwambi, ne mudimu Wende wa bwambi mubengiibwe kudi bantu. Mpindyewu nubalaayi munkaci mwa milongo, nwâmbè mwenu peenu munudi bamone amu. Vulukaayi cîngânwâmbidì ku ntwadijilu aci. Paanyima paa Yéyè mumane kuyiisha... .

<sup>105</sup> Yéyè wakalwa bu Ewu uvwa mulayiibwe bwa dituku adi. Twêtù bônsò tudi bamanye aci. Mifundu yakamanyisha Yesu Kilisto bu Maasiya. Aci ncya bushuwa. Mu byônsò, bikole menemene, mushindikiibwe kudi Nzambi ne kudi Dîyì Dyende, bwa ne Yéyè nguvwa Maasiya. Kakwenaku cya dikonkoloja to. Muntu yéyè mucyélè mpatà, wêwè mucyélè mpatà, nanku bivwa bikengela wêwè kulwa ku cyoshelu, ne: "Yéyè kavwa Maasiya awu to." Yéyè uvwa mujaadikiibwe bitooke tòò ne m'Maasiya awu. Kadi paanyima paa Yéyè mumane... Nzambi mumane kuMumanyisha bitooke tòò.

<sup>106</sup> Mwakamba Peetelo mu Dituku dya Mpenta, pavwaye wakula ne beena Tubadi twa beena Yuda abu kuntu kwaka, ku anaayi... paanyima paa matuku matwe ku anaayi. Yéyè ne: "Yesu wa mu Nazaleeta, Muntu mwanyishiibwe kudi Nzambi munkaci mwenu ku bimanyinu ne maalu a kukema, bivwa Nzambi mwenze Nende munkaci mwenu, bitudi twêtù bônsò biikale bantemu. Nwamonu anyi? Nwêñu nwangaci, ne ku byanza bya beena Iwonji, nwâpoopèdì Mfumu wa Mwoyi pa nkuruse; udi Nzambi mubiishe ku lufu, ne muleeje patooke bintu binudi numona ebi." Nwamonu anyi? Kilisto ucivwa anu mutungunuke ne kwikala ne mwoyi. Mu bushuwa bwa bwalu, ucidi anu ne mwoyi leelu ewu.

<sup>107</sup> Mpindyewu paanyima paa Yesu mumane kulwa bitooke tòò, wakaDimanyisha, Nzambi wakaMumanyisha, ne Yéyè kwamba ciprofeta. Ne paanyima paa matuku a ciprofeta Cyende, nansha muvwaYe mumanyishiibwe kudi Mifundu amu, bantu baakaMubenga. Aci's ncya bushuwa. Kadi Wakayiisha pashiishe paanyima paa bamane kuMubenga panwapa, biine bàvwà ne mpùngà wa kusungidiibwa abu. Vulukaayi ne, pavwaYe uyiisha apu, kuvwa mushindu wa muntu kana yônsò kusungidiibwaye. Twêtù katwena bamanye ne mbanganyi biine abu to. Mbadi badyànjila kulongolola. Kadi Wakatungunuka anu ne kuyiisha.

<sup>108</sup> Kadi paanyima paa matuku a diyiisha Dyende adi, mudimu Wende wa bwambi wakatungunuka, bwalu musùmbà wa ndekeelu wakayiishaYe uvwa mmisuuka yivwa mu iferno, bavwa kabayi mwa kufwidiiibwa luse to. Ngaabadi cyôci aci bitooke tòò mu Bible mwaba ewu, mu Peetelo Mwibidì. Nwamonu

anyi? Wakaya kayiisha misuuka yivwa mu buloko, budi bwikale iferno, bakangilamu too ne ku Dituku dya Cilumbulwidi.

<sup>109</sup> Bwalu, nudi numona, Cilumbulwidi kî mpindyewu to, ne kakwena iferno wa kapya mpindyewu to. Muntu kampanda ukwambila ne: "Mulumyana awu's udi mu iferno wa kapya patudi twakulangana apa," aci ncyâ mmafi. Nwamonu anyi? Nzaji wa pa buloba ebu udi ne bwakane bukumbane bwa kubenga kupiishaku muntu padiye kayi mwanji kufika ku dilumbulula. Ne Nzambi kaadyakwelaku muntu mu cikutu cya kapya to padiye kayi mwanji kupiishiibwa dyambedi kudi mikenji ya Nzambi Yéyè mwine. Yéyè mmubenge luse, pa nanku, nudi numona's, bikengela änji kupicila ku dilumbulula, ne dilumbulula adi n'Nkwasa Mutooke Munene wa Cilumbulwidi. Kadi mpindyewu yéyè udi usanganyiibwa mu mwaba udi ubiikidiibwa ne nzubu wa buloko.

<sup>110</sup> Bu mûndì mumone cikeena-kumona cya myaba yônsò ibidi ayi, ne ku ngâsà wa Nzambi... Ndi ngamba eci kî mbwa kunyangakaja cijila to, ne, piikalaci kaciyi mu cyôci to, Nzambi amfwileku luse. Ndi ngiitabuuja ne ndi mufike mu myaba yônsò ibidi ayi, nwamonu's, mu myaba yônsò ibidi ayi. Ne ndi mumone bapikula, babeneshiibwe abu; ne ndi mumone bajimine, ne mwaba mwine uwabô basanganyiibwa awu. Nenku ki bwa cinyi ndi mwimane bu mwaneenu, leelu ewu, bwa kunudimwija bwa nwêñù kunyeema kajila kadi kapweka katangile panshi aku. Kanudidingi nwâlondakù awu njila to. Ne nudi ne bintu bilenga byônsò binwîndile bu kabingila ka kwikadila ne mwoyi, njila mubeneshiibwe uyâaya mutangile muulu awu, mûndì bapikula basanganyiibwa mu disanka ne ditalala amu, ne kabayiku mwa kwenzaku mpekaatu to. Kabeena mwa—kabeena mwa kuumvwaku bibatonda to. To. Mwamwa, kamwena cintu nansha cimwe to; mbapwangane. Ndi mumone myaba yônsò ibidi ayi! Ndi mumanye ne adi ndiyì dikole be dya muntu wamba, kadi, bu mudi Nzambi mwikale Mulumbulwishi wanyi, ndi mwitabuuje kakuyi tuseku to ne ndi mumone myaba yônsò ibidi ayi. Ndi—ndi mwitabuuje nanku.

<sup>111</sup> Nenku, kaa, kabyenzekiku bwa muntu nansha yéyè nganyi adidinge akabwele mu myaba ya bajimine ayi to! Bu wêwê mwa kwikala mwimane ne nshinga ya mudilu mikutubule mubidi, mwikale ukengeshiibwa mu mishindu yônsò, kî mbifwanyineku kwikala bu dikengesha dya dyabulu didi mu mwaba wawa dyadya to. Kî nkufwanyineku kwikala cintu nansha cimwe cidi cifwanyine... Meeji a buntu kî mmafwanyineku, meeji a buntu kî mmafwanyineku kuumvwa cidi myaba ya bajimine yaya to. Kakwenaku mushindu wa kubyumvwija to. Ne kakwena mushindu wa kuumvwija cidi myaba ya babeneshiibwe ayi to, ncinene bikole. Wawa naka udi wenza bwôwà bwa dikema, kadi Ewu nunku mmwîmpè wôwò bikole—bikole, nkuumukila

ku cicimbè kuya ku cilenga cya dikema ne dyanyina. Pa nanku piikala muntu unteeleja . . .

<sup>112</sup> Kadi nyewu nkaadi ngenda nshaala mukulakaji. Ncyéna mumanye ne nkunshaadile kabidi matuku bûngì kaayi to. Abidi adi pansi aa ndi nkumbaja bidimu makumi ataanu ne bitaanu. Nenku ncyéna—ncyéna mumanye to, bilondeshile bufuki, bidi mwa kwenzeka ne kakwakadi kunshaadile bidimu bipitepite bûngì to. Ncyéna mumanye kwaya mukaba wa mêtì ewu to. Kadi muntu ne muntu ateeleje, mwaba ewu ne pa mukaba wa mêtì, anyi nî mpenyi pônsò padiwu mwa kuya apu. Kwikadiku wadidina wâya mutangile ku myaba ya bajimine ayi to. Kwêna mwa kudifwanyikijilaku ne iferno utu mubi mushindu wawa to. Nenku nî ncinyi nî ncinyi cyûdì wenza, kudidingiku wângata . . . wâpwa mwoyi bwalu ebu ne, myaba ya babeneshiibwe yaya . . . Ndi muswe kwamba nenku, pamwe ne Pôlò Munsantu ne: “Bìdì dîsù kadiyi dimone, bìdì dici kadiyi dyumvwe, anyi bitu kabiyiku bifwanyine kubwela mu mwoyi wa muntu, bìdì Nzambi mulame mu cibucilu bwa badi baMunange.” Pa nanku imana, pawikala munkaci mwa kuteeleja mukaba wa mêtì ewu, kanga cisanji aci, nenku unyingalale pawikala kuyi musungidiibwe, ne udilongolole kumpala kwa Nzambi.

<sup>113</sup> Ndi ngamba nunku ku didilabwila dya mêmè mwine, bu mûndì ngiitabuuja munda mwa mwoyi wanyi. Ne ndi ngamba ne, piikala byôbì ebi, piikala bikeena-kumona ebi bindinge, Nzambi amfwileku luse bwa dyamba dyanyi dya dîyi bu nanku awu. Kadi ne meeji matooke ônsò munda mwa mwoyi wanyi, mwikale mumanye ne nansha cimwe cya ku bikeena-kumona abi kacituku cipangile to, ndi ngiitabuuja ne mvwa mu myaba yônsò ibidi ayi. Kabyenzekiku ne muntu wetu wa maci ne mêsù ewu akalonde njila udi upweka mutangile pansi awu to!

<sup>114</sup> Mpindyewu, Yesu, paanyima paa Yéyè mumane kujikija mudimu Wende wa bwambi, wakayiisha misuuka ayi yivwa kayiyi mwa kusungidiibwa, yivwa kayiyiku ne mushindu wa kusungidiibwa to. Mpindyewu Bible ngudi utwambilaci awu. “Yéyè wakaya kayiisha misuuka yivwa mu buloko, yivwa kayiyi minyingalale to.” Paakapeebwayi luse, yôyi ayi yakabenga luse alu ku maditambishi, nenku mpindyewu yikaadi mindile Cilumbulwidi. Kaa, aci ciwa mwa kwikala cikondo kaayi’s we! Kaa, ndi njinga bwa kwikaleku mushindu kampanda wa mêmè kunyungisha buloba ne cyôcì aci, bwa kubaleeja cidi bulelela.

<sup>115</sup> Ne Yesu wakamba, Yéyè mwine ne: “Anu mudi Taatù muntume Mêmè, ki mûndì Mêmè paanyi nnutuma.” Nenku anu mwakaMutuma Taatù bwa kuiisha bavwa—bavwa ne mwoyi, aba bavwa ne ditekemena, ne pashiishe kufila Mukenji umweumwe awu kudi bavwa kabayi ne ditekemena, bidi bimweka bikumbanangane, pa dibà edi ne, nebikengele bwa aci cyenzeke, bwalu Nyuma wa Kilisto udi ne mwoyi munda

mwetu awu katu ushintulula ngiikadilu Wende nansha, anyi katu ushintulula ndongolwelu wa Nzambi to. Ùdi ne cya kwikalà umwèumwè awu mu lukongo ne lukongo lwônsò. Ùdi ne cya kwikalà umwèumwè awu. Wâkamba ne: “Anu mudi Taatù muntume Mêmè, ki mûndì Mêmè paanyi nnutuma.”

<sup>116</sup> Midimu ya bwambi yidi ne cya kwikalà yôyì yimweimwe ayi, mu mushindu wa ne Yéyè wakamba... Ndi mmona bakwabo beenu biikale bafunda Mifundu. Yone Munsantu 14.12: “Ewu udi ungiitabuuja Mêmè, byenzedi bindi Mêmè ngenza neàbyénzè pende.” Nwamonu’s, “byenzedi,” kuiyisha bajimine, kwondopa babeedi, ne pashiishe aba badi kabayiku mwa kusungidiibwa. Nwamonu anyi? Mudimu awu wakatungunuka anu mushindu umweumwe awu. Pa nanku, eci ncyenzeke, (eci ncyenzeke anyi?) swayi ncyâmbè mu mushindu ewu ne, mudimu wa bwambi wa Yesu Kilisto mmwandamuke cyakabidi mubidi mu Ekeleesiya Wende mu dituku dya ndekeelu edi. Cyôci aci ncidi bààbûngì beetu biitabuuja. Mêmè ndi ngiitabuuja mumwe neenu. Ndi ngiitabuuja cyôci eci. Mêmè nciyi nciitabuuja to, mvwa mufwanyine kwenza cîngà cintu pa bwalu abu. Bwalu, twamb’eku twamb’eku, mêmè ngudi cyôci eci citangil... udici citangile mwômò emu. Kadi piikala Nyuma wa Nzambi munda mwebe, udi uditacisha bwa bantu.

<sup>117</sup> Kuvwa Mufundu uvwa untacisha mu meeji misangu yônsò, mushindu uvwa Môsà mwa kwambila Nzambi mmwenenu mwîmpè mupite uvwa nende Nzambi, too ne pângààkalwà kujandula ne civwa n’Nyuma wa Kilisto munda mwa Môsà. Nwamonu anyi?

<sup>118</sup> Nzambi wakamba ne: “Môsà, tapuluka naabo. Mêmè nêmbutulè cintu cyônsò nkòdòng, kadi mbange neebe wêwè.”

<sup>119</sup> Yéyè kwamba ne: “Mukalenge!” Kudyelaye pankaci, kwambaye ne: “Ngangâtè mêmè. Kupula dînà dyanyi.” Bwa bantu aba bààkatombokà, mwoyi wende wakabapetela majiya. Nwamonu anyi?

<sup>120</sup> Nenku padi mwambi udi ne bantu pa mwoyi wende... Mmunyi mûndiku mufwanyine kudyumvwa mubingishiibwe ku... kumpala kwa Nzambi, ne kwanyi mêmè mwine, pa kulaminyina cintu kudi cisamba cyûdì munange kutamba mûndì mudinange wêwè mwine. Mmunyi mudi muntu mufwanyine kubweja muntu mu ekeleesiya ku dimulabula dya ku cyanza, anyi ku dimumyamina kampanda dya mâyi, anyi ku dibatiiza kampanda dya mashimi, anyi cintu kampanda, kadi kumulekela ushaala mu—mu bwenzeji bwa mashimi kampanda pende mumanye ne Bible mmuteeka mwaba awu, kadi kwamba mudiye munange muntu awu?

<sup>121</sup> Nansha byôbi ne bidi bikengela ngiikale ndombangana kaa pa luse bwa mêmè kudya, nansha nî ncinyi, ngiikale anu ne meeji matooke kumpala kwa Nzambi ne kwa bantu, bwa

kubambila Bulelala. Nciikadiku museeswishanganyi nansha. Mmunyi mündì mwa kuseeswisha biine bândì munange? Nansha byôbì bikengela bwa mbâtâpe ku mwoyi, kadi ndi mubanange. Ki bwa cinyi udi wela mwanebe mfimbu kumfundu, mbwalu udi mumunange. Kî mbwa ne mbwalu kwêna mumuswe to; mbwalu udi mumunange. Padiye mupiile, neakadishipeeshe pawikala kuyi umulongolola to.

<sup>122</sup> Mpindyewu, ki mudi kabidi mudimu wa bwambi ewu mwenzeke. Anu mwakadibi amu, ki mudibi kabidi leelu. Mmuyishiibwe, ne mushindikiibwe wônsò nkòòng kudi Dîyì dya Nzambi ne, kî ncifwanyine kwikalà muntu to, cidi ne cya kwikalà Nzambi. Ki mudibi ne cya kwikalà. Monaayi, bimanyinu bya nyuma bimwebimwe byàkenzà Yesu abi, mbyenzeke cyakabidi pa buloba mu matuku a ndekeelu. Cimanyinu cya nyuma cimwecimwe ciine cyakaDimanyishilaYe naaci bu Maasiya aci, nciMumanyishe leelu ewu. Yéyè ucidi anu Maasiya! Bimanyinu bimwebimwe bya mu mubidi abi mbimweneke pa buloba, bya bwena byàkamwènekà kudiYe abi, civwaYe aci. Dikunji dya Kapya dimwedimwe dimwenebo kudi Pôlò Munsantu adi, Dyôdì dimwedimwe adi, cyônsò aci ncyenzeke cyakabidi ne ngiikadilu umwèumwè awu mu cyôcì, ciikale cyenza cintu cimwecimwe aci.

<sup>123</sup> Yesu wakajikula wamba ne Yéyè kavwaku wenza cintu nansha cimwe to pavwa Taatù kayi muMuleeje. Ne Taatù udi Nyuma Mwîmpè, cyôcì aci ki citudi bamanye. Cidi anu mmudimu kampanda wa Nzambi. Piikalaci kaciyi nanku to, nganyi wa kudibo pa dîbâ adi udi Tatwèndè wa Yesu Kilisto? Yesu wakamba ne Nzambi nguvwa Tatw'Èndè, ne Bible mmwambe ne Nyuma Mwîmpè uvwa Tatw'Èndè. Mpindyewu, kanwena mwa kuMuvwija mwânà wa mu masandi to, pa nanku's Nyuma Mwîmpè n'Nzambi, pa nanku's Yesu uvwa Nzambi. Pa nanku, Nzambi, Taatù, Mwânà, ne Nyuma Mwîmpè mmumwe ne... Cidi... Ayi mmidimu isatu ya Nzambi umwepele. Mbyambiibwa bisatu, Nzambi umwèumwè awu.

<sup>124</sup> Wêwè udi citupa cya Nzambi, ne mêmè ndi citupa cya Nzambi, nwamonou's; kadi mêmè ncyêna Nzambi mu kaabujima to, nansha wêwè kwêna Nzambi mu kaabujima to. Nwamonou anyi? Nwamonou anyi? Mbyambiibwa bya Nzambi pa twêtù, bu bânà bateekiibwe kudi Yesu Kilisto. Bidi ne, Nzambi Yéyè mwine ngwâkalwa mubidi, bwa kutufwila.

<sup>125</sup> Mpindyewu, Nyuma Mwîmpè nguvwa misangu yônsò uMuleeja maalu acivwa alwa, ne Yéyè kavwaku utupakana to. Bivwa anu bipwangane. Ncya bushuwa anyi? Yéyè kavwaku udyangacila Yéyè mwine luumu to. Ùvwa upa anu Nzambi luumu. Wakamba ne: "Mwânà kêna mwa kwenza cintu nansha cimwe mu Yéyè to anu cidiYe umona Taatu wenza aci." Nenku Taatù, Nyuma Mwîmpè, nguvwa Tatw'Èndè. Ncya bushuwa

anyi? “Yozefu, wêwè mwânà wa Davidi, kuciinyi bwa kwangata Mariya mukajeebe pamwe neebe to, bwalu Üdi mwimiciibwe munda mwende awu ngwa kudi Nyuma Mwîmpè,” ki uvwa Tatw’Èndè. Ne Nyuma Mwîmpè nguvwa uleeja Yesu maalu acivwa alwa, uMwambila maalu awwaku.

<sup>126</sup> Ne Yéyè uvwa Muprofeta-Nzambi. Bwalu, Dîyì dya Mukalenge ditu dilwa anu kudi muprofeta; biikale bileeja ne Méyi avwa alwa, mu mmwenekelu wa mu bukese, baprofeta biikale bafunda bivwa Mukalenge ubambilila abi. Kadi Yéyè kaakafunda cintu nansha cimwe to, bwalu Yéyè nguvwa Dîyì. Yéyè nguvwa Dîyì.

<sup>127</sup> Monaayaaku, Nyuma Mwîmpè umwèumwè uvwa musòmbèle munda Mwende awu: “Mu mutanci mukese, baa pa buloba kabaakuMmona kabidi to; kadi nwêñu nenuMmone, bwalu Nêngìkalè neenu, munda mwenu mene, too ne ku nshiikidilu kwa buloba. Mêmè nêndwe kunudi,” mwakambaYe. “Mêmè” awu, uvwa n’Taatù uvwa munda Mwende, “wâlwa kunudi awu.” Ki Yéyè kwamba ne: “Paalwa Nyuma Mwîmpè pambidi peenu, Neabuulule maalu ângänùlongèshì Mêmè aa, ne neanuleeje maalu acivwawwa.” S’ki bwalu abu mpindyewu.

<sup>128</sup> Mpindyewu tudi tumona ne, anu muvwa Nyuma Mwîmpè mukwate mudimu mu Ekeleesiya musangu awu amu, ki mudi Nyuma Mwîmpè kabidi mwenze menemene anu bantu bimwebimwe abi leelu ewu; umanyisha ku Dikunji dya Kapya, anu menemene muvwabi ku cibangidilu, cintu cimwecimwe aci. Ne paakamonaye eci cilwa pa Yesu, Yone wakacimanyisha ku musulu wa Yadene. Ne ncijaadike bantu byônsò, nansha fôtô yaci ya ku maalu a mamanya. Kacyena mwa kwikalà cya dikokangana to. Civwa cya ku maalu a mamanya. Civwa cya balenga ne byanza. Kacivwa meeji kampanda a bantu bikwatakaja to. Kacivwa cintu cya mu meeji to. Bu mwakamba George J. Lacy ne: “Dísù dya cyamu cya fôtô kadyakukwataku cintu cya mu meeji to. M’Bukénkè budi butuute ku lumwenu lwa dísù dya cyamu cya fôtô.”

<sup>129</sup> Kadi twâmbè bishi bwenu nwêñu, ekeleesiya, badi kukaadi ngondo isambombo anyi mwandamukulu kaaba aka, ne mêmè mwimane kaaba aka, ngamba ne: “Cidi EMU MMUDI MUKALENGE WAMBA ne, nyaaya ku Tucson, Arizona. Nekwenzeke dikubakuba, ne Banjelo mwandamutekete nebamweneke.” Nudi bavuluke anyi? [Disangisha didi dyamba ne: “Amen.”—Muf.] Kakuyi nansha...Nzambi kubivwija anu bya bushuwa menemene mu mushindu wa ne cikandakanda cya *Look* kucikwata maafôtô. Cya mu nyuma, cidyanjila kumona, kudivwijaci cya balenga ne byanza anu cimwecimwe aci menemene, Banjelo mwandamutekete, biine baakatwala cishindaayi cya Mifundu yônsò abu. Bwalu, maalu masokoka ônsò a Bible yônsò nkòòng adi asanganyiibwa mu Bitampi

Mwandamutekete. Tudi bamanye ne Aci ki—ki Mukanda, citampi cyaWu, ne Aci ciikale cyabanya bikumbanangane. Ki bwalu busokoka bwa Mukanda wônsò nkòòng mbwôbò abu, bwikale busanganyiibwa mu Bitampi Mwandamutekete abi, bidi Mukalenge mutupe dyanyisha dya kubutwala.

<sup>130</sup> Ne kudi bantu basòmbe kaaba aka, leelu ewu, bavwa naanyi mwine mwaba awu pavwaci cyenzeke. Cikandakanda cya *Look* ncijaadike cintu cimwecimwe aci, bwa ne cyôcì aci—cyôcì aci ncyenzeke cya bushuwa. Bwalu, Awu n’Nzambi uvwa mucyâmbè. Civwa n’Nzambi udi wimana paanyima paa Dîyì Dyende, bwa kuDyenza padiYe wamba ne Yéyè neàcyéñzè. Ki bwa cinyi, kî mmuntu kampanda nansha, muntu wa musunya bu mêmè, udi munkaci mwenu ewu. Awu n’Nzambi wa Cyendeleele.

<sup>131</sup> Yéyè utu ukwata mudimu ne bantu. Aci ncyea bushuwa. Katu wenza cintu nansha cimwe pa kuumusha cidiYe wenza ne bantu to. Tudi bamanye aci. Yéyè, ki Cyende—ki Cyende cyamu cya mudimu. Ki cidiYe musungule. Bwa cinyi, ncyêna mumanye to. S’Ùvwa anu mwa kwikala mwenze bwa dîbà kuyiishadi Evanjeeliyo. S’Ùvwa anu mwa kwikala mwenze bwa lupeepele kuyiishalu Evanjeeliyo. S’Ùvwa anu mwa kwikala mwenze bwa lupeepele kwenzalu bintu kampanda, kadi Yéyè mmusungule bantu.

<sup>132</sup> Ki civwa Wende mmwenenu ncyôcì aci, wa ne muntu wakula ne muntu nende; kayi yéyè nkaayende to, kadi: “Dîyì dya Mukalenge divwa dilwa kudi baprofeta,” bambi baa biprofeta, bayiishi. Ne mwambi wa biprofeta mwikale uvila Dîyì dya ku cibangidilu, mmunyi mudiye mwa kwikala muprofeta mulelela? Nwamonu anyi? Kêna mwa kwikala yéyè awu to, bwalu udi uvila Bulelela bwa Dîyì. Ne pashiishe piikala aci kaciyi cyenza nanku to, nenku Dîyì edi, Dyôdì diine, mushindu udiDi diyishiibwe ku bulelela bwa Dîyì ne ku bulelela bwa Nyuma Mwîmpè, neDimweneshe mulayi wônsò wakalayaDi. Ki mutudi tumanya ne ncyea bushuwa anyi kî ncyea bushuwa. Ki cyakamba Yesu ne: “Piikalabi ne Neyéna ngenza cyakafundabo ne Mêmè nêngéñzè, nenku kanuNgiitabuji to.” Nwamonu anyi? Mpindyewu tudi tumona bintu ebi.

<sup>133</sup> Vulukaayi ne, Bitampi Mwandamutekete byakajika, ne pavwa Malelela mwandamutekete masokolola awu . . .

<sup>134</sup> Bumwe bwa ku ôwò awu, Yéyè kaakatwanyishila bwa twêtù kubumanya to. Tudi . . . Mbanganyi bavwa mwab’ewu dîbà dya Bitampi Mwandamutekete, ne bààkatèèlejà? Nwénù bônsò, ngeela meeji. Nwamonu’s, Citampi cya—cya Mwandamutekete, Yéyè kaakaswa kutwanyishilaci nansha.

<sup>135</sup> KwimanaYe mwaba awu mu cibambalu ne kubibuulula ku cimwe ku cimwe. Ne piikalabi ne kacya bandela nkaadiku muyiishe cintu kampanda, cya cisonsola, civwa ncyôcì aci. Nenku civwa ne cya kwikala cilelela, bwenu nwénù. Mwimane

mwaba ewu nnwambila ne ncyenzeke, ne nya buludi kwaka, ne maalu a mamanya miine ne bikwabo byônsò, dikebulula dya mu maalu a mamanya ne bikwabo byônsò, bwalu busokoka kudi bantu, kujaadikabi ne ncyenzeke mwaba wawa mene. Kadi kwalukila e kuteleje mudici civunguludiibwa, ne kuvwija Dîyì dyônsò anu dilelala menemene. Mmu dituku kaayi mutudi ne mwoyi emu? Tukaadi penyi?

<sup>136</sup> Nenku vulukaayi ne, mu Citampi Ciisambombo amu, mwômò amu, Mpungi yônsò Mwandamutekete yidi yidila mwinshi mwa Citampi Ciisambombo aci. Patwafika ku cyôcì aci, nencimone. Mpungi ne mpungi (mwandamutekete) mmudile mu Citampi Ciisambombo aci.

<sup>137</sup> Mwandamutekete awu utu misangu yônsò anu bwalu busokoka. Tangilaayi mwandamutekete awu, s'ki dijikija. Civwa n'Dilwa dya Mukalenge. Dyulu divwa dishaale dipuwe, mu cinyaanya, kampanda nansha umwe kaakanyungaku to. Bwalu, Yesu wakamba Yêyè mwine ne: "Nansha mene Mwanjelo wa mu Dyulu kî mmumanye dîbà dîNgâàpinganà to. Ncyéna nansha mudimanye, Mêmè mwine, ne ndîbà kaayi to. Taatù mmuteeke aci mu meeji Ende." Nzambi nkaayende ngudi mudimanye, Nyuma. Wakamba ne: "Ncivwa mudimanye to." Nanku, kadyakabuuludiibwa to. Mpungi wa Mwandamutekete awu paakadilaye... anyi Mwanjelo wa Mwandamutekete awu, ci—Citampi cyakakangudiibwa, pa dîbà adi kuvwa cinyaanya mu Dyulu. Nwamonu's, kacyakeediibwa patooke to, ciine civwa mwa kwenzekwa aci.

<sup>138</sup> Kadi mwinshi mwa Citampi Ciisambombo, muvwa Mpungi eyi mikangudiibwe amu, vulukaayi ne, mwinshi amu, tudi tusangana ne Mwânà wa mukooko wakaseemena, wakamweneka mu cyalu. Ùvwa mushiye Nkwasa wa Ngâssà. Mudimu Wende wa bupikudi uvwa mujike. Nenku Wakalwa e kwangata Mukanda mu cyanza cya dyabalume cya Ewu uvwa musòmbe pa Nkwasa wa butumbi, ne "kakucivwa kabidi cikondo to." Ne dyakamwe mwanjelo kumwenekaye mu nshapita wa mwandamutekete, anyi mu nshapita wa 10 ku mvensa wa 7, wamba... Mwanjelo ewu wakatuuluka ne wakadicipa, ne, "kakucivwa kabidi cikondo to."

<sup>139</sup> Kadi, nudi numona's, mu Mukanda ewu mmuvwa bivwa bipikudiibwe. Ùvwa m'Mukanda wa Bupikudi. Nenku cintu cyônsò cyakapikulaYe civwa cifundiibwe mu Mukanda awu. Cyônsò cyakafwilaYe civwa cifundiibwe mu Mukanda awu, ne Yêyè kavwa mwa kushiya Nkwasa Wende wa butwangaji to anu pavwaYe mwa kwikala mupikule kantu ne kantu. Ne Yêyè kavwa mwa kucipikwila ku nkuruse to, bwalu bakaavwa badyànjila kulongolola mu Mukanda wa Mwoyi wa Mwânà wa mukooko, nenku bivwa bikengela kushaalaYe Pôpô apu bwa

kwenza dyakwilangana too ne pavwa bwalu bwa muntu wa ndekeelu awu ne cya kujika. Butumbi's we!

<sup>140</sup> Kadi dîngà dituku WakajuukaPu, wakaseemena. Mukanda awu uvwa penyi? Ùcìvwa anu kudi Mwenawu mulelela awu, Nzambi wa Bukole bwônsò. Ki Yone kukenzakana, e kwasaye mwadi, bwalu kakuvwa muntu nansha umwe uvwa mukumbanyine nansha bwa kutangila pa Mukanda to, ne nangananga, bwa kukangula Bitampi, bwa kubuulula civwa bwalu busokoka abu.

<sup>141</sup> Maalu masokoka avwa mu Bitampi Mwandamutekete. Paakakangudiibwa Bitampi Mwandamutekete ebi, aci kadi kukangulaci Bible yônsò nkòòng. Bitampi Mwandamutekete's; Ùvwa mukangiibwe ne Maalu masokoka Mwandamutekete, ne mu Bitampi Mwandamutekete emu mmuvwa mulama bwalu busokoka bwônsò nkòòng bwa Cyôci aci. Nenku ùvwa m'Mukanda wa Bupikudi, Dipungila Dipyadipya.

<sup>142</sup> Kì n'Dikulukulu to. Adi divwa anu dyàmba cyanaana bwa Dipungila Dipyadipya. "Baakavwijiibwa...kabeena mwa kuvwijiibwa bapwangane twêtù katuyiku to," Ebelu 11. Nwamonu anyi? Nwamonu anyi? Mpindyewu, bupikudi bwakalwa anu paakafwa Mupikudi. Nenku bôbò bavwa mu mushindu mushaadile mwinshi mwa mashi a bânà baa mikooko, kâyi a Mupikudi to; kabavwa banji kupikudiibwa to, too ne paakalwa Mupikudi.

<sup>143</sup> Monaayaaku mpindyewu dîbà divwa Mupikudi ewu... Yone wakakenzakana, ki Nzambi ewu musòmbe pa Nkwasa wa butumbi, ne Mukanda mu cyanza Cyende, ùvvà mukanga ne Bitampi Mwandamutekete, ne bulongolodi bwônsò nkòòng bwa bupikudi bwikaleMu.

<sup>144</sup> Ne Ùvwa mujimijiibwe kudi bukwabantu, Adama. Ne Nzambi...Wôwò awu wakaalukila e kuya penyi? Sataana kavwa mwa kuWangata to; yêyè wakamujimijiaWu cyanaana. Kadi Mukanda awu wakaya penyi pa dîbà adi? Kawuvva wa bukwabantu to. Mabenesha kaàvwa a panwapa to; panwapa bukwabantu buvwa buWujimije. Pa nanku Wôwò kwalukila buludi kudi MwenaWu wa ku cibangidilu, uvwa Nzambi awu.

<sup>145</sup> Ki Yéyè ewu musòmbe naaWu, ne Yéyè kubiikila muntu, muntu kampanda, bwa kulwa kuWunana.

<sup>146</sup> Yone kukenzakanaye, kadi kakuyi muntu nansha umwepele mu Dyulu, kakuyi muntu nansha umwepele pa buloba, muntu nansha umwe, Mwanjelo nansha umwe, cintu nansha cimwe kaciyi mwa kwangata Mukanda anyi kutuula Bitampi, anyi mene kuWutangila to. Muntu nansha umwe kavwa mukumbanyine to. Yone mmwambe ne wakadila bujindajinda.

<sup>147</sup> Pa dîbâ adi Mwanjelo kampanda kulwaye kudiye, kwamba ne: “Kudidi to, Yone, bwalu Ntambwe wa cisamba cya Yuda wâcimunu, ne Yêyè ngudi mukumbanyine.”

<sup>148</sup> Ki Yone kutangila bwa kumona mwânà wa mukooko... anyi bwa kumona ntambwe, kadi wakasangana cinyi? Mwânà wa mukooko, mwine awu uvwa Mwânà wa mukooko wa umata Mashì, Mwânà wa mukooko uvwa mushipa. Kacya ku dîbâ kaayi? Kacya ku difuka dya dyulu ne buloba.

<sup>149</sup> Mwânà wa mukooko awu wakaseemena, kuya tamakatamaka too ne kudi Ewu uvwa ne Mukanda mu cyanza Cyende cya dyabalume awu, ne kwangata Mukanda awu; kubânda pa Nkwasa wa butumbi e kusòmba. Kwâjikì. Ki kujikaku (dîbâ kaayi?) paakabuuludiibwa Bitampi. Dîbâ divwa cya ndekeelu, abi bivwa mbyônsò bivwaYe mupikule, kakuvva cintu nansha cimwe...

Wakalwa bwa kupikula.

<sup>150</sup> Wêwè udi wamba ne: “Bwa cinyi Yêyè kî mmubapikule kukaadi bidimu makumi anaayi? Kukaadi bidimu binunu bibidi?”

<sup>151</sup> Nwamonu’s, ménâ abo adi mu Mukanda wa Mwoyi, mu Mukanda awu. Nenku bivwa bikengela kwikalaye mwimane mwaba ewu, bwalu civwa nkipacila kaa Nzambi bwa kubapikula. Ménâ abo akaavwa mamana kufunda mu Mukanda wa Mwoyi wa Mwânà wa mukooko kumpala kwa difuka dya dyulu ne buloba. Mwânà wa mukooko uvwa mufundiibwemu pamwe naaci, bwa kushipiibwa. Ki Mwânà wa mukooko ulwàlwa ewu, pakaavwaye mushipiibwe, mwalukile bwa kwenza dyakwilangana.

<sup>152</sup> Mutangilaayi! Nekwikale ditentula bûngì cyanaana, bintu bikwabo byônsò bûngì cyanaana, kadi bulelela kùvvwakù anu muntu kampanda uvwa ne cya kusungidiibwa, bwalu Yêyè... Ekeleesiya uvwa mudyanjila kulongolola bwa kwikalayi ne katoba anyi mufudi. Neikaleku. Ne Mwânà wa mukooko wakafwa mbwa kiine kiipacila aku. Nenku paakapikudiibwa dînà dya ndekeelu mu Mukanda awu, Mwânà wa mukooko wakaseemena ne wakangata Mukanda ne: “Mêmè ng’Wâkacyenza!”

<sup>153</sup> Banjelo, Bakeluba, Bakulu makumi abidi ne banaayi, Nyama, bintu byônsò, baakakopola bifulu byabo bya butumbi, baakapona panshi kumpala kwa Nkwasa wa butumbi, ne baakamba ne: “Udi mukumbanyine ng’Wêwè!”

<sup>154</sup> Yone mmwambe ne: “Bintu byônsò mu Dyulu ne pa buloba byakangumvwa ngeela lubila ne: ‘Amen,’ ngeela lubila lukole ne: ‘Aleluuyah,’ ne butumbi kudi Nzambi.” Lubila lukole alu Iwakabanda. Bwa cinyi? Ménâ abo avwa mu Mukanda

awu, bwa kubuuludiibwawu, ne Mwânà wa mukooko nguvwa mucibuulule.

<sup>155</sup> Mwânà wa mukooko nguvwa mucipikule, kadi Yéyè kavwa mwa kuseemena pavwa dînà dyônsò kadiyi dibuuludiibwe to, ne ciine aci civwa cyenzekela mwinshi mwa Citampi Ciisambombo, kumpala kwa cya Mwandamutekete kubwayikaci. Pashiishe bavwa kabayi katoba... Pashiishe Mwânà wa mukooko kulwaye bwa aba bakaavwaYe mupikule. Kulwaye bwa kunana cikaavwaYe mupikule. Ukaadi naaci, mu Mukanda emu mene, Wukaavwaye mwangata mu cyanza Cyende awu. Mpindyewu Ukaadi ulwa bwa kwangata cidiYe mupikule. Ki mudimu Wende ngwôwò awu. Wâwénji. Walu bwa kucyangata. Kaa, dîbà kaayi—kaayi's we! Wâcijaadìkì, Citampi cya Mwandamutekete ncicijaadike. KwalukilaYe e kwangata Mukanda wa Bupikudi!

<sup>156</sup> Monaayi, Mukenji wa mwanjelo wa mwandamutekete nguvwa ne cya kubuulula cya mwandamutekete aci, Bitampi Mwandamutekete. Bwakabuulwibwa 10.7, mpindyewu, nencipete. Nwamonu anyi?

<sup>157</sup> “Ne wakamona Mwanjelo ewu utuuluka, uteeka dikàsà Dyende pa buloba bûme ne pa mbû,” awu uvwa n’Kilisto, “mwikale ne mwanzankongolo kumutu Kwende.” Monaayi Yéyè awu, nenuMupete mu Bwakabuulwibwa 1, cyakabidi, “mwikale ne mwanzankongolo kumutu Kwende; umweneka bu jaspe ne sardoine,” ne bikwabo. Ki Yéyè ulwàlwa ewu, ùtèèka cyanza cimwe... “Dikàsà dimwe pa buloba bûme, dikwabo pa mâyì; wela cyanza Cyende muulu. Ùvwa ne mwanzankongolo kumutu Kwende,” too ne piine apu. Aci ncipungidi. Ùvwa m’Mwanjelo wa Cipungidi, uvwa Kilisto; muvwijibwe ndambu kwinshi kwa Banjelo, bwa kukenga. Ki Yéyè ulwàlwa wawa: “Ki kujuulaye byanza Byende kubitangija mu Dyulu, ne kudicipaye mu dînà dya Ewu udi ne mwoyi kashidi ne kashidi,” Wa Cyendeleele awu, Taatù, Nzambi, “ne kakwakwikala kabidi cikondo nansha,” piikala cyôcì eci mwa kwenzeka. Cyajiki. Cyamanyi kujika. Cyajiki.

<sup>158</sup> Ne pashiishe Mufundu udi wamba ne: “Kadi dîbà dya—dîbà dya Mukenji wa mwanjelo wa mwandamutekete wa pa buloba,” musanjeela pa buloba, Cikondo cya Ekeleesiya cya mwandamutekete ne cya ndekeelu, “ku ntwidijilu kwa mudimu wende wa bwambi,” pakaadiwu ubanga pa buloba, pa diine dîbà adi, “bwalu busokoka bwa Nzambi, bwa Bitampi Mwandamutekete ebi, buvwa ne cya kumanyishiibwa pa dîbà adi.” Mpindyewu tudi tumona mwaba utukaadi. Ncifwanyine kwikalà cyôcì aci anyi’s, nwêñù balunda, ncifwanyine kwikalà cyôdì aci anyi? Monaayi, byônsò bidi mwa kwenzeka’s.

<sup>159</sup> Cyônsò cìvwà cipikudiibwe mu Mukanda amu aci, Wâseemènyì bwa bupikudi. Cyônsò cìvwà cikengela kupikula cìvwà mu Mukanda amu, cidyanjila kulongolola kumpala kwa

difuka dya dyulu ne buloba. M'Mulwe bwa kuCipikula. Cyônsò cikaavwà cipikudiibwe ciwwà cifundamù aci.

<sup>160</sup> Ndi muswe kunwelaku lukonko mpindyewu. Ne nwêñù badi pa mukaba wa mèyì abu, teelajaayi ne ntéma. Mèñù àvwà enza bwôwà awu, mutu ùvwà wenza bwôwà awu, ncifwanyine kwikalà ne mbwa bwalu ebu budi Mukenji ewu mmulwishangane bikole ne bakaji baa cikondo cya bwena leelu eci anyi? Eci ncifwanyine kwikalà Mukenji wa mwanjelo wa ndekeelu awu anyi? CyakambaYe ku musulu kwaka ncinyi, kukaadi bidimu bitwe ku makumi asatu ne bisatu? "Anu muvwa Yone mutumiibwe," nwamonu's, "bwa kumanyisha dilwa dya kumpala dya Kilisto, Mukenji webe ki wamanyisha Dilwa diibidì." Pa buloba bujima, ne ki cidiwu mwenze, pa nanku Dilwaadi didi ne cya kwikalà diikadi pabwîpi. Tangilaayi numone cidi cyènzekà mpindyewu.

<sup>161</sup> Bwa cinyi? Mêmè kudikoonya ku mutu. Mêmè kubungulukila pa musaamu wanyi. Mêmè kwende ngâtwà eku ngâtwà eku mu cibambalu. "Mbwalu kaayi neebé?"

<sup>162</sup> Kukaadi matuku ndambu, mvwa mwele bantu babidi batuvwa naabo mu mashinyi lukonko. Nkaavwa mulwélè Jack Moore musangu kampanda. Ne nwêñù bônsò aba nudi bamanye Mwaneetu Jack Moore. Nyaya kudiye mu Shreveport. Mêmè kwamba ne: "Mwaneetu Jack, wêwè ewu utu kündì bu mulunda wa pa mwoyi ûnkaadìku nende pa buloba apa." Kadi kumpala kwa mêmè kumwela yéyè lwine lukonko alu, mvwa mwanji kulwela mukajaanyi.

<sup>163</sup> Ne kudiku muntu udi mumanye bwalu bwanyi, anyi mapanga ne—ne byônsò, mmukajaanyi, nwamonu's, muntu munanga. Ki dingà dituku mêmè kumwambila, ne: "Munanga wanyi, mêmè bu bayeebe, nyewu ndi mwambi wa Evanjeeliyo. Ncyéna muswe kwelaku bundu kampanda pa Ewu ûndì munange nansha. To. Ncyéna muswe kukutapa wêwè ku mwoyi to. Ncyénàku mwa kuswa bwa kukwela bundu pambidi to. Nzambi énzèku ne ncyenji kantu nansha kamwe kadi kafwanyine kukwenzela bibi to. Kadi nêngambè bishi bwa cidi cifwanyine kwenzela Nzambi bibi, mushindu mwine wûndì muMunange ewu! Wêwè udi mukajaanyi; Yéyè m'Musungidi wanyi ne Nzambi wanyi. Ndi muswe nkweleku lukonko. Kudyanganyiku mukana to. Ungamble bulelala." Mêmè kwamba ne: "Ntu mulonge bikole . . ."

<sup>164</sup> Nenku nkaadi mudikonkekone. Ndi, mêmè—mêmè ndi muntu mwenza, wa kàyi dyumvwa, wa pabwende. Bwa aci kaayi ndi mumanye. Bantu bônsò batu bambambe ne: "Ewu muntu's ngwa mushindu!" Ee, nwamonu's, kwêna mwa kudyenza wêwè mwine to. Udi anu cyûdi aci, nku ngâsà wa Nzambi.

<sup>165</sup> Ki mêmè—mêmè—mêmè kwamba ne: "Ndi mujimijeku lungenyi ndambu anyi, udi mumanye's, ne—ne mwenzeku bu

mutu munnyunguluke anyi?” Mêmè ne: “Cîndì anu mpiishila bakaji baba ncinyi, ku musangu ne ku musangu, kadi paanyi mubanange?”

<sup>166</sup> Batu bambiikila, bangambambe mündì “mukinyi wa bantu bakaji,” mêmè paanyi nciyi mukineku... Ne ndi anu “nkina bantu bakaji.” Nwamonu anyi? Aci ncy a mafi. Mêmè ntu munange bantu bakaji, ndì nswa kwamba ne, bu bânà beetu baa bakaji.

<sup>167</sup> Ncyakukutuuta cyanza paanyima to, pândì mumone ne udi mupiile. Aci ndi mwa kukwambila. Ndi mukunange bikole be nciyi mwa kukulekela mu dipilla to. Bamwe bantu badi bafwanyine kwenza aci abu, adi ndinanga dya mushindu mushiilangane. Wamonu anyi? Ndi mukunange bwalu ndi munange cyûdì aci; udi mukwacishi wa mwânà wa balume kampanda wa Nzambi, ne udi citupa cyende. Wamonu anyi? Ne ndi—ndi mukunange bwalu—bwalu udi mwenjibwe ku cimfwanyi cya mulume, ne mulume pende mwenjibwe ku cimfwanyi cya Nzambi, ne bwa bwalu abu, nwêñù bônsò pamwe, nudi umwe mu Kilisto. Ki bwa cinyi ndi mukunange. Cîngâ cintu, nansha cya bishi, cidi cyanàànà. Nzambi mmumanye nanku, mu nsòmbelu wanyi mujima. Wamonu anyi? Ncy bushuwa. Ndi mukunange. Bwa cinyi bûndì mufwanyine kujuuka ne ku musangu ne ku musangu... .

<sup>168</sup> Padibo bamba ne: “Ambilaayi bakaji bônsò, dîbâ didibo, piikalabo mwa kulwa kuteleja Mwaneetu Branham uyiisha, basaamune nsuki yabo mushindu mushiilangane. Bâsè cifulu anyi cintu kampanda anyi cintu kansanga, bwalu yêyè neabange kutonoka bwa nsuki mîpi, ne twenu... Kanudilaabi bilaabu bya kwîsù to nansha bya bishi,” ne bikwabo bya mushindu awu. Aci’s ncikaadibo benzenze. “Byônsò bivwaye wamba!”

<sup>169</sup> Muntu mukwabo wakamba ne: “Bwa cinyi kuyiku...” Yêyè ne: “Bantu batu bakwitabuuje ne udi muprofeta. Bwa cinyi kuyiku ulongesha bakaji mushindu wa kupetabo mapà manene a nyuma, ne bintu bya mushindu awu, pamutu paa kukeba bwa kubalongesha bintu bu abi?”

<sup>170</sup> Mêmè kwamba ne: “Piikalabo kabayi baswe kulonga ABC, nebamanye makumi makole mushindu kaayi?” Nwamonu anyi? Anji kudilongolola, kumpalampala.

<sup>171</sup> Kadi nyewu pândì ntamba kuyiisha, maalu paawu atamba kunyanguka. Pashiishe ki nwêñù kwamba ne: “Bwa cinyi kwêna ulekela?” To, mukalenge. Bikengela kwikale dîyi kampanda, ntemu kampanda udi ubikandameena.

<sup>172</sup> Umwe wa ku bantu banene mu mudimu wa bwambi leelu ewu, mmuntentekele byanza anu abidi adi pansha aa, wamba ne: “Ndi muswe nkusambilileku, Mwaneetu Branham, bu wêwê mwa kucingeitabila, bwa Nzambi akuumusheku cintu aci mu

mwoyi webe amu.” Yéyè ne: “Lekela kwókò bakaji abu kwabo kwa tálàlà, mu biine bintu abi’s.”

<sup>173</sup> Mêmè kwamba, mêmè kwamba ne: “Udi witabuuja aci anyi, mukalenge? Peebe wêwè ewu’s udi muyiishi wa cijila.”

<sup>174</sup> Yéyè ne: “Cya bushuwa. Ncyêna nciitabuuja to, kadi,” yéyè ne, “aci’s—aci’s ncitangile . . .”

Mêmè ne: “To.”

Yéyè ne: “Aci’s ncitangile bampaasata.”

Mêmè ne: “Bôbô paabo nyawu kabayi bacyenza.”

<sup>175</sup> Bikengela muntu kampanda àcyéñzè. Bikengela musulu bawusabuke. Ciseba’s bikengela bacilamune. Mêmè ncyêna muswe kucyenza to. Nzambi mmumanye ne ncyêna muswe kucyenza to. Bâàbûngì baa ku biine bakaji abu’s batu bapa bânà baanyi byakudya, ne mbafwanyine kuteeka mwoyi wabo pansi bwanyi mêmè, pabwípì ne aci. Nudi nwela meeji, ne ngâsà wa Nzambi mupongolola kudi Nyuma Mwîmpè, nudi nwela meeji ne ndi mufwanyine kushaala mushinge mikolo mmona muntu mukwate ne bya luse awu ukadyela mu Cyendeleele mwamwa kayi ditekemena, pângìlkalà nciyi ngeela lubila lukole bwa kucikandameena anyi?

<sup>176</sup> Kî nne ndi cimanya-byônsò to; kadi nyuma wa ditunga edi, nyuma wa ekeleesiya, kadi, kayi Nyuma wa Kilisto to; nyuma wa ekeleesiya, dingumba, mmukwate bakaji aba kadi kubakupa mu bukooya abu muntu mwamwa. Kadi mêmè ndi anu dîyî cyanaana, didi dyela lubila ne: “Patukaayi muntwamu. Nyemaayi nuumuke mu bukooya abu.” Kanulekedi dyabulu unwenzela cintu cya nanku awu to. Ncibi!

<sup>177</sup> Ne nwêñù beena Assemblées de Dieu, nulekela bakaji abu, nulekela bakaji abu babebula nsuki yabo, kadi nubakandika bwa kudilaaba bilaabu bya kwîsù. Mu bushuwa bwa bwalu kakwena Mufundu udi ukandika bilaabu bya kwîsù to, kadi udiku udi ubenga kubebula kwa nsuki yenu. Yéyè kéné nansha mukumbanyine bwa kusambila kumpala kwa Nzambi to, mudi Bible wamba. Bayende udi ne bukenji bwa kushipa nende dibaka ne kumulekela. Cya bushuwa. Yéyè udi udizanjika kumpala kwa baa pa buloba bu mukaji mubiipe. Bible ngudi mwambe nanku. Yéyè udi uwifisha bayende udi mumusele bundu padiyé ucyenza apu. Ki menemene cidi Bible mwambe ncyôci aci. Nwamonu anyi?

<sup>178</sup> Ee, kadi mukaji mudilaabe bilaabu bya kwîsù, tudi tupeta mukaji uvwa ucyenza mu Bible, anu umwepele. Ùvwa ny’Izabela. Ùvwa nyéyè awu. Muntu umwepele mu Bible uvwaku mudilaabe bilaabu bya kwîsù, uvwa ny’Izabela awu, ne dyakamwe Nzambi kumudiishaye kudi—kudi mbwa mitomboke. Yéyè ukaadi mushaale cintu cya bundu, nansha mene wende. . . Byônsò, cintu cyônsò cya lwonji mbacinyìke dînà ne Izabela.

<sup>179</sup> Kabyena bikengela nwénù kwenza aci nansha. Kabyena bikengela nwénù kucyenza to. Cidi cinusaka ku dyenza aci ncinyi pa dîbà adi? Nyuma wa dyabulu.

<sup>180</sup> Kanwena bacimanye to. Ndi mumanye ne kanwena bacimanye to. Nudi—nudi bantu bapitepite bwímpè. Nudi bímpè. Nudi nundabula ku cyanza, nunyiikidisha.

<sup>181</sup> Kadi ndi mununange. Ncya bushuwa. Kadi mêmè mumone aci, ncyénàku mufwanyine kwikalà mwena lubombo... Pôlò mmwambe ne: “Ncyêna mudikande bwa kunwambila Mubelu wônsò nkòòng wa Nzambi to.” Mashi a mukaji nansha umwe kaikadiku pambidi paanyi mu Dituku adi to, anyi a mulume nansha umwe. Ndi munwâmbile Bulelela. Ne ntú ngumvwa bingenza bibi bwa kucyenza; kí nkuumvwa bingenza bibi ne bwalu ncyéna muswe kwenza cidi Nzambi ungambilà bwa kwenza to, kadi ndi mununange. Ncitu muswe kunutapa ku mwoyi to, pa nanku cíngìkkalà mwa kwenza ncinyi? Kadi Dinanga dya Nzambi dikezùke, ki dyàkusàkà ku dicyènza.

<sup>182</sup> Yesu’s wakalomba mene ne bwa kwepele nkuruse. “Bidiku mwa kwenzeka bwa lupanza elu lupite anyi?” Yéyè ne: “Byóbì biine, kaciikadi diswa Dyanyi to, ciikale Dyebe Wewè.”

<sup>183</sup> Nebikengele bwa mêmè ngiikale muntu udi wamba cyôci eci anyi? Nebikengele bwa ngangate bakaji baa mushinga mukole ne baa musangeelu abu ne bikwabo, kwikalà anu kubuuvula cizubu kubasunsulula anyi? Nebikengele bwa mêmè kwenza nanku anyi? Nebikengele bwa ngangate bambi naanyi, kwimana mwaba awu e kubamba mudibo banange mfranga ne dingumba kupita mudibo banange Nzambi anyi? Mêmè, ngamba bânà beetu baa mushinga mukole badi bangeela diboko... Kaa, bidi bikengela bwa ngéñzè nanku anyi? Éyì Nzambi, kundekediku ncyenza to.

<sup>184</sup> Kadi ncítukù mudikànde bwa kunwâmbila Mubelu wônsò nkòòng to. N’Dinanga dishuwashuwale dìdì dinsàke ku dicyènza.

<sup>185</sup> Ki bwa cinyi Mukenji ewu utu mushindu ewu anyi? Mwaba mukwabo nansha umwe pa buloba kacyenaku to. Cidi penyi? Eyo. S’badi bumvwa bwôwà. Nwamonu anyi? Kadi wôwò awu utu kawuyi bwôwà. Menemene. Nzambi utu misangu yónsò anu mushindu awu, nwamonu’s. Eyo. Mbwa bwalu ebu budi bakaji bafike ku ditandishiibwa bikole kudi Mukenji ewu anyi? Nciyi mumanye to, kacivwa cibuuludiiibwe to. Bavwa bacindeeje, kadi kacivwa cifike kündi to anu dituku dikwabo dyadya. Nwamonu anyi? Tangilaayi numone kwaka. Eyo. Ncya bushuwa ne cidi cikumbanangana ne mudimu wa bwambi ewu.

<sup>186</sup> Mpindyewu anji indilaayi kakese. Kukaadiku kwenzeke ne ciikale buloba bwa bakaji kacya kwônsò eku anyi? Eyowa. Bilondeshile maalu malonda, mu matuku a Eliya, kuvwa mukaji dínà dyende Izabela. Ne yéyè wakapeta bukookeshi

pa ekeleesiya wa Nzambi, cîdì Bible wamba ne necyenzeke cyakabidi mu matuku a ndekeelu aci; nyuma wa yéyè awu, kuplicila ku ekeleesiya kampanda, bulongolodi kampanda. Nenku neikale mukaji wa masandi, ne ekeleesiya mikwabo yônsò pamwe nende neyiikale ndumba, anu mudiye yéyè amu. Ncya bushuwa anyi?

<sup>187</sup> Bwakabuulwibwa 17, mmwambe ne: “Yéyè mmukaji wa masandi, ne udi MAMWENDÈ WA BANDUMBA.” Aci kacyena mwa kwikalà bantu balume to. Aci mbantu bakaji. Nwamonu anyi? Ne baakabakupa bônsò, ne mwoyi, mu Dijiba dya Kapya, ne baakabalunguя. Ncya bushuwa anyi? Ki bwalu mbwabu’s.

<sup>188</sup> Monaayi ne, paakajuuka Izabela awu mu cyalu, kwakajuuka muntu mukwabo bwa kukandameena cyôci aci. Nzambi wakatwala muntu. Katwena nansha mene bamanye kwakafuminaye to. Kavwa ne nshindameenu mumanyike wa mudimu wa bwambi to. Kacya kavwaku nî mmwakwidi nî ncinyi ciine to. Kupatukaye pende anu nanku, muntu mukulakaji mupayame wa mwitu bamubiikila ne ng’Eliya, ne wakateeka cisuuyi ku muji wa muci, kadi bôbô kumukina. Kîng’ anu aci to, kadi disangisha dyende dijima divwa dimukine.

<sup>189</sup> Kadi cikondo kampanda kudyelelaye meeji ne ûkaavwa mushaale nkaayende. KwambaYe ne: “To, Ndi naabo binunu mwandamatekete badi anu pamwe neebe apu.” Nwamonu anyi? Kavwa nkasumbu kaa basungula aku, nwamonu’s. Kutu misangu yônsò anu kasumbu aku. Yéyè kwamba ne: “Kuciinyi nansha, Eliya. Ndi mumanye ne wêwè udi udyelela meeji ne udi mushiikile, bwalu mangumba nyawu makwele lubilu wêwè muye too ne kuulu kwa kakuna. Kadi,” ne, “Ndi naabo binunu mwandamatekete badi bitabuuja cintu cimwecimwe cyûdî wêwè uyiisha eci. Wamonu’s, Ndi naabo.”

<sup>190</sup> Pashiishe paanyima paa dituku dyende adi, Loomo kwangataye bukookeshi, ki kulwaku cyakabidi cikondo ciikale buloba bwa mukaji, myòdelè yônsò ya—ya bakaji, mushindu uvwabo bapatuka bavwale tufulu twabo twa bijengu atu ne bikwabo, nwamonu’s. Ki Nzambi kujuula mukwabo ne Nyuma umwèumwè awu pambidi pende, Nyuma wa Elisha. Ncya bushuwa anyi? Ki yéyè awu kwamba ne: “Cisuuyi nciteekiibwe ku muji wa muci.”

<sup>191</sup> Nenku kuvwa kakaji kakwabo kaa kale keena bilumbu muntwamu, kavwa kakasediibwe kudi wako...kashiye bayaaku, kusediibwa kudi bayaaku-ciinà, Heloode. Helodyasa, ne yéyè mukaji ewu uvwa cifwebe cidilaabe bi—bilaabu bya kwîsù cya mu diine dituku adi, uvwa wombota maja. Wakalongesha mwanende wa bakaji mudi kwombota maja. Yéyè uvwa ne mwânà wa bakaji, mumulelè ne tatwëndè mudiishi, ta—tawëndè mudiishi; ne tatwëndè, mwânààbò ne mulùme awu. Helôdyàsà! Awu’s uvwa mmwânà wa—wa—wa mukaji awu’s.

Nenku ùvwa mumulongeshe mudi kwombota maja, ki awu kulwaye muji wa maja wa wimansha ne bilàmbà, mufwane anu mamwèndè. Nenku ùvwa udyambidila ne uvwa mwa kubwela mabaka misangu inaayi anyi itaanu, kwenza cyônsò civwaye muswe kwenza aci.

<sup>192</sup> Kadi ke Heloode udi upatuka ewu. Bavva bônsò beena Yuda, mpindyewu nwikalayi bavuluke nanku. Bavva beena mu ekeleesiya. Ki Heloode udi upatuka ewu, ne ekeleesiya wende, bwa kuteeleja muprofeta ewu, uvwa bantu biatabuuje ne mmuprofeta awu.

<sup>193</sup> Kuyaye tamakatamaka too ne mumpala mwa bônsò babidi abu, kwambaye ne: “Kî mbyanyishiibwe kudi mikenji bwa wêwê kwikalà nende to.” Kadi aci cyakenza ne mukaji awu ùlakanè wàmبا kutaayika! Nwamonu anyi?

<sup>194</sup> Mpindyewu, muntu kampanda mukwabo wa patupu ewu nunku's mmwambe ne: “Wetwawu, Helodyasa! Ncya bushuwa ne tudi ne disanka dya kukwakidila mu disangisha dyetu leelu ewu.” Kadi kî n'Yone to.

<sup>195</sup> Yesu wakamba ne: “Nuvwa baye kamona nganyi, panuvwa bapatuke baye kamona Yone apu? Nuvwa baye kamona muntu muvwale ne ku ménù bu mwakwidi anyi? To, awu udi mwa, wa mushindu awu utu utwa bâna baa mu maboko mishiku ne ujiika bafwe.” Nwamonu anyi? Yéyè ne: “Nuvwa baye kamona cinyi? Lupeepele, dilenge didibo banyungisha kudi lupeepele lwônsò naka anyi? Bamba ne: ‘Vwâ kunu, Yone. Netukufute bipite apu wêwê utuyiisha twêtù. Kabidi, twêtù, twêtù kadi's ki bulongolodi bwa butambe bunene?’” Kî n'Yone nansha. To, yéyè kaakaya kamona abi to.

<sup>196</sup> Yéyè ne: “Nuvwa baye kamona cinyi, pa dîbà adi, panuvwa baye bwa kuteeleja ne kumona Yone, muprofeta?” Yéyè ne: “Kadi nya’ nnwambila, nwénù, mutambe ne muprofeta! . . . bu nwénù mwa kwakidila ciine aci, yéyè ewu ki uvwa muprofeta mwambe ne nealwe awu ne: ‘Néntumè musanjeela Wanyi kumpala Kwanyi, ne yéyè nealongoole njila kumpala kwa Mukalenge.’” Ùvwa musanjeela wa Cipungidi. Yéyè ne: “Kakutu kwanji kwikalà muntu, mulela kudi mukaji, munene bu yéyè awu nansha.” Nwamonu anyi?

<sup>197</sup> Muntu wa mushindu awu nguvwa Nzambi mujuule bwa dituku dyadya, Eliya, muntu wa mwitu menemene. Yone, cintu cimwecimwe aci. Nwamonu anyi? Nyuma wa Eliya uvwa pambidi paa Yone. Nenku Yéyè udi wamba, pakaadiku kulwa cyakabidi dituku dya mukaji, Nyuma awu neajuuke cyakabidi: “Kumpala kwa Dilwa dya Mukalenge, pooshiibwa buloba, ne baakane bapatuka bwa kwendela pa bu—butu bwa beena Iwonji, benze bu müdì butu mwinshi mwa makàsà abo.” Yéyè mmucilaye, cyakabidi, mu matuku aa. Monaayi, Nyuma

Mwîmpè ngudi mulaye cyôcì aci. Ncikumbanangane ne dîbà ditudi ne mwoyi edi.

<sup>198</sup> Kudi ne cya kujuuka muntu kampanda. Aci cidi ne cya kulwa, bwalu cidi EMU MMUDI MUKALENGE WAMBA, Maalaki nshapita mwi4. NcyakambaYe menemene ne ki ciikala cimanyinu: “Pabwîpì menemene ne dilwa dya Dituku dya Mukalenge didi dikwacisha bwôwà, Nênnütümìnè Eliya.” Ne yêyè awu cyenzaye ncinyi? “Neakudimune myoyi ya bânà bwa kuyaaluja ku Dilongesha dya baataatu, kuyaaluja ku Bible,” kubapatula mu mashiilangana a cyena mangumba aa, “ne nebaalukile ku Bible, kudi Nzambi.” Ki civwaye mwa kwenza ncyôcì aci. Monaayi ne ncikondo kaayi cinene citudi ne mwoyi.

<sup>199</sup> Baprofeta abu bavwa batandisha bakaji baa cyena leelu baa mu matuku abo, ne bônsò baakafila myoyi yabo bu mushinga. Maalu malonda adi ajaadika ne cyônsò cya ku bikondo abi civwa mbuloba bwa mukaji, muvwa bakaji biikale ne bukontononyi.

<sup>200</sup> Tangilaayaaku mukaadi maalu leelu wa Ndaaya ewu. Netwikale ne mukaji, Mfumu wa ditunga, dimwe dya ku matuku adi pansi aa, mbyenze anu bu ne mbifwanyine kwenzeka mpindyewu mene. Mu bushuwa bwa bwalu, yêyè ngudi Mfumu wa ditunga. Nwamonu anyi? Mulume yêyè udi anu cidingishilu cyanaana. Anu abidi adi pansi aa, mu dimwe dya ku matunga etu makwabo, mukaji nguvwa upeta butumbi bwàbûngì be ne bikwabo byônsò bya kudi bantu bônsò, mu mushindu wa ne Mfumu wa ditunga, yêyè mwine, kwambaye ne: “Même’s ki bayende.” Mfumu wa ditunga dya États-Unis, nwamonu’s. Yêyè mukaji ngudi ufila myòdelè ya mvwadilu, bakaji paabo bayilonda, nwamonu’s, anu mwakenza Izabela menemene. Nuvwa bateelege diyiisha dyanyi pa *Ntèndeleelu-Izàbèlè* adi. Nudi bamanye. Nudi bacimanye. Nudi numona mwaba utukaadi patudi twakulangana apa anyi?

<sup>201</sup> Nudi numona cidi cyenzeke muneemu emu, kukaadi lumingu anyi mbingu ibidi, muneemu mu cimenga emu anyi? Mwambi wa beena Ditabuuja dya cyena Luther mmubiikile nsaserdose wa Katolike wa Mwoyi Munsantu bwa kulwayne kuyiisha pa kaaba kende yêyè, awu pende kuyiishaye, ne mwambi wa beena Ditabuuja dya cyena Luther awu kuyaye pende mwa nsaserdose wa Katolike awu e kuyiishaye pa kaaba kende.

<sup>202</sup> Nsangilu wa Maekeleziya kuntu kwaka mpindyewu, udi udisangishila mu Loomo awu. Mukanda wa nyungulukilu ewu, udi mulunda wanyi mulenga, David duPlessis; pâmvwà musômbe kuntu kwaka mmwela lubila mmwambilabu, ku Fourteen-Mile Creek kwaka, abidi adi pansi aa; kayi umanya ne mmukabweje ekeleesiya mu Baabolona to, pavwa muntu yônsò wamba ne: “Kaa, ekeleesiya yônsò neyishaale umwe mpindyewu.” Eyo, ndi mumanye aci, nwamonu’s, anu menemene cidi cifundiibwe mu mukanda wanyi wa biprofeta mu cidimu

cya 1933, bwa ne ncìvwà mwa kwenzeka. Mona's, kanwenaku numanya ne awu n'Sataana udi ubasanga anyi? Bible's ngudi mwambe cyôcì aci. Kadi cikondo cyänji anu cipite, cikondo cikese cyanaana, penzabo anu ne bâshààdi cintu cimwe, pa dîbà adi diikala dya pambelu paa cyena mangumba dyajiki, nwamonu's. Ki piikalaku cimanyinu cyenu cya nyama wa Iwonji aci mpôpò apu, bushuwa. Nwamonu anyi?

<sup>203</sup> Anu bwalu ncyêna ne dîbà dya kutungunuka pa bwalu ebu to, kadi, dîbà dikaadi diipacila nkankala ne tusunsa dikumi ne tutaanu. Nwamonu's, ndi muswe njikije eci, mfike ku kantu aka. Ndi anu ngaadija Mifundu eyi mwômò emu cyanaana munudi mwa kumwena mudibi mwa kwenzeka ne twikale mwaba utukaadi ewu, nenku pashiishe netujikije mu tusunsa tukese cyanaana.

<sup>204</sup> Mpindyewu monaayi anu cidi cyenzeke. Ba—baprofeta bàvwà bâtândishà bakaji abu mu mine matuku awu ne baakabiinyika ne "mbakinyi baa bânà bakaji." Ncya bushuwa. Maalu malonda adi ajaadika ne ki muvvabi.

<sup>205</sup> Mpindyewu anji indilaayi kakese. Nwêñù badi bafunda Mifundu abu, bivwa bikengela nwêñù kufunda Timote wa Kumpala 5.6. Bible mmwambe ne: "Mukaji udi ne nsòmbelu wa—wa bisankasanka bya pa buloba awu." Kacyena mwa kwikalà masanka a Nzambi to; pa nanku ki civwabi bifwanyine kwikalà, nwamonu's. "Mukaji udi ne nsòmbelu wa bisankasanka bya pa buloba mmufwe padiye ne mwoyi apu." Ki cyakamba muprofeta ncyôcì aci, Pôlò Munsantu ne: "Mukaji udi ne nsòmbelu wa ngiikadilu wa pa buloba ewu mmufwe padiye ne mwoyi apu." Nenku padiye ubenga luse, udi mwa kusambuka mukalu mudi kamuciyi kabidi mwaba bwende yèyè to. Nenku pa dîbà adi ukaadi penyi, ne mêsù ende malaaba bilaabu awu, ne nsuki yende mikosa ayi? Yèyè's ukaadi mumane kusambuka mukalu, kàciyi ne mushindu wa kwalukilaye cyanyima, nenku's kudi ne cya kwikalà mudimu wa bwambi wa bamuyiisha yèyè. Kadi vulukaayi ne, pa diine dîbà adi, kwônsò nkumane kujika. Bwalu mbutuuke. Cikaadi anu dimwenekelangana dya mikishi's.

<sup>206</sup> Nekwikale mudimu wa bwambi waleeja maalu manene a kukema, mudi Yoela mwambe, kadi kakwakwikala cikondo bwa bupikudi to. Cyônsò ncimane kujika. Mwânà wa mukooko ukaadi mumane kwangata Mukanda Wende, ne bapikula Bende bakaadi bajike. Anu muvwa Yesu muyiishe kumpala ne mubengibwe amu, ne pashiishe kuya bu mukishi kamwenekela bavwa muntu mwamwa, kuyiisha bavwa mu buloko, bavwa kabayi mwa kunyingalala abu, kakuciyi cikondo bwa lupandu to, nebikengele bwa mudimu wa bwambi umweumwe awu wenzeke cyakabidi. Apu nî ncifwanyine kwikalà Nkokelu Mwisâtù? bwa badi bajimine Cyendeleele. Apu nî nkôkò aku kukaadici? Ndi ntekemena ne kî ncyôcì to. Apu nî ncyôcì? Anji

elanganaayipu meeji kakese mpindyewu. Apu nî ncyôci? Nzambi kiatabiku to. Mêmè ndi ne bânà. Nwamonu anyi? Kadi ncyâ bushuwa ne byâmwèki ne cikaadi anu pabwîpi menemene apa.

<sup>207</sup> Cikeena-kumona aci cyakalwa pâncivwà mwânà bwa cinyi? Bwa cinyi ncivwaku mutùminekù meeji kwine kwônsò kumpala kwaka? Bwa cinyi dibwela dya mu nyuma adi divwa dilwe mu cibambalu amu dituku adi, dyamba ne: “Ki cyôci eci”? Cidi menemene anu munkaci mwa badi kabay-...mi—misuuka mijimine. Nenku Yesu wakabayiisha, kubajaadikila, kadi bôbò—bôbò kabaakanyingalalaku to. Ne pândì ntamba kuyiisha, mpadibo batamba kubiipa. Kakwena kanyinganyinga nansha nansha kakese to. Kakwena mwaba bwa kôkô aku to.

<sup>208</sup> Mwânâ wa mukooko wakangata Mukanda Wende, pakaavva Citampi cya Mwandamutekete pabwîpi menemene ne kukangudiibwaci, Citampi Ciisambombo. Vulukaayi ne, Yêyè mmutusokoke Citampi cya Mwandamutekete. Kawwa muswe kucyenza to. Paakiimana Mwanjelo, ku dituku ne ku dituku, ucyamba, kadi dîbà adi Kaakaswa kucyenza pa cyôci aci to. Mbambe ne: “Mudi cinyaanya mu Dyulu.” Nansha umwe kavwa mumanye to. Civwa n’Dilwa dya Mukalenge.

“Kaa,” mûdì wamba, “kacyena mwa kwikala aci to.” Ndi ntekemena ne kî ncyôci to.

<sup>209</sup> Twanjâàyi anu kuya kumpala kakese mwaba ewu. Ndi ne cintu kampanda cifunda, nwamonu’s. Eyo.

<sup>210</sup> Vulukaayi ne: “Mukaji udi ne nsòmbelu wa bisankasanka bya pa buloba,” bya maalu a pa buloba, wenza maalu bu baa pa buloba. Mmufwanyine kwikala uya mu ekeleesiya ne wenza maalu bu munsantu, aci kacyena ne dipetangana nansha dimwe ne cyôci aci to, nwamonu’s, kadi, “mmufwe padiye ne mwoyi apu.”

<sup>211</sup> Tangilaayi numone cîkaadì mangumba mamwenzele. Akaadi mamuvwije mulengi wa Dîyî dya Cijila, ciine cidi cibengangana ne Bible aci. Mmamuvwije muyishi. Aci’s ncikandika kudi Mifundu. Mbamuvwije mulwe mene too ne mukookeshi mpindyewu, mfumu wa cimenga, banguvena, bintu byônsò mu ditunga, ne mwambi mu nzubu wa Nzambi.

<sup>212</sup> Paabi, yêyè’s ki udi mupiile ku mpekaatu yônsò ukààdikù mwenzeke ewu, yêyè’s ki mwena buyaaya ebu. Cya bushuwa. Mpindyewu, ncyêna, ncyêna ngaakula bwa makenji to. Yêyè ngudi mupiile. Yêyè’s ngudi mukebi wa mwânà yônsò udi mulediibwe mpofo ewu. Yêyè’s ngudi mukebi wa ne lukita lwônsò elu luumbudiibwe. Yêyè’s ngudi mukebi wa mpekaatu, dîsaamà, tunyinganyinga. Mashinyi a cyambula-babeedi kaena mwa kwela cipungi to bu mukaji kayi mukabukebe. Dishipangana kadyena mwa kwenzeka to, nansha mpekaatu, nansha lufu, nansha tunyinganyinga, nansha ditakanyika, anu mukaji ngudi mubyéñzè. Ne Nzambi udi umukandika bwa

kubàndayè mu cyambilu bwa kuyiisha, kadi nansha nanku bòbò's nya' badi anu bacyenza. Dingumba, nudi numona mwaba ukaadidi anyi?

<sup>213</sup> Yéyè nnzambi mukaji. Mushindu mwine udi dyabulu ukwata mudimu's we! Mona's, beena Katolike bádi bàbàvvija, bakaji abu, banzambi, bátúma masambila kùdibò; ncyá bushuwa's, nzambi mukaji Mariya, ne bikwabo. Ndi mmona mu Nsangilu wa Bukwántèndeelu mwaba udibo bambe ne nebyenzeke ne babange kuvudijaku tuumasambila twa Yesu ní mbifwanyine kukwacishaku beena Mishòonyì bwa kumùbwelabò. Nwamonu anyi? Nwamonu anyi? Kaa, cintu cilaaba nsukaadi pambidi aci's we! "Udi kayi ushintuluka," mudibo bambe. Nwamonu anyi? S'ucidi anu yéyè dyabulu umwèumwè wa kale awu. Bible mmwambe ne: "Ne yéyè wakafikisha bônsò ku dipeta cimanyinu pa mpala yabo, aba bavva kabayi ne ménà mafunda mu Mukanda wa Mwoyi wa Mwánà wa mukooko."

<sup>214</sup> Ekeleesiya mudyanjila kulongolola ngündì ngambila ewu, kí mbadi pambelu pààpa nansha. To, mukalenge. Mu kasumbu kônsò, ki mudiYe mukoke badyanjila kulongolola Bende. Ki badiYe uvwila, mu cikondo cyónsò.

<sup>215</sup> Kadi's ki yéyè mukaji awu udi mwimane wawa. S'ki yéyè wawa. Nyéyè awu; uyiisha Díyì, ulenga Díyì, ulwa nzambi mukaji, pende mukebi wa mpekaatu yónsò ewu. Bible mmwambe ne: "Ncyéna ngiitabuuja bwa mukaji kulongeshaye nansha, anyi bwa kwangata bukookeshi nansha bwa bishi, kadi bwa kwikalaye mu dikookela bu mudi kabidi mi—mikenji yamba." Nwamonu anyi? Nenku yéyè kénéa mwa kucyenzaku to. Kadi nyawu bamuvvija mukookeshi wa ditunga, mfumu wa cimenga, nguvena; abidi mmale asatu mmípi yéyè's neikale Mfumu wa ditunga. Cya bushuwa's. S'ki bwalu abu. Ki njila nyawu, ki njila udi bwalu bulonda nyéyè awu, nwamonu's. Ne bantu badi benza ciine aci anu bwalu kabeena bacyuka Díyì edi to. Kabaadyakucimonaku to.

<sup>216</sup> Tangilaayi beena Yuda badi biimane pààpa baba, bamanyi baa mabàla, bantu baa maalu mímpe. Kadi Yesu wakamba ne: "Nudi baa tatwénù, dyabulu."

<sup>217</sup> Kadi bu mémè mwa kuMufikisha ku cilumbu kumpala kwenu mpindyewu mene? Twänjì tuteetaayi kucyenza kakese, ne Nzambi amfwileku luse bwa kwangata luseke ludi luMulwisha; kadi anu bwa katanci kakese cyanaana, bwa kunuleeja cintu kampanda.

<sup>218</sup> Kadi bu wéwé mwa kwamba ne: "Ee, mémè, butumbi kudi Nzambi, s'nkaadiku mwakule mu myakulu! Aleluuyah! Ndi mumanyi. Mémè, eyo, mémè—mémè's ndi muMupete. Nzambi abeneshiibwe. Eyowa!" Uh-huh, mmwómò anyi?

<sup>219</sup> Vulukaayi bantu baa mu Izaleela baba. Bible mmwambe, paanyima paa Yéyè mumane kubiikila bantu mubapatule, ne

mubasungile ku dibapatula dya mu Ejipitu, Wakababutula bwalu kabaakalonda Mukenji to. Nwamonu anyi? Baakadya manà a mu Dyulu. Baakadya manà akalokesha Nzambi pa buloba bwa bôbò kudyabo, ne baakiimana mu bwikadi bwa musanjeela, ne baakamona Dikunji dya Kapya, ne baakumvwa Dîyì dya Nzambi, ne baakadimona dishindika. Kadi pashiishe, bu mwakaswabo kwitabuuja Koola ne: “Kudi mwa kwikala bakwabo bantu baa cijila. Kudi mwa kwikala *bikampanda*, *bikansanga*, ne *bikankenga*. Tudi ne cya kwikala peetu baa cijila, twêtù. Bikengela twénzè byônsò *ebi*. Cisamba cijima’s ncyia cijila.”

Nzambi kwambaye ne: “Tapuluka naabo. Dîsâkà kule ne mwaba awu.”

<sup>220</sup> Môsà kwambaye ne: “Bônsò badi ku luseke lwa Mukalenge abu, ndondaayi mêmè.” Ncyia bushuwa. Nwamonu anyi? Ki kukangulaYe anu buloba kadi kubamina. Nwamonu anyi?

<sup>221</sup> S’bavva paabo anu bantu bîmpè, bôbò abu. Bushuwa’s, ki civwabo. Bavva bantu bîmpè. Eyowa’s, mukalenge, kadi aci kacyakenza bwalu to. “Ki mbônsò badi bamba ne: ‘Mukalenge, Mukalenge’ to, kadi ng’ewu udi wenza diswa dya Taatù Wanyi.” “Ki ng’ewu udi ubanga to; ng’ewu udi ujikija.” Bwa aci, kakwena bya tujila twa bikoso to; udi wediibwa ku luseke ku ndekeelu kwa lubilu. Ki mbya tujila twa bikoso to. Udi ne cya kulonda njila anu udi Mufundu mwambe.

<sup>222</sup> Padi Wu wamba ne: “Nyingalalaayi, ne batijiibwayi mu Dînà dya Yesu Kilisto, ne nenupete kupà kwa Nyuma Mwîmpè,” kakwena kajila kaa cikoso to, dilabulangana dya ku cyanza, dikashaala mwena ekeleesiya anyi mwena dingumba to. Lwila wêwè anu Njila awu! Wêwè kuyi mufwe ku wêwè mwine, ne kuyi mulediibwe ku Nyuma wa Nzambi to, udi—udi—udi mujimine. Kwajiki. Kakwena bya tujila twa bikoso to.

<sup>223</sup> Wêwè udi wamba ne: “Ee, ndi muntu wa ekeleesiya.” Ndi mumanye. Mbîmpè. “Ee, maamù wanyi...” Ncyêna ngeela aci mpatà to, kadi ûndì mêmè ngambila ewu ngwêwè. Wamonu anyi? Bikengela ulwile Njila awu, bwalu kakwena bya tujila twa bikoso to; newediibwe ku luseke ku Cilumbulwidi. Lwila anu Njila umwepele awu.

<sup>224</sup> Kudi Njila anu umwepele, ne Kilisto ki mwine Njila awu. Ne Kilisto n’Dîyì didi ne mwoyi munda mwebe adi, dìdì dìkumbajà kantu ne kantu kônsò kaakalayaYe mu muvù waku. Nwamonu anyi? Nudi bumvwe aci anyi? [Disangisha didi dyamba ne: “Amen.”—Muf.] Eyo. Monaayaaku mpindyewu.

<sup>225</sup> Bamwe badi bamba ne: “Bantu aba’s mbîmpè.” Cya bushuwa. Ncyêna ngamba ne kî mbantu bîmpè to. Ncyêna ngamba ne Cecilia Munsantu ne bakwabo abu kabavwa bakaji bîmpè to; nansha wanyi maamu pende’s uvwa anu mwîmpè, kadi buléléla budi ne ncitu ntuma masambila kudiye to. Bushuwa’s.

Bushuwa, nkaadi mumonemone bantu bîmpè bààbûngì, kadi kabéena banzambi bakaji to. Mbantu bakaji, bantu balume. “Kudi Mutwangaji anu umwepele pankaci paa Nzambi ne bantu.”

<sup>226</sup> Kadi mbwa cinyi, mbwa cinyi budi muntu mufwanyine, muntu mumanyike wa munkaci mwa beena Mpenta, ... mukanda awu wa nyungulukilu uvwa Mwaneetu duPlessis, mwaneetu wa mushinga mukole awu, mwandeshe. Pàmwâpa bamwe baa kunudi mbawupete. Musombe...Eyo, nudi bawupete. Mu Nsangilu wa Bukwântèndeelu, ku luseke lwa paapà, mwambe ne: “Bivwa bya nyuma be.” Aci’s ndijingulula dya nyuma’s, kî mmwômò anyi? “Kaa, Nyuma wa Mukalenge uvwa mwaba awu, bya nyuma be.” Eyo. Ki bwalu mbwôbù abu’s.

<sup>227</sup> Bwa cinyi? Bwalu ki mpunga uvwaku bwa kusangisha beena Mishòonyì ne cyôcì aci pamwe, citudi tulwila kukaadi bidimu aci, ne Bible mucitwe nyama ku mikolo mutwâmbile ne necilwe. Kadi wetu...umwe wa ku beetu balombodi baa batambe bunene umba ubwelamu, wamba ne: “Ncya bushuwa. Ki citudi twenza,” ne ekeleesiya wa Mishòonyì yônsò musanga ntete useeswishiibwa pende ku ciine aci.

<sup>228</sup> Nenku anu menemene, bu nwêñù mwa kutapa dîsù kuntwaku, EMU MMUDI MUKALENGE WAMBA. Cya kumpala, Dîyì dikaavwa dicyâmbè. Pashiishe Nyuma wa Mukalenge kwamba, mu cidimu cya 1933, mwine wâkamba bintu bikwabo byônsò ebi pa bidi bitangila matunga ne neabwele mu mvita awu, ne mushindu uvwa mashinyi mwa kwikala, ne byônsò mushindu awu, mmwambe ne ki cyôcì aci menemene civwa mwa kwenzeka ku nshiikidilu. Kadi’s ki cyôcì eci. Kacituku cipangile to. Nenku’s ki twêtù aba tucimona mudici cyenda cyangata mmwenekelu.

<sup>229</sup> Nudi bavuluke diyiisha dyanyi pa *Ntèndeelu-Izâbèlâ* dya abidi adi panshi aa adi anyi? Nudi bavuluke muvwa Elisha wenda upweka ne njila mu dinda adi, bwa kubambila anyi? Bwa cyôcì aci, mvwa muyishepu. Nwamonu anyi? Ne mushindu wûngâàkadyànjilà kwamba musangu awu ne cikondo necilwe ciikala Nsangilu wa Bukwântèndeelu ewu ndekeelu wa byônsò mwa kulwa cimanyinu cya nyama wa Iwonji, bwalu uvwa mwa kudisanga ne nyama wa Iwonji. S’ki kucyenzaye eku. Mu cikondo cyanyi, ndi mushaale ne mwoyi too ne ku dicimona. Nenku’s ki beena Mishòonyì aba, miliyô ne miliyô, baseeswishiibwa ku ciine aci. Bwa cinyi? Ki cidibo munkaci mwa kukeba.

<sup>230</sup> Mbampofo! Yesu wakambila Bafaalesa abu ne: “Nwêñù bampofo balombodi baa bampofo. Mpofo yéyé ulombola mfofo,” mwakambaYe, “bwônsò bwabo kabaakudishinda mu mukidi anyi?” Nenku’s mwômò amu ki mudibo badishinda. Mmunyi mûmvwâku mufwanyine kwitabuuja ne muntu uvwa mwimane

naanyi ne mwakule naanyi, uvwaku mufwanyine kusòmba kadi kwamba dîyì bu dyôdì adi! Nwamonu's: "N'Cisokoka, ku mèṣù, kwa beena lungenyi ne a batalame, kadi uCibuwlila bânà bu mudi badi baswe kuyiila."

<sup>231</sup> Ndi mumanye ne dîngà dituku cyôcì aci necindombe mutu wanyi. Aci ncyâ bushuwa. Necindombe mutu wanyi, kadi mwab'ewu Bulelala mbwebu munkaci mwa kumanyika. Uh-huh.

Wa kumpala bwa kufwila ndongamu wa  
Nyuma Mwîmpè ewu,  
Ùvwa n'Yone Mubatiji, kadi kaakanyeema to;  
wakafwa mùfwafwà mutu mulume;  
Pashiishe kulwaku Mukalenge Yesu, bôbò  
kuMupoopela pa nkuruse,  
Wakayiisha ne Nyuma neasungile mutu ku  
mpekaatu. (Ncyâ bushuwa anyi?)

Pashiishe kwasabo Stefano mabwe, yêyè uvwa  
uyiisha ulwishangana ne mpekaatu,  
Kubafiikishaye munda bya dikema, mu  
mushindu wa ne baakamutaayisha mutu;  
Kadi wàkafwà mu Nyuma, kukuulaye mwoyi,  
Ne wakaya kapetangana ne bakwabo, cilwilu  
uya baakafila yabo myoyi aci.

Kudi Peetelo ne Pôlò, ne Yone wa Nzambi,  
Baakalekela myoyi yabo bwa Evanjeeliyo  
wamona mwa kukenka; (Cyakenzabo ncinyi?)  
Bôbò baakasambakaja mashi abo, ne a  
baprofeta baa kale,  
Bwa Dîyi dilelela dya Nzambi dyambiibwe ne  
meeji matooke ônsò.

Misuuka mwinshi mwa cyoshelu, yivwa yela  
lubila ne: "Too ne ku dîbà kaayi?"  
Bwa Mukalenge kunyooka bônsò badi benze  
bibi;  
Kadi nekwikale bakwabo bààbûngì baafila  
mashi a mwoyi wabo (Eyo, ncyâ bushuwa.)  
Bwa Evanjeeliyo ewu wa Nyuma Mwîmpè ne  
lukoka Lwende lukunze kunzuu alu.

Ùcidi anu mutungunuke ne kuzololoka mashi.

<sup>232</sup> Eyowa's, neènzè nanku dîngà dituku, kadi mêmè ndi  
mwindile dîbà adi piikalaku kujikè.

<sup>233</sup> Mwaneetu wa bakaji mukwabo mmufume ku dipeta ciloota.  
Yêyè kucintumina, kwamba ne: "Mêmè kubamona, ekeleesiya  
awu mulongolole mushindu wa" kunshipa mêmè, mu musokoko,  
musangu kampanda, pângìkalà nkaadî mpatuka mu mashinyi  
aanyi, ne mbwela, kungaasa cingoma... Kadi yêyè ne: "Pa dîbà

adi Nyuma kwamba ne: ‘Kí ndibà edi to, kadi aci necilwe pashiishe.’’ Uh-huh.

<sup>234</sup> Nzambi kiitabiku bwa mêmè kudya cibanga pa cintu nansha cimwe to. Ncyêna mumanye cintu nansha cimwe to pa kuumusha Yesu Kilisto ne Yéyè mupoopediibwe pa nkuruse. Tudi ne mwoyi mu dituku didi dikwacisha bwôwâ. Mpekaatu ngudi mwenze cyôci eci. Eyo. Baa—baakaasa Stefano mabwe. Baakakosesha Yone mutu, mukaji awu ngwâkenza. Ncyêna mumanye mutwafila wetu twêtù to, kadi necyenzeke dîngà dituku. Eyo, monaayi.

<sup>235</sup> Mu Yone Munsantu, panwikala baswe Mufundu awu pa cyôci aci. Yone Munsantu 6.49, ki mwômò amu mwakadyabo manà, ne Yesu kwamba ne: “Kadi bôbò abu, muntu ne muntu, s’baakafwa.”

<sup>236</sup> Wêwè udi wamba ne: “Ee, mwaneetu—mwaneetu wa bakaji, ntu—ntu mumone mukaji ewu uja maja mu Nyuma.” Kaa, eyowa. Uh-huh. “Ntu mbamona benza nanku. Nkaadiku mumumone wakula mu myakulu. Nkaadi mumumone...” Eyo.

<sup>237</sup> Yesu wakamba ne: “Bâàbûngì nebalwe Kündì mu dituku adi, bamba ne: ‘Mêmè’s nkaadiku mwenze bintu byônsò ebi.’” Nwamonu anyi? “Baakadya manà mu cipeela,” mwakamba Yesu, “kadi’s bôbò abu, muntu ne muntu, mbatapuluke Cyendeleele. Mbafwe.” Mmumwe ne mbaye Cyendeleele. Baakabutukila anu mu cipeela amu mene.

<sup>238</sup> Nudi bavuluke Ebelu nshapita mwi6: “Aba baakamanabo kumanyisha Bulelela musangu kampanda, kadi babenge bwa kwendelaMu, kakucyena kabidi kanyinganyinga bwabo bôbò to.” Nwamonu’s, mwena kwitabuuja wa ku mikal....Padi Bulelela buleejiibwa kudi muntu bwa musangu wa ndekeelu, kadi yéyè ubenga kuBwakidila; bilondeshile Mukanda wa Ebelu, nwamonu’s, yéyè neikale...kakwena cintu nansha cimwepele pa buloba apa cidi mwa kumusungilaku to.

<sup>239</sup> Kwende nkujike. Nî nkanyinganyinga, nî mbupikudi, kakucyena cintu nansha cimwe cidi cimushaadile to. Yéyè ukaadi mutapuluke Cyendeleele. Bible ngudi mwambe nanku: “Mbindile kapya kadi kenza bwôwâ ne ciji cikole ciikalà mwa kudya mulwishi.” Nenku padi Bulelela bwa Evanjeeliyo bujaadikiibwe, bushindikiibwe kantu ne kantu, kadi pashiishe kukudimuka e kuumuka kuBushiya, kwende nkujike. Kwajiki. Ncibi be, kadi bikengela anu ncyambè’s.

<sup>240</sup> Vulukaayi Banjelo bavwa kabayi balame ngiikadilu wabo wa kumpala abu, kadi bashiya muntwamu mu nzubu wa buloko awu mu mîdimà, mùdi baa pa buloba biikale bendela leelu wa Ndaaya ewu mu bwine buloko bumwebumwe abu, kakuyi kanyinganyinga to.

<sup>241</sup> Vulukaayi ne kukaadi ndambu wa bidimu, ngâkamba, pângààkafùmà ku Chicago ne: “Anyi Amerike néacyâkidilè cidimu eci, anyi kaadyakucyakidilaku to nansha kakese.” Nudi numona kukaadiye muye anyi? Eyo.

<sup>242</sup> Mpindyewu ndi ndikonka ní Nkokelu Mwisâtù ki udi mufwanyine kwikalaku ewu anyi? Éyi Nzambi wa yaaya, swaku bwa kaciikadiku aci to! Mbwa cyôcì aci budi Nkokelu Mwisâtù ne cya kwikalaku anyi? Ncifwanyine kwikala aci anyi? Kaa, ekelekele! Elanganaayi meeji pa bwalu abu, balunda baanyi. Elanganaayi meeji pa bwalu abu; mêmè ncyêna muswe kukwelela meeji to.

<sup>243</sup> Yesu wakamba ne: “Lubombo lwa mushindu ewu...” Nwêñu baswe kufunda aci, Maataayi 23, ne mwandamutekete. Ndi—ndi mwambe mwab’ewu ne, “bala aci,” kadi nudi mwa kumona. “Nwêñu Bafaalesa bamppofo!” Lekelaayi...

<sup>244</sup> Nudiku ne tusunsa ndambu cyanaana anyi? [Disangisha didi dyamba ne: “Amen.”—Muf.] Twänjì kumona tûng. Tubualaayi anu mwine mwaba awu, bwalu ndi mwambe ne “ucibale.” Kuvwa cintu kampanda mwaba awu cîmvwà njinga kubala kumpala kwa... Mpindyewu pàmwâpa nénkosè cintu kampanda cikwabo, kadi twänjì—twänjì kwangataayi anu eci nunku bwa katanci kakese cyanaana. Maataayi 23, katanci kakese cyanaana, eyo, nenku netubangile ku mvensa wa 27. Anji teeleejaayi mpindyewu. Nukabalaayi cintu cijima aci panwikala baalukile mu mèñnù, panwikala baswe. Anu ndambu mukwabo wa tusunsa cyanaana.

<sup>245</sup> Mpindyewu tangilaayi apa. Maataayi 23, kubangila ku mvensa wa 27: “Dyakabi dyenu, nwêñu bafundi!” Mpindyewu, vulukaayi ne, badiYe wambila aba mbantu baa cijila’s.

*Dyakabi dyenu, nwêñu bafundi ne nwêñu Bafaalesa, beena lubombo! Bwalu nudi bu nkita milaaba lupemba lutooke (abu’s mbantu bafwe, nwamonu’s), nkita milaaba lupemba lutooke, yidi bushuwa yimweneka milenga pambelu, kadi munda miikale myûle tente ne mifuba ya bantu bafwe, ne bukooya bwa mishindu yônsô.*

<sup>246</sup> Lubombo ne nkuka ne makokyanganyi, munda mwabo amu; kadi pambelu ne: “Mêmè’s ki Docteur Kampanda.”

*Nansha nanku pambelu nudi numweneka baakane kudi bantu, (tangilaayi Nsangilu wa Bukwântendeleelu ne beena Mpenta badi basòmbe mwaba awu abu), kadi munda nudi bûle tente ne lubombo ne bubi.*

<sup>247</sup> Bubi ncinyi? Cintu cyûdì anu mumanye bîmpè ne ncyâ bushuwa kadi kuyi muswe kucyenza to. Yesu, mpindyewu tangilaayi numone ne cidiYe...mmu lukongo kaayi mudiYe uteeka cyôcì eci mpindyewu.

*Dyakabi dyenu, nwénù bafundi ne nwénù Bafaalesa, beena lubombo! Bwalu nudi nwibaka majambu a baprofeta, ne nulengeja nkita ya baakane, . . . (Nwamonu's: "Kaa, baprofeta!")*

*Bii kale nwamba ne: Bu ne twétù mbavva mu miine matuku a baataatù beetu awu, nunku katwena balwe baabanyanganyi naabo baa mashi a baprofeta to.*

<sup>248</sup> “Nunku tudi biitabuuje Dîyì dya Mukalenge bu ne twétù mbavva ne mwowyi mwine musangu awu.” Tangilaayi.

*Bwa bwalu abu nudi bantemu baa cinudi nwénù biine, baa ne nwénù ki bâna baa biine baakashipa baprofeta abu.*

*Nanku ujaayaaku cipiminu cya baataatù beenu.*

<sup>249</sup> Aci's ncidi menemene munkaci mwa kwenzeka eci. Mpindyewu tangilaayi numone cidiYe wamba mwaba ewu.

*Nwénù nyoka, ne lukongo lwa nyoka ya ntooka, mmunyi munudi mwa kupanduka ku dipiila dya mu iferno?*

<sup>250</sup> Mmunyi munudi mwa kupanduka? Mpindyewu badiYe wambila aba's mbambi, nwamonu's, s'ncya bushuwa, bantu baa cijila. Mmunyi mûdì mwa kwimana ne mumanya ne Bible udi udyanjila kwamba ne wambila bantu abu bwa kabeni cyôci aci, kadi upeta mushindu wa kwimana ne kudya cibanga bwa tundambu twa ndola tubi twa dikema, tununka mpuuya mubole, bwa dimanyika kampanda, ne bwa muntu kwikalaye ukutuuta cyanza paanyima ne ukubiikila ne “Docteur”? Mmunyi mûdì mwa kwamba ne udi munange biine bantu abu?

Ndi nyiisha pa mikaba ya mèyì, kabidi. Nwamonu anyi?

<sup>251</sup> Mmunyi munudi mwa kwamba, mmunyi munudi mwa kwamba ne nudi banange bantu abu, kadi nulekela cintu bu nanku cyenzeka? Nwamonu anyi? Nwénù—nwénù Bafaalesa, nwénù bampofo, nwénù nyoka, nwénù lukongo lwa nyoka ya ntooka, mmunyi munwapanduka ku dipiila dya mu iferno? Panudi . . . Mmunyi mudi muntu leelu ewu, mumanye ne bintu ebi mbibi, kadi kwimana pààpa bwa kulama disangisha dyende, bwa kudyundisha dingumba dyende, kadi upanga kwambila bakaji ne balume? Mmunyi muwapanduka ku ciiji cikole cya iferno, padibi ne civwa cikwenzela wêwè? Neupandukeku munyi? Nwamonu anyi?

<sup>252</sup> Teelejaayi, teelejaayi mwaba ewu. Neciikale cinyi? “Ki bwa cinyi . . .” mvensa wa 34.

*. . . monaayi, nênnütümìnè baprofeta, . . .*

<sup>253</sup> “Nênnütümìnè,” mu matuku acivwa alwa's. Ki Bafaalesa beenu badi baalukila's mbôbò abu. Nwamonu anyi?

*...beena lungenyi, ...bafundi: ne bamwe baa kudibo  
nenubashipe ne nenubapoopele pa nkuruse; ne bakwabo  
baa kudibo nenenbatuute mfimbu mu nsunàngòngà yenu,  
ne nenubakengeshe ku cimenga ne ku cimenga:*

<sup>254</sup> Wakadyanjila kwamba muvwaYe mwa kubatumina baprofeta, biikale ne Dîyî dya Mukalenge. Kadi civwabo mwa kwenza ncinyi? Cintu cimwecimwe cyakenza baatattwâbò aci, bwalu's ki cinudi nwénù aba. Nwamonu's, nyuma kayitu yifwa to. Bantu badi bakwaciibwe kudiyi mbatu bafwa, kadi nyuma yôyì kayitu yifwa to. Yéyè wakamba ne: "Nwénù nudi bânà. Nudi bôbò abu." Kadi tangilaayi anu mushindu udi binto ebi.

<sup>255</sup> Mushindu mwine wakimana Pôlò Munsantu mwaba wawa (nudi nwitatuuja ne yéyè uvwa muprofeta anyi?) ne wakapiishaye bakaji, bwa dibebula dyabo dya nsuki yabo; wakapiishaye malongolodi abo; wakambaye ne mutu yônsò uvwa kayi mubatiijiibwe mu Dînà dya Yesu Kilisto uvwa ne cya kulwa kubatiijiibwa cyakabidi. S'ncya bushuwa.

<sup>256</sup> Kadi leelu ewu bakaadi badya cibanga ne bacilaaba nsukaadi pambidi. Kabacyena bamanye dishiilangana to, nansha nanku. S'mbya luse's. Piikalabi ne dîbà dikaaadi dimane kujika, ndi mufwanyine kwamba nunku ewu, nwamonu's: bavva bampofo, badyanjila kulongolola bwa kwikalabo bampofo. Nzambi afweku luse. Kabavwa mwa kucimona to.

<sup>257</sup> Yesu wakamba ne: "Nudi bampofo. Nwénù bafundi ne Bafaalesa bampofo aba, nwénù beena lubombo aba! Peenu's nudi nubala Dîyì dimwedimwe didi bôbò bônsò abu babalebale adi, kadi mona munukaadi nulwa kumpiisha Mêmè. Kadi paanyi's Ndi anu menemene civwa Dîyì dyambe ne neciikale mu dituku edi aci. S'bivwa bikengela bwa Mêmè kwikalala Musanjeela wa dituku edi. Mêmè ewu's ki Maasiya awu," mwakambaYe, mu tuuméyi tucincika. "Mêmè ewu's ki Maasiya awu. Ndi mupangile kucijaadika anyi? Mêmè ncifyi mwenze cyakafundiibwa Bwanyi Mêmè, apu kaayi nuMpishaayi. Kadi nwénù Bafaalesa bampofo aba nudi nulombola bantu beenu nukababweja mu cintu bu nanku awu, biikale nutumamu musùmbà mujima." Yéyè ne: "Ee, mpofo udi ulombola mpofo nende." Yéyè ne: "Nudi . . ."

<sup>258</sup> Wêwè ukaadiku mwambe ne: "Kaa, bu twêtù biikale ne mwoyi mu cikondo cya Pôlò Munsantu, eyo, nunku mêmè's ndi mwangate luseke lwa Pôlò Munsantu."

<sup>259</sup> Beena lubombo naanyi nwê! Nwamonu anyi? Bwa cinyi kanuyi nwangata luseke lwa Dilongesha dyende? Nuvwa mwa kwikalala benze cintu cimwecimwe aci musangu awu cinudi benze mpindiyewu eci, bwalu nudi bânà baa baataatù beenu, baataatù beenu baa cyena bulongolodi abu: Bafaalesa, Basadoka, ne badyeyemenyi abu. Ki—ki cyôcì aci. Uh-huh. Nênnwâmbilè, kabidi—kabidi mu dîbà ditudi ne mwoyi edi, ndi ndikonka ne eci ncifwanyine kwikalala Nkokelu Mwisâtù anyi? Indilaayi

anu kakese mpindyewu, nwamonu's, Yesu wakamba ne: "Baa mushindu ewu badi bapeta dipiila ditambe bunene." Nwamonu anyi? Kacyena cibi menemene anyi?

<sup>260</sup> Muwva mwena Amerike munene mukwabo, musangu kampanda, pakaavwa mwena lukuna pabwîpì ne kukwata ditunga edi, kuvwa muntu pa dîbà dya mundankulu, wakatupikila pa kabalu kende e kuyaye wenda upweka ne njila, wela lubila ne: "Mwena lukuna nyawu ulwee!" Uvwa m'Paul Revere.

<sup>261</sup> S'ndi paanyi mwena Amerike, mêmè. Ne ndi mubànde pa kabalu, pa dîbà edi dya mundankulu, nciyi ngamba ne mwena lukuna ulwalwa to, kadi ùkaadi apa! Kabyena ne ulwalwa to; ùkaadi mumane kwikalaku kumane kujika; dikwata dya ku bukookeshi. Ndi nciina ne nkwépì kwikalaku kumane kujika; dikwata dya ku bukookeshi bwende, pa dîbà dya mundankulu edi.

<sup>262</sup> Vulukaayi ne, ku Tucson, Banjelo mwandamutekete abu, Mukenji awu uvwa ne: "Dijikija dya bwalu busokoka bwa Nzambi." Dyakamwe paanyima paa cyôci aci, ngenda mpweka ne mulongo wa mikuna ayi . . .

<sup>263</sup> Nwêñù bônsò nuvwa bumvwe bwa mikuna ayi. Monaayi. Mwaneetu Fred mmukwate ndambu wa fôtô yaci, ne Mwaneetu Tom. Ne mêmè ndiku ne yimwe ya ku fôtô ayi, yimwe ya ku films, ne byônsò. Netubileeje mwaba ewu dîngà dituku, kunuleeja anu menemene mwaba uvwaci. Nwêñù bônsò nudi bamanye bwalu abu.

<sup>264</sup> Tangilaayi, nsongo isatu ya mikuna ayi. Yêyè wakamba ne: "Ki webe wa Kumpala, Mwibidì, ne Mwisâtù."

<sup>265</sup> Ne Mwaneetu Fred mmukwate fôtô waci udi mutambe kwikalala wa pabwende, dîbà divwabo bapite yêyè ne Mwaneetu wa bakaji Martha. Mavuba avwa mabànde afumina ku citaleela cya buloba, ne avwa majìke mikwabo yônsò, nenku civwa cileeja anu Nkokelu Isatu ayi; umwe *apa*, umwe *apa*, ne umwe *pààpa*. Nwamonu anyi? Yôyì ayi mwandamutekete!

<sup>266</sup> Tangilaayi, wa Kumpala, isatu. Isatu mbupwangane. Ki dîbà dyakapatuka mudimu wa bwambi awu ndyôdì adi.

<sup>267</sup> Nkokelu Mwibidì uvwa ndijingulula dya nyuma, ciprofeta. (Wa Kumpala uvwa ndyondopa dya babeedi.) Mwibidì uvwa nciprofeta cyàkapàtukà, ne civwa cimanya bwalu busokome bwa mu meeji, paakamweneshiibwa Dîyi Dyôdì diine. Mbwena kwamba ne, ki ngâsà nyêyè awu.

<sup>268</sup> Kadi, vulukaayi ne, cya mwandamutekete ki dijikija. Eci ncifwanyine kwikalala Nkokelu wa dijikija anyi, byônsò byajiki anyi? Mbifwanyine kwikalala nanku anyi? Elanganaayi meeji pa bwalu abu mpindyewu. Elanganaayi anu meeji cyanaana.

Nukaadi penyi? Nwamonu anyi? Mwandumutekete utu misangu yônsò anu dijikija. Nkokelu Isatu!

<sup>269</sup> Mudimu wa bwambi wa Yesu uvwa mu Nkokelu Isatu. Nukaavwaku bamanye nanku anyi? Monaayi! Nenku wikale ne meeji matooke, pawikalaku kacya ukaadi naawu mu nsòmbelu webe, mpindyewu bwa katanci kakese, tusunsa tukese.

<sup>270</sup> Nkokelu Wende wa Kumpala uvwa ndyondopa dya babeedi. Wakalwa muntu munangiibwe bikole. Bantu bônsò bavva baMwitabuue, muvwabi bimweka. Ncya bushuwa anyi? PavwaYe wenda wondopa babeedi, muntu ne muntu uvwa muswe bwa Yéyè kulwa mu ekeleesiya wabo bôbò.

<sup>271</sup> Kadi dîngà dituku Yéyè kukudimuka e kubanga kwamba ciprofeta, bwalu's Yéyè uvwa Dîyì, ne Yéyè nguvwa Muprofeta uvwa Môsà mwambe awu. Kadi paakabangaYe kubambilà, ubambilà muvwa nsòmbelu yabo, ne bintu bivwabo benza, Yéyè kulwa kàciyi munangibwe to. Ki civwa Nkokelu Wende Mwibidì ncyôcì aci.

<sup>272</sup> Ndi ndikonka's ní ncidileeje cyakabidi mu cimfwanyi? Anji elaa yiku anu meeji kakese. Ncifwanyine kwikala aci anyi? Wa Kumpala, dyondopa, bantu bônsò. Mwibidì: "Kaa, ncifwanyine kwikala mwena Yesu Nkaayende. Ncifwanyine kwikala Beelezebulà, ncifwanyine kwikala mwena..." S'ki cintu cimwecimwe cyakenzabo kwaka aci. Nwamonu anyi? Nyuma yimweylimwe ayi miikale misòmbèle mu bantu baa mushindu umweumwe awu, bantu beediibwe mulawu kabaciyi mwa kusungidiibwaku kabidi to, bwalu bakaavwa bamana kipiisha anu kwine kwônsò aku; bôbò, bu muvwa Yudaasa Mpongoloki, mulela mwânà wa kabutu.

Wêwè udi wamba ne: "Yudaasa?" S'mbushuwa.

<sup>273</sup> Vulukaayi ne, yéyè awu uvwa mutendeleedi wa dikema, kadi kavwa mwa kuya ne Mukenji too ne kundekeelu nansha. Ùvwa mwa kwangata katupa kaawu, kadi cikwabo citupa cyawu yéyè kacivwa cikumbanangana ne wende muminu to. Bôbò badi mwa kwangata dyondopa ne bintu bya mushindu bu nanku, kadi pakaadibi bikafika ku ne Nzambi mmwambe diyì nshindi mipatuke, apu kaayi aci ncitambe kwikala cya ndondo bwabo bôbò. "Kacyena mwa kwenzekaku to!" S'ki civwa Yudaasa ncyôcì aci. Wende nyuma udi mwa kwikala ne mwoyi anu too ne pa mwaba awu. Yéyè kêna mwa kuya naaci kupita apu to. Nwamonu anyi?

<sup>274</sup> Bavwa mwa kwangata Môsà ne mushinga paakakangulaye Mbû Mukunze, ne bikwabo mushindu awu. Kadi paakafikabi ku dibambilà ne, kabavwa, kabivwa bikengela bwa bakwabo baa kudibo kwenzabo *cikampanda* anyi *cikansanga*, anyi *cikankenga*: "Yéyè ukaadi udivwija Nzambi, kumutu kwetu twêtù." Nwamonu's, kabavwa mwa kutwala aci to, Koola

ne bakwabo abu. Pa nanku, bivwa bikengela kwikalabo ne bulongolodi, ki pa nanku Nzambi kumbà kubamina's.

<sup>275</sup> Mudimu wa bwambi wa Yesu, pavwaYe wondopa babeedi apu: "Yéyè's uvwa ukemesha, Muprefeta nsongaalume wa mu Ngalela awu! Mona's, Yéyè's udi utabaja mpofo. M'Mubishe too ne bafwe. Twétù's tudi naabo basatu bajima babiisha ku lufu. M'Mubishe bafwe anu beetu baa cya bushuwa aba."

<sup>276</sup> Kadi dìngà dituku Yéyè kukudimuka, kwambaYe ne: "Nwènù lukongo lwa nyoka ya ntookwa. Nudi nusukula pambidi paa dilongo. Numweneka bu ne nudi baa cijila, kadi munda mwenu, kanwena cíngà cintu to anu musùmbà wa nyoka." Kaa, paakapatuka ciprofeta aci, ciikale cipiisha bulongolodi abu, pa dìbà adi maalu kushintuluka's. Bôbô kuMukudimukila. Ncya bushuwa. Ki ndekeelu wa byônsò, paakaMubengabo, bôbô kuMupoopela pa nkuruse.

<sup>277</sup> Kadi kanwena mwa kushipa Mudimu wa bwambi to. Ùdi utungunuka anu ne kwikala ne mwoyi. Nudi mwa kulaadika musanjeela, kadi kanwena mwa kulaadika Mukenji to. Uh-huh. Cya bushuwa. Yéyè wakatungunuka ne kwikala ne mwoyi. Kadi monaayi paakalwa Nkokelu Mwisâtù wa mudimu Wende wa bwambi awu. Wa Kumpala uvwa ndyondopa dya babeedi.

<sup>278</sup> Mwibidì uvwa nditandisha dya malongolodi, ne dyamba dya ciprofeta; civwabo benze, civwabo, ne civwa mwa kulwa. Cidiku, cidiku, cyàlwà; ne cìvwàku, cidiku, ne cììkalàku aci. Ki cyakenzaYe ncycòci aci. Ncya bushuwa anyi?

<sup>279</sup> Kadi Nkokelu Wende Mwisâtù mpaakayiishaYe bajimine bavwa kabaciyi mwa kusungidiibwa kabidi to. Bakaavwa mwinshi mwamwa muvwa mèṣù manene, malaaba bilaabu awu asanganyiibwa ne: "Uuh, uuh!" Wakayiisha misuuka yivwa mu iferno, yivwa kayiyi miitabe luse ayi, kadi yiqaavwà mitapuluke Cyendeleele ne Bwikadi bwa Nzambi ayi. Kadi nansha nanku bivwa bikengela yôyì kucijingulula, civwaYe aci, bwalu ki cyakaMwenza Nzambi mwômò amu.

<sup>280</sup> Ndi ndikonka mudimu Wende wa bwambi ní udi wenda ùbànda mushindu umweumwe awu mu matuku a ndekeelu, mushindu uvwawu awu? "Anu bu mudi Taatù muntume Mêmè, nenku Mêmè paanyi ndi nnutuma. Byenzedi bîndì Mêmè ngenza nenùbyéñzè peenu."

<sup>281</sup> Bajimine, kabayiku mwa kusungidiibwa to. Bakaavwa babenge luse. Ki civwa Nkokelu Wende Mwisâtù ncycòci aci.

<sup>282</sup> Mpindyewu kudi lukonko anyi? Nkokelu Wende wa Kumpala, Úvwa wòndopa babeedi. Ncya bushuwa anyi? Mudimu Wende Mwisâtù wa bwambi, Úvwa ngwà kwamba ciprofeta. Mudimu Wende Mwisâtù wa bwambi uvwa nkuyiisha kwa bavwa bajimine Cyendeleele. Mikuna isatu ayi, ne bikwabo; bajimine, Cyendeleele!

<sup>283</sup> Mudimu wa bwambi wa Noa, midimu yônsò ya bwambi, mmyenze cintu cimwecimwe aci. Noa wakayiisha. Aci ncya bushuwa menemene. Wâkabwela mu bwâtù. Nenku paakabwelaye mu bwâtù, kwakapita matuku mwandamutekete avwa cintu kaciyi cyenzeke to. Bujaadiki bwende bwakayiisha bavva beediibwe mulawu.

<sup>284</sup> Sodoma ne Gomola! Yesu wakateela byônsò bibidi abi ne nebilwe. “Kumpala kwa dilwa dya Mwânà wa muntu, nebiikale anu mwakadi matuku a Noa, nebiikale anu mwakadibi mu matuku a Sodoma.” Wakateela Noa.

<sup>285</sup> Noa wakapeta Nkokelu Isatu, ne Mwisâtù wende uvwa nkudi bajimine paanyima paa ciibi cimana kukanga. Bwalu, Nzambi wakashiya bwâtù kacya bwasòmba mwaba awu, muvwa muntu nansha umwe kayi mwa kubwela anyi kupatuka to. Bakaavwa basanganyiibwa munda. Bwalu, (bu pa mukuna wa mwandamutekete) mukuna wa mutambe kutumbuka awu, ki paakateekaYe bwâtù, mukuna. Nwamonu anyi? Ncya bushuwa anyi?

<sup>286</sup> Mu matuku a Sodoma, Nkokelu wa Kumpala uvwa mmwakane Lota awu. Ne Bible mmwambe ne: “Mpekaatu ya Sodoma yivwa yitacisha musuuka wende mwakane ku dituku ne ku dituku,” mushindu uvwa bakaji abu benza maalu ne bivwabo benze abi.

<sup>287</sup> Nudi bavuluke: “Anu mwakadibi mu matuku a Noa.” Bavva benza cinyi? “Badya, banwa, baselangana, basediibwa.” Bakaji, nwamonu’s, bakaji. Civwaku ncinyi mu matuku a—a Sodoma? Bakaji.

<sup>288</sup> Ne mukenji wa Kumpala uvwa Lota. Baakamuseka ne kumwelulwila.

<sup>289</sup> Pashiishe kutumabo baamusanjeela bakwabo, babidi, ki kupwekabo. Ki civwa Nkokelu Mwibidì bwa Lota...bwa Sodoma.

<sup>290</sup> Kadi tangilaayi Wâkaya wa ndekeelu awu, kudi luse lutamba kuvulangana anu kuvulangana. Byônsò byakajika musangu awu, byônsò bijike pa dîbâ adi. Musanjeela mwisâtù wâkapwekamù awu, Nkokelu Mwisâtù awu, Yéyè uvwa cinyi? Mmudimu wa bwambi wa mushindu kaayi uvwaYe naawu? Wâkasòmba ne basungula, ne wakabambilà civwa cyènzekà paanyima Pende. Ncya bushuwa anyi? Kadi paakabwelaYe mu Baabulona, anyi mu Sodoma, Yéyè uvwa muswe kupetamu...

<sup>291</sup> Nansha Abraham mwine, udila ne: “Kadi bu mêmè mwa kupetamu baakane makumi ataanu?” Wenda upweka too ne ku “baakane dikumi?”

Nzambi ne: “Eyo, petaaku biine baakane dikumi abu.”

<sup>292</sup> Lekela nkwambileku cintu kampanda, wêwè mwaneetu wa bakaji, katanci kakese cyanaana. Udi mufwanyine kwikalà wa

cyena kale, kadi mwikale ne cintu kampanda cidi bakaayòwa-wa-bayombò aba kabayi naaci to. Wêwè udi ne cintu kampanda cidiye yéyè awu kayiku mwa kupeta to. Cya bushuwa. Udi mufwanyine kwikalala wa cyena kale mu webe mvwadilu, muvwale bu inàbànzà. Bôbò mbafwanyine kwamba ne: "Monaayi munsantu wa kale mubunguluki wa mu malaba wawa." Kutacishi meeji to. Yéyè udi ne cintu kampanda cidi kaakaayòwa-wa-bayombò kaa kale aku, kàdì baa pa buloba bônsò bakatangile pambelu pààpa aku, kakayiku naaci to. Kôkò kakeenaku mwa kucipeta to. Nkajime, Cyendeleele. Nkeediibwe mulawu. Wamonusi? Kakeenaku... Wêwè udiku ne maalu mîmpè a mu nsòmbelu; udi ne ngiikadilu mulenga. Kôkò aku kakeena ne cidiku naaci to nansha cimwe. Kôkò kadi ne cîshì cyela ku ndobo cidi cikwata misuuka mijimine mu buteyi bwa kuyikupa mu iferno. Mpofo udi ukabwelamu wenda wenda lwà makàsà. Kadi, wêwè udi ne cintu kampanda.

<sup>293</sup> Udi mumanye, udi mufwanyine kwikalala kuyi nansha mu mukanda wa ménà wa ekeleesiya to, kadi nsòmbelu webe mwakane awu ngudi mufwanyine kwikalala ukanda ciiji cikole cya Nzambi bwa kulengaci baa pa buloba leelu ewu. Baa pa buloba kabaakuciitabuuja to. Wêwè mukaji udibo babiikila ne mmunsantu mubunguluki wa mu malaba awu, wêwè mulume mukese udi kuyi ne cyûdi mumanye awu, kadi mwikale udidila Nzambi, muunya ne bufuku, bwa mpekaatu ya ditunga, s'udi mufwanyine kwikalala ewu udi ukanda ciiji cikole aci. "Bu Mêmè mwa kubapetamu dikumi, Nêndekelè musoko. Bu Mêmè mwa kubapetamu dikumi!" "Anu mwakadibi mu matuku a Sodoma, ki mwikalabi kabidi." Nudi bamone cîndi muswe kwamba aci anyi?

<sup>294</sup> Kî nne: "Bu Mêmè mwa kupetamu ba-Méthodistes dikumi, bu Mêmè mwa kupetamu ba-Baptistes dikumi, bu Mêmè mwa kupetamu beena Mpenta dikumi, bu Mêmè mwa kupetamu benji baa manayi a dipiiyangana dikumi, bu Mêmè mwa kupetamu baacipwita-mùnwàmfwankà bakulumpe dikumi, bu Mêmè mwa kupetamu bambi dikumi" to.

<sup>295</sup> Kadi: "Bu Mêmè mwa kupetamu baakane dikumi!" Kudi Mwakane anu umwepele, ki Kilisto. Kilisto mwikale ne mwoyi mu Umwe, baa nanku dikumi, nwamonusi: "Nêndekelè musoko."

<sup>296</sup> Kadi Musanjeela wa ndekeelu awu wakayiisha bavwa beediibwe mulawu. Wêwè udi wamba... Yéyè wakapwekamu. Mufundu kawena wamba ne cyàkenzekà ncinyi to, kadi kapya kaakaloka paakacyabu mu dinda, cya bushuwa, paanyima paa Yéyè mumane kwenza bimanyinu abi, dyakamwe paanyima paa Yéyè mumane kwenza mudimu Wende wa bwambi wa ciprofeta awu. "Sarah waseki bwa cinyi?"

Yéyè ne: "Ncyêna museke bwala."

Yéyè ne: “Eyowa, s’wâsekì.” Nwamonu anyi?

<sup>297</sup> Mpindyewu, dyakamwe paanyima paa cyôci aci, Yéyè e kubwela mu Baabulona, anyi kupweka e kubwela mu Sodoma. Kaakabasanganaku to, pa nanku kypyä kulokaku. Yéyè wakasangana Lota ne bânà bende baa bakaji babidi, e kwamba ne: “Patukaayi muneemu anu patudi twakulangana apa.” Nwamonu anyi? Cyôci kupatuka. Yéyè wakapwekamu. Vulukaayi ne, Yéyè uvwa mu njila Wenda upwekamu. Wakatuma baamusanjeela kumpala Kwende, kadi Yéyè wakapwekamu Yéyè mwine, cya bushuwa, bwa kujandula ne cintu cyônsò eci mmuvwaci anyi. Kadi Wakasangana mwaba awu mûle tente ne cinyi? Bakaji ne bilaabu kwísù. Mukenji kudi badi beediibwe mulawu. Bôbò abu baakenza cinyi? Baakaciseka.

<sup>298</sup> Cidibo benza ncinyi leelu ewu? Cintu cimwecimwe aci. “Mêmè ndi mwena Assemblées. Mêmè ndi wa ba-Unitaires. Ndi—ndi... Nkaadiku muje maja mu Nyuma. Butumbi kudi Nzambi, ntu ngaakula mu...” Eyo, tungunuka nda wêwè anu kumpala. “Mêmè nêngìikalè nkosa nsuki yanyi pândì muswe kukosa. Nêngènzè cikampanda. Mêmè nén—nêngambahè anu cikansanga. Kabyena bikengela bwa mêmè kubatijiibwa mu Dînà dya Yesu to. Cidi cyambiibwe aci ncyéna—ncyéna naaci bwalu to. Pôlò awu’s mmukinyi wa bânà bakaji wa kwônsò eku, twamb’eku twamb’eku. Aci’s...” Eyo, tungunuka nda wêwè anu kumpala.

<sup>299</sup> Dimwe dya ku matuku adi pansi aa, pawikala kuyi mwanji kucyenza to, wêwè’s neusambuke mukalu awu. Kwadyakujingaku kabidi bwa kwenza cidi cyakane to. Uvwa muumvwâ mwambe aci anyi? Aci’s ncishimbi-diyi. Mwaneetu wa balume, mwaneetu wa bakaji, udiku mumanye cidi cyambiibwe aci anyi? Wêwè neusambuke mukalu awu, ne kwadyakujingaku kabidi kucyenza to. Neutungunu ke anu ne kuteeleja Evanjeeliyo, cya bushuwa, kadi kwadyakuMwitabaku to. Kwêna mwa kuMwitabaku to. Kadi Evanjeeliyo neikale uyiishiibwa kudi badi beediibwe mulawu, aba badi bajimine Cyendeleele, kabacyi mwa kusungidiibwa to, cyakabidi nkwadi. Wêwè ukaadi mumane kwikala peebe mu mwine mwaba awu, kadi kuyi mucimanye to. Udi wela meeji mûdî mu nsòmbelu wa bisankasanka, kadi mufwe paudi ne mwoyi apu.

<sup>300</sup> Kaa, teeleja. Bônsò baakabenga Mukenji wa cikondo abu, kumpala kwa kabutu, Evanjeeliyo wakanji kuyiishiibwa kudi bavwa beediibwe mulawu, dyambedi, kumpala kwa kuyabo; kakuciyyi luse to. Noa, mukangila munda, civwa mbujaadiki. Nzambi ngwâkakângâ ciibi aci, paanyima paa Nkokelu wende Mwisâtù. Paanyima paa Nkokelu Mwisâtù mu Sodoma, biibi byakakangiibwa. Kakucivwa kabidi luse to. Dikumi abu kabavwa mwa kupeteka to. Nenku bajimine abu baakayiishiibwa Evanjeeliyo, bavwa kabayi mwa

kusungidiibwa abu, bwalu civwa anu... Bivwa anu mushindu awu mu cikondo cyônsò, cikondo cyônsò citu cibenga Mukenji kumpala kwa dilumbulwisha.

<sup>301</sup> Mbacyenzè kabidi anyi? Nki bwa cinyi dimweneka mu Dikunji dya Kapya dya kwinshi ku musulu eku adi anyi? Nki bwa cinyi dimweneka mu Mukenji wa dizengela dya bakaji panshi ewu, ne diteeka dya bintu pa kaaba kaabi kadi kakengela, ne ditandisha dya bambi badi baditeeka ku luseke lwa dingumba pamutu paa kushala biimanyine pa Dîyi abu anyi? Paabi, Nzambi mmushindike anu mu kantu ne kantu ne n'Yêyè, ne kí ncinyonga kampanda cidi kaciyi cilonge kalaasa bu muntu eci to. N'Nzambi! Nenku tukaadi mpindyewu bafike pa mwaba udi Nkokelu Mwisâtù mufwanyine kwalukila cyakabidi kudi bajimine Cyendeleele, anyi?

<sup>302</sup> Kí civwa cikeena-kumona aci cimpèëshila, pâncìvwà mwânà mutekete menemene kuntu kwaka apu anyi? Ki mêmè kuya ku Wesete, nenku ki Nkuruse wa ngôlò wa Evanjeeliyo wawa utuma nsesa panshi, mwambe cimanyinu cya mu Dyulu, anu mu cyôcì menemene. Vulukaayi ne, nkuruse awu uvwa mu mwaba wà mmwenekelu wa kacya anu waya, mwenze bu-mwenze bu cipaapu cya musaka, kabidi, ciibaka. Nwamonu anyi? Ncifwanyine kwikalà citupa cya kumutu kudici cijikile, cibangile *apa* ne cikafikile ku mutu anyi?

<sup>303</sup> Bu mudi cipaapu cya musaka, cibànda cipicila mu Luther, Wesley, Mpenta, ne pashishe dyasa dya mùsongà ku dibwe. Ncifwanyine kwikalà cyôcì aci anyi? Piikalabi ne ncyôcì aci, tukaadi penyi? Cyôcì aci, ncidì eci cifwanyine kwikalà. Ndi ntekemena ne kí ncyôcì to, kadi's cyôcì cidi ne cya kufika. Neciikale. Vulukaayi anu ne, bikengela bwa midimu ya bwambi ayi, yinwangane misangu yônsò mushindu anu umweumwe awu, ne mukwabo awu. Bikengela awu ulwe. Ne Nzambi katu ushintuluka to. Elanganaayi meeji pa bwalu abu!

<sup>304</sup> Suma kondo keebe kaa mwoyi aku ne ménù ebe a nyuma, kadi ujandule ne tukaadi penyi. Kadi bu ne ncyôcì, peebe mucikâle anu mushindu wûdì awu? Nenku's mbipiciibwe ne wêwè mwende... Kwebe's nkujike, nwênù badi pambelu abu. Paanyima paa Mukanda bamane kuwangata kudi Mwânà wa mukooko, Citampi Ciisambombo ncibuulula ne Bitampi byônsò, nkujike. Nkufwanyine kwikalà kujikè. Ndi ntekemena ne kí mmwômò to. S'mbifwanyine kwikalà nanku. Eyo.

Mpindyewu, mbwa nanku budi Nkokelu Mwisâtù ewu mutambe kunenga nunku anyi?

<sup>305</sup> Monaayi ne, Nkokelu wa Kumpala ne Nkokelu Mwibîdi mmiye kuumukila ku ewu kuya ku mukwabo. Ngâkadyànjila kwamba, nudi bavuluke, pâncìvwà mbangilaku apu, mu wa Kumpala amu. Ki mêmè kwamba ne: "Nekulwe cikondo ciikalàCi mene mwa kumanya maalu masokome a mu mwoyi."

Nudi bavuluke anyi? Mbanganyi? Mona's, nwêñù bônsò s'nudi bavuluke cyôcì aci, mu masangisha aanyi a eku ne eku. Ki dilolo kampanda ndi mwenze anu mbwela mu Regina, kuntu kwaka, ki mêmè kubanda pa cibumba cya ku cyambilu; ne Mwaneetu Baxter kuntwaku, bantu binunu ne binunu. Ki muntu kampanda kubàndayè pa cibumba cya ku cyambilu apu, [Mwaneetu Branham udi utuuta cishonto musangu umwe—Muf.] kadi ki cyôcì aci's. Nenku kubangila anu mwaba awu cikaadi anu cimwecimwe aci.

<sup>306</sup> Kadi kukaadi bidimu kûnkaadì muumuke mu budimi bwa bwambi, bidimu binaayi, bu bitaanu nanku kacya nkuumuka. Neinyi ciine aci? Neinyi cidi cyenze cyôcì eci? Ki bwa cinyi bivwa bu ku cibangidilu, mu Genese ne: "Mwoyi mule wa Nzambi" anyi?

<sup>307</sup> Vulukaayi ne, paakafuka Ye dyulu ne buloba, mu dituku dya mwandamutekete Yéyè kaakafuka cintu nansha cimwe to. Yéyè wakiikisha. Nwamonu anyi? Nzambi uvwa ne mwoyi mule mu cidimu ciisambombo aci, kayi muswe ne muntu nansha umwe afwe to, kadi bwa bônsò bafike ku kanyinganyinga. Nzambi uvwa ne mwoyi mule.

<sup>308</sup> Cyakabidi, kabidi, mu Genese 15.16, panwikala baswe kucifunda, 16, 15. Yéyè wakambila Abraham ne: "Mwamwa mu buloba bwa beena Amola, bubi bwabo," mpindyewu bôbò abu's bavwa baa Bisamba bya bende. "Ncyêna mwa kukufikishamu mpindyewu ewu to, bwalu bubi bwa beena Amola, baa Bisamba bya bende abu, kî mbwanji kuula tente to. Kadi Mêmè nêmbâlumbulwîshè. Nêndwe mu lukongo lwinâyì amu, kadi pa dîbâ adi Nêndumbulwîshè ditunga adi ne dikombo dya cyamu." Ncya bushuwa anyi?

<sup>309</sup> Kukaadi muküngùlù mule menemene, kùdì mwoyi mule wa Nzambi, mudimu wa bwambi kacya anu wamonangana, ku mikaba ya mêtì ne bikwabo byônsò, mukebulule mu buloba bujima, bwa kumona ní kucidiku kabidi mukwabo nansha umwe anyi? Kadi pàmwâpa mwine wa ndekeelu awu nêmmufùmè ku dibwela matuku adi pansa aa's. Civwa mbubi bukaadi—bukaadi bwenze munèngànèngà anyi? Piikalabi ne Yesu udi umwèumwè awu, ne ki cidiYe, Ebelu 13.8, Mukenji Wende's udi ne cya kwikala umweumwe awu. (Nkaadi ndilongolola bwa kujikija.) Cyenzedi Cyende cidi ne cya kwikala anu cimwecimwe aci.

<sup>310</sup> Piikalabi ne Nkokelu wa Kumpala ne Mwibîdî kî nya kwela mpatà to! Kudiku mpatà kampanda mu meeji enu amu pa bidi bitangila Nkokelu wa Kumpala ne Mwibîdî anyi? Mbyenzeke menemene anu mwâkabyâmbâYe anyi? [Disangisha didi dyamba ne: "Amen."—Muf.] Kadi mbwa cinyi kwela mpatà bwa Mwisâtù? Nwamonu anyi? Bwa cinyi bunudi baswe kuMwela mpatà? Ibidi ya kumpala ayi's mmishindikiibwe ku

Mifundu. Nyawu ngänùjaadikìdì mu dinda emu ne Mwisâtù mmushindikiibwe ku Mifundu, yéyè pende.

<sup>311</sup> Tapaayi dísù pa buloba, monaayi ne bukaadi penyi. Tangilaayi numone mudibo babenge Bulelela, ne mudi cyôci aci cishindikiibwe anu pyöpyopyö, pa bidi bitangila ciprofeta. Mpindyewu tukaadi penyi? Eyì Nzambi, wâfwakù luse! Aci's cidi cizanyisha mashi mu mwöyi wanyi wa munda. Kadi bishi bwa cyôcì aci? Tukaadi penyi?

<sup>312</sup> Vulukaayi ne, nsongo eyi ya mikuna mwandamutekete kuntu kwaka yaya, cyôcì aci ncidi cifwanyine kunwambila bwalu. S'cidi... Kakwena lusongo lukwabo lwa mukuna paudi upita cyôcì aci to. Cidi mu Mulongo wa Mikuna ya mabwe. Cidi ciya buludi cikabwela too ne mu cipeela, kubangila piine apu. Cyendeleele cidi cibanga. Nsongo ya mikuna mwandamutekete, anu mu Mulongo wa Mikuna ya mabwe menemene. Aci cidi menemene anu pankaci paa bulelela ne mashimi. Ne kundekeelu kwa aci, Nkokelu Mwisâtù nguvwa Nkokelu wa ndekeelu wa mu mulongo wa mikuna ayi. Ncya bushuwa anyi? Nwamonu anyi? Eyo.

<sup>313</sup> Noa wakabwela munda, pashiishe paanyima paa matuku mwandamutekete, cintu nansha cimwe kacyakenzeka to, nwamonu's. Mu matuku mwandamutekete dinyooka kulwadi. Biìkalapù nanshà ne... Teelejaayaaku mpindyewu, bwa kujikija. Biìkalapù nanshà ne, mu cikondo cya Noa, bôbò bavwaku bamanye cimanyinu aci! Biìkalapù nanshà bamanye's we! Mpindyewu nkaadi njikija. Biìkalapù nanshà bamanye cimanyinu aci, baa pa buloba mu diine dituku adi! Ne, Nzambi mmujaadike mwab'ewu, ku dibala dya Mufundu, katanci aka ne, Yéyè wakabutula bantu abu.

<sup>314</sup> Kì nne kakuvwa luse to; luse lwakatumiibwa kudibo kudi muprefeta. Kabaakaswa kulwitabuuja to. Nzambi utu mwena luse, kadi, Yéyè wakatuma luse kadi bôbò kabaakaswa kulwakidila to. Yéyè utu misangu yônsò anu utuma luse, dyambedi.

<sup>315</sup> Ambaayi tûng bu bôbò bamanye ne cimanyinu aci civwa ncimanyinu cya cikondo cya nshiikidilu? Kadi mbenze anu bamona, dyakamwe, lupandu paalulumba luumuka. Muntu nansha umwe, nwamonu's. Mbyenze anu, katanci aka, ciibi cyumba cikangiibwa. Bu bôbò... Kuvwa muntu anu umwepele cyanaana wâkamanya cimanyinu aci, uvwa n'Noa ne kasumbu kende. Ki umwepele wâkamanya. Paakadikanga ciibi aci, Noa wakacimanya. Noa wakamanya ne ki dijikija ndyôdi adi. Wakacimanya. Ncya bushuwa. Nwíkalapù nanshà mwa kumanya cimanyinu's we!

<sup>316</sup> Kaa, biìkalapù nanshà bamanye cimanyinu aci, paakamonabo Yéyè ewu ubwela, wa bwena uvwa ne Abraham kuntu kwaka awu!

<sup>317</sup> Biìkalapù nanshà bamanye ne Billy Graham wa cyena leelu wa mu dituku adi awu, nyéyè wâkapweka kuntu kwaka awu, yéyè ne Oral Roberts, ne baakaiiisha bantu bafofomija abu mukenji awu! Biìkalapù nanshà bamanye, ba-Méthodistes ne ba-Baptistes baakane baa kale baba ne civwa ncimanyinu kudibo mu dituku adi, Lota, pavwa mpekaatu yitacisha misuuka yabo bôbò miine ayi. Kadi ba-Méthodistes ne ba-Baptistes abu baakakudimuka e kushaala cinyi? Anu mwakenza Lota, cintu cimwecimwe aci. Kadi mwakane awu, mu mwaba awu, wakapatuka. Bushuwa's.

<sup>318</sup> Apu nî mpaakapweka Billy Granham apu? Biikale baya bwa kwangata dipangadika, benda bacyankunya bàzòkà, batuutangana tuubintu, baseka, ne nsuki mibebula, kwîsù kulaaba bilaabu, kadi kabayiku benza cintu nansha cimwe pa bwalu abu. Baalukila dituku didi dilonda, nenku Billy kwamba ne: "Ndi mpeta binunu makumi asatu; dya ngaalukila mu cidimu cimwe, nciyiku mwa kubapeta nansha makumi asatu to."

<sup>319</sup> "Kaa, s'ngângâcì dipangadika's. Neya—ncya—ncyakuya mu iferno to; nênye mu Dyulu, wamonu's," wenda wendela anu mu mpekaatu pa yôyi. Biìkalapù nanshà . . .

<sup>320</sup> Paabi pa dîbà diine adi Evanjeeliyo mwikale uyiishiibwa mu Bukole's, ne bimanyinu ne maalu a kukema, ne Dikunji dya Kapya kumutu kwa byôbì abi, ne bintu byônsò biikale byenzeka anu mu byôbì menemene, biine abi bidyanjila kwamba ne biteeka patooke. Biìkalapù nanshà . . . Baakamba ne: "Musùmbà wa bansantu babunguluki baa mu malaba aba. Cintu's ndubuku. S'nnyma wa mushindu kampanda wa bampàkààmàngà's. S'ndémon, s'ki cyônsò cidiCi ncyôcì aci. KanùCítâbùùjiku to. Kacitu mu bulongolodi bwetu twêtù to. Katwena bwalu ne Cyôcì aci to." Biìkalapù nanshà bamanye cimanyinu's we! Biìkalapù nanshà bamanye!

<sup>321</sup> Yesu wakamba, ne: "Wíkalapù nanshà mumanye dituku dyebe, Yelusalema. Wíkalapù nanshà mujingulule! Kadi," ne, "bwa mpindyewu kaayi wadishaadidi kwôkò." Nwamonu anyi? "Wíkalapù nanshà mumanye. Wêwê Yelusalema, Yelusalema, mmisangu bûngì munyi yînkaadiku Mémè ewu muswe kukukungwija, mushindu udi nzoolo ukungwija twânà twende, bwa kukulama ku manyooka adi ne cya kulwa! Kadi wêwê kwakamanya dituku dyebe to." "Wêwê wâkaasa baprofeta mabwe, ne wâkashipa baakane, wíkalapù nanshà mumanye dituku dyebe! Wíkalapù nanshà mumanye, ne mwikale mumanye Mufundu webe, ne mumanye ne dilwa Dyanyi divwa ncimanyinu cya ndekeelu webe. Mpindyewu udi mpofo. Mpindyewu watandishiibu. Cikondo cyebe cyâtù ku ntengu." S'cyakatwa ku ntengu. S'ncya bushuwa. "Wíkalapù nanshà mumanye cikondo!"

<sup>322</sup> Tangilaayi, paakamba Yesu dìyì adi, baa pa buloba baakaya anu batungunuke. Nwamonu anyi? Baa pa buloba baakaya anu batungunuke, anu mwabo ne kale. Bwa cinyi? Bwalu kabaakamanya dibà dyabo to.

<sup>323</sup> Baa pa buloba baakaya anu batungunuke, paakabwela Noa mu bwâtù. Baa pa buloba baakatungunuka anu nanku. Baseki, mu dituku adi, bavwa anu benza maa-fêtes a dyenda dya masandi. Bavwa anu badya, banwa, baselangana, benza bintu bidibo benza leelu ewu ebi. Anu menemene, anu mwabo ne kale. “Ha-ha! Munsantu mubunguluki wa mu malaba wawa wâkângi ciibi's. Mpindyewu, kacyakacya nwêñù aba ku bafwe ne ku bàbòlà nukaadiku bumvwe cintu bu nanku anyi? Ha-ha! Nudi bamanye cidiye wamba? Twêtù bônsò aba ‘netufwe mu mâyi.’ Macimbu's we! Mâyi miine awu adi kwépi’s?”

<sup>324</sup> Baseki, mu matuku a Noa. “Ki mwikalabi kabidi ku dilwa dya Mwánà wa muntu.” Eyo. Noa wakamanya cimanyinu. Cintu cimwecimwe aci mu matuku a Lota. Bintu bimwebimwe abi mu matuku a Yesu. Ki mudibi kabidi leelu ewu's. Badi baseka bwa musangu wabo wa ndekeelu...?...

<sup>325</sup> Bya mwomumwe ne mu Sodoma, kabaakamanyak to. Pavwa Musanjeela awu mwimane pààpa, Mukenji wa kudi Nzambi, baakabaseka anu cyanaana ne baakakeba bwa kubanyaanga ku byenzedi byabo bôbò abi. Ncya bushuwa anyi? “Bwela udivwije wa kutudi. Ikala umwe wetu.” Ncya bushuwa anyi? “Bwela udivwije wa kutudi, ikala umwe wetu. Newikale umwe wa ku bansongaalume aba. Lwâku's, divwije umwe wa kutudi.” Nwamonu anyi? Kabaakamanyak cimanyinu cyabo to.

<sup>326</sup> Kabaakamanya ne pavwa Mukenji awu wambiibwa apu, ne ciine...Kabavwa mwa kucimona to, ne kapya ne ciiji cikole cya dinyooka, cya Nzambi, ndimi ya kapya kaa soufre yivwa mibange kuteema mu maulu to. Kabavwa mwa kukamonaku to. Baamusanjeela bôbò bavwa mwa kukamona. Uh-huh. Lota uvwa mukamanye, yéyè pende. Ùvwa mumanye ne kavwamu. Cyu bushuwa.

<sup>327</sup> Bya mwomumwe ne leelu ewu, anu cintu cimwecimwe aci. Ciiji cikole cidi munkaci mwa kuteema, bombes ya mushinda mmilembelele, bintu byônsò bikaadi ku nshiikidilu. Mbya mwomumwe mpindyewu.

<sup>328</sup> Tangilaayi, nwêñù, teeleejaayi. Nutu bamanyekeu ne... Nudi nwamba ne: “Mwaneetu Branham, kaa, kadi bishi bwa byônsò ebi?” Nudi bamanye's, bantu badi mwa kutungunuka anu ne kuyiisha Evanjeeliyo anu mwabo ne kale, cidibo babiikila ne ng'Evanjeeliyo aci, s'nkufwanyine kwikala kumane kujika. Baakenza nanku mu matuku a Noa. Baakenza nanku mu matuku a Lota. Baakenza nanku mu matuku a Yesu. Ncya bushuwa anyi?

<sup>329</sup> Nansha beena Yuda, paanyima paa Yesu mubâmbile ne ciiji cikole... “Bwenu mbantuuke. Kwenu nkumane kujika. Kakucyena kabidi cintu to. Kwenu nkumane kujika.”

<sup>330</sup> “Kaa,” mwakamba awu, “munsantu mubunguluki wa mu malaba wawa. Mmu cilongelu kaayi mudiYe mujikijile? M’Mufumine penyi, mwine wawa?”

<sup>331</sup> Vulukaayi ne, Yéyè ukaavwa pa dîbà adi mudikumbaje bwa Nkokelu Wende Mwisâtù. Uh-huh. Ncya bushuwa. KwambaYe ne: “Mmisangu bûngì kaayi yînkaadiku Mêmè ewu muswe kukukungwija!”

<sup>332</sup> Lota wakenza dibiikila dyende dya ndekeelu... anyi, ndi nswa kwamba ne, Mwanjelo ngwâkenza, musanjeela, nansha Yéyè mwikalé nganyi. Nzambi muleejibwe bwa dituku edi, Nzambi muleejibwe mu mubidi wa buntu, mwenze cimanyinu cya ndekeelu, mwenze mudimu wa ndekeelu. Byônsò byakajika pa dîbà adi.

<sup>333</sup> Noa wakayiisha diyiisha dyende dya ndekeelu; ciibi cyakakangiibwa paanyima pende. Kwakajika. Kucisekabo, ne kucyelulwilabo.

<sup>334</sup> Elaayi meeji, bantu badi anu mwa kutungunuka ne kuiyisha! Nsangilu wa Bukwântèndeelu udi mwa kudisanga ne ekeleziya wa Katolike, anu mudibo balaye ne nebénzé amu. Malongolodi ônsò adi mwa kulwa, kadi cimanyinu cya nyama wa lwonji cikaadiku. Badi bacyangata, mu cyôci aci. Nwamonu anyi? Kadi badi bamba ne: “Kaa, aleluuyah, Nzambi abeneshiibwe, s’nkusungidiibwe bantu bûngì kampanda maalaba dilolo.” Bushuwa anyi? “Mbaje maja mu Nyuma. Mbâakule mu myakulu.” Aci kacyena cyumvwija cintu nansha cimwe to. Nwamonu anyi? “Kaa, mbapole ne baa musangeelu ne badipwekeshe. Eyowa’s, mukalenge. Badi ne mamuma a Nyuma.” Cimanyinu kí ng’aci to. Nansha kakese.

<sup>335</sup> Indilaayi nnupe mamuma a Nyuma, pankaci paa Yesu ne Bafaalesa, bwa numone ne uvwa ne mamamu a Nyuma ki nganyi. Kadi bu mêmè mwa kujuuka, bu mûnkaavwà mubange kwamba katanci aka amu, kwangata luseke lubengangane ne lwa Kilisto mpindyewu bwa katanci kakese aka? Nzambi amfwileku luse anu bwa kwamba mene kwa ciine aci aku, nwamonu’s, kadi bidi anu mbwa kunuleea cintu kampanda.

<sup>336</sup> Kadi bu mêmè mwa kulwa kunudi kadi kwamba ne: “Ambaayibi tûng, nwêñù disangisha, wenu mulunda nganyi? Udi uleeja mamuma a Nyuma nganyi? S’mmwakwidi wenu wa kale wa musangeelu awu. Utu ulwa kûdì mu lupitaadi paudi usaama nganyi? S’mmwakwidi wenu wa kale wa musangeelu awu. S’ncya bushuwa. Nganyi utu misangu yônsò ùkusombesha mfranga paudi tuyipangile, padi maalu makufimpakaje? Nwêñù bidimba bya disangisha dyende aba, kanutuku nuya kudi mwakwidi wenu wa kale wa musangeelu awu ùnùsombesha

mfranga anyi? Nwamonu anyi? Nganyi utu misangu yônsò anu wa dinanga ne wa musangeelu, mwikale uleeja mamuma a Nyuma? S'mmwakwidi wenu wa kale wa musangeelu awu.

<sup>337</sup> “Utu mulonge bidimu ne bidimu nganyi, mu nsunàngòngà eyi, mwakapatukilabo kudi tatwéndè wa tatwéndè wa tatwéndè wa tatwéndè too ne kwinshi? Nganyi utu mulonge ne mupete... mwenze mudimu mukole bwa kupeta mapolome a bu-docteur a PhD ne a LLD, bwa kumanya Dîyì edi, ne kwimana mwaba ewu ne kunuyiishadi mu dinda dya dyalumingu dyônsò mu disangisha dyende? S'mmwakwidi wenu wa kale wa musangeelu awu.

<sup>338</sup> “Muntu mupidye diitabuuja ewu ki nganyi pende’s, udibo babiikila ne, ‘Yesu’ ewu? Mmujikijile Yéyè mwine mu cilongelu kaayi? Mmupatukile Yéyè mu cilongelu kaayi? Kende karta kaa buumambala kadi penyi? Yéyè mwine ngwa mu bulongolodi kaayi?

<sup>339</sup> “Yéyè mwine utu wenzaku cinyi panudi ne makokyanganyi a mu famiye? Utu ulwa kunudi nganyi? S'mmwakwidi wenu wa kale wa musangeelu awu, bwa kuteeta... Wêwè ne makokyanganyi ne mwena mutumba neebe mwaba ewu, mwakwidi wenu wa kale wa musangeelu awu’s ngudi ulwa ùnùsùnga. Wàmba ne: ‘Nwénù bônsò aba’s nudi bânà baa Nzambi. Kî mbîmpè nwénù kwenza nanku nansha.’ Aci ki cituye...

<sup>340</sup> “Kadi Yesu wa mu Nazaleeta ewu udi wenza cinyi? Udi ubinyanga’s. Ùdi Yéyè wenza cinyi? Wàmba bulongolodi bwenu mambavi bantu bitangile. Ùdi Yéyè wenza cinyi? Mmujuuke e kubiikila mwakwidi wenu ne ‘mpofo mulombodi wa bampofo.’ Mumubiikile ne ‘nyoka mu bisoosa.’ Mmujuuke kwangata mulambu uvwa Nzambi mulombe awu, kadi kutonkola meesa ne miseba, kwimansa mfranga pambelu, kadi kubatangila ne ciiji. Kacyakacya nukaadiku bamone mwakwidi wenu awu mutangilangane mushindu awu anyi?” Mpindyewu mamuma a nyuma mwaba awu adi penyi? Uh-huh. Uh-huh.

<sup>341</sup> Kî nku dyakula dya mu myakulu to. Kî nku dija dya maja mu Nyuma to. Kî nku didiwija mwena ekeleesiya to. Kî nku mamuma a Nyuma to; beena Science Chrétienne’s badi mwa kutamba yônsò wa kunudi ku cyôci aci, nwamonu’s, kadi kuvila mene ne Yesu Kilisto kavwa Nzambi. Kî ng’aci nansha.

<sup>342</sup> Kadi n’Dîyì, diikale ne mwoyi! Ki cyôci aci. Biìkalapù nanshà batangile, Yéyè’s ki uvwa Maasiya. Yéyè uvwa Dîyì diikale ne mwoyi, dimweneshiibwe.

<sup>343</sup> Nenku mulume udi ne Nyuma wa Nzambi munda mwende, anyi mukaji, udi ne nsòmbelu wa Dîyì adi, didi ne mwoyi munda mwende. Ki dituuta dya mwoyi ndyôdì adi, badyànjila kulogolola, bwalu Dîyì dya Mukalenge didi dilwa kudibo, ne

bôbò badi Dîyì kudi bantu. “Mikanda mifundilangana mibala kudi bantu bônsò.” Ncya bushuwa anyi? Nkokelu Mwisâtù mmufwanyine kwikalà mumanè kubanga anyi?

<sup>344</sup> Nwêñù badi pa mikaba ya mêtì, nnwêñù badi bateeleja mukaba ewu abu, mvwa mwa kujinga bwa nwêñù kwikalà batapeku dîsù bamone disangisha edi pa dîbà edi. Uh-huh. Ndi ntekemena ne nudi peenu nudiyumvwa mushindu umweumwe ewu.

<sup>345</sup> Apu nî nyêyè ukaadiku ewu? Tangilaayi Mifundu mudiyi myungwija mushiki mwaba ewu. Mmufwanyine kwikalà ukaadi mubange anyi? Nkokelu Mwisâtù mbwa kuyiisha badi beediibwe mulawu Cyendeleele babenge Mukenji wa lupandu anyi?

<sup>346</sup> “Ee,” mûdì wamba, “ekeleesiya neaye...” Eyo, bôbò nebënzè nanku. Nebatungunuke anu kutungunuka, mushindu anu umweumwe awu.

<sup>347</sup> Kadi, vulukaayi ne, dîbà dyônsò edi, Noa uvwa mu bwâtù. Mukaji Musela mmutwibwe citampi munda ne Kilisto, cidimba cya ndekeelu cikaadi cipikudiibwe. Citampi Ciisambambo cikaadi cidileeje. Citampi cya Mwandamutekete cidi ciMwaluja pa buloba. Mwânà wa mukooko ukaadi mulwe ne mwangate Mukanda mu cyanza cya dyabalume cya Yéyè awu, ne musòmbe ne mumane kunana civwa bu Cyende, civwa Ye mupikule. Ncya bushuwa anyi? Citu misangu yônsò anu Nkokelu Mwisâtù awu.

<sup>348</sup> Isatu mbupwangane. Mudimu wa bwambi wakafika ku bupwangane bwawu paakapatulawu cyakabidi Kilisto mu mubidi, munkaci mwa bantu, mwakadyanjilabi kwambiibwa ne: “Bu mwakadibi mu matuku a Lota.”

<sup>349</sup> Kaa, elaayi meeji, bantu mbafwanyine kutungunuka anu ne kuyiisha, beela meeji ne badi basungidiibwa, biitabuuja ne badi benza bîmpè, biitabuuja ne malongolodi abo adi enda adyunda, cya bushuwa, kadi kakuyi kaaditekemena nansha kaa kânà to. Nenku piikalabi ne cikeena-kumona aci civwa ncyôci aci, ne ciikale cyumishe maalu ncyoncyoncyo bwa bakaji, twâfikì pa dîbà adi. Ciibi cikaadi cikanga, baye, Mukanda ukaadi mu cyanza Cyende. Anji elaayibi meeji ku bwalu abu.

<sup>350</sup> Lekelaayi nnwâmbìlè eci nunku kumpala kwa kujikija mpindyewu. Nkaadi njikija. Bavwa balonde bwalu, mwamwa mu Irlande, bitangilangane ne mâyì a mbû. Kuvwa mulongo munene wa mabwe mwikale wenda ulonda kumpengampenga kwa mâyì awu, ne lwà kuulu kwa kakuna kanene aka. Nenku kuvwa muntu uvwa wenda uya, wendela ku mwelelu aku dituku dikwabo, anu—anu pa dîbà menemene dya dibàndà dya mâyì a mbû. Kadi kuvwa muntu kampanda wa ngiikadilu milenga uvwa musòmbèle pa kiine kakuna aku, uvwa mumanye dibàndà ne dipweka dya mâyì a mbû adi. Uvwa mumanye ne mpa dîbà kaayi dya dituku pavwa mâyì a mbû awu ne cya kubànda. Ùvwa mumanye ne mpa dîbà kaayi pavwa mâyì a mbû ne cya kwikalà

mabànde. Mulumyana kampanda yéyè kavwa ucyuka bya díbà abi to. Ùvwa umwe wa ku ba cimanya-byônsò aba. Ùvwa yéyè ne wende mmwenen. Ùvwa mwena manayi a dipiiyangana, wa meeji matwe, muntu wa luumvu lutwe, kadi kayi anu mumanye díbà dya dibànda anyi dipweka dya mâyì a mbû to. Kavwa mumanye citupa cya buloba aci to. Kavwa mumanye ne mpa díbà kaayi pavwa cimanyinu ciikale mu cyôci to, pavwa ngondo umusha nyima kudi buloba.

<sup>351</sup> Kadi padi anu Nzambi umusha Nyuma Wende pa buloba, mwaneetu, kwabu's kwajiki, s'nkujike kwônsò.

<sup>352</sup> Ngondo wawa yéyè anu mudidinge muumuke kaaba kende aku, mâyì's mmafwanyine kubwikila buloba anu mwakenzekabi paakabubanga Nzambi apu, mu Genese 1. Kadi ngondo wàkasòmba mwaba awu, kadi padiye anu nansha utuma mutu ku luseke, mâyì a mbû adi abanga kubànda.

<sup>353</sup> Mukulumpe wa lungenyi uvwa musòmbèle mu bwikadi bwa cyôcì aci ewu, ùvwa yéyè mumanye ne mpa díbà kaayi pavwaci cyenzeka. Mulumyana ewu yéyè kavwa mumanye to. Kavwaku mucilonge to. Kavwa ucicyuka to. Ki mukulumpe wa lungenyi ewu kupatukaye lubilu, kwamba ne: "Mukwetu wanyi, wâmanya kudidingi wâya kule to. Alukila, lukasa. Kudi cimanu. Kwêna mwa kubànda pa cimanu aci to. Neubutuke. Kadi... Bimanyinu mbimweke, bya cikondo. Mâ—mâyì a mbû neicikile dyakamwe, ne kwakupeta mushindu wa kwalukila to. Kùtùngunuku ne diya to."

<sup>354</sup> Ki muntu awu kukudimuka, kumuseka, kwambaye ne: "Nda ukendele yebe. Mêmè ndi mumanye cîndì mwa kwenza ne cîndì nciyi mwa kwenza." Kadi mâyì a mbû akamubucikila's. Nwamonu anyi?

<sup>355</sup> Díbà didi mwa kwikala dimane kuya kupita mutudi twêtù twela meeji. Nwamonu anyi? Necikubucikile. Kùtùngunuku ne diya to. Kanwenji nanku to, nwénù. Panwikala misangu yônsò nungiitabuua bu musadidi wa Nzambi, itabuujaayi díyì dyanyi mu dinda emu, piikalabi ne nukaadiku bangiitabuuje. Díbà ndifwanyine kwikala dikaadi dimane kupita. Mifundu bûngì cyanaana yidi yileea ne bidi mushindu awu. Mpindyewu, vulukaayi ne, ncyêna ngamba ne mmudibi to. Ncyêna mumanye to. Kadi tangilaayi anu cyanaana.

<sup>356</sup> Kadi ngákòsu mabeji matwe ku dikumi mwab'ewu, bîmvwà ngumvwa bwòwà bwa kunwambila abi. Nwamonu anyi? Nwamonu anyi? Mandamu Wood udi ntemu wa bwalu abu, ne Mukalenge Wood. Pâmvwà myue mu dinda emu bwa kubamona, mvwa mwambe ne: "Ncyêna—ncyêna mwa kubambila aci to, ncyêna mwa kafika too ne kwôkò aku to. Nêmfilè anu Mifundu bûngì kampanda ebu, ne kubashiilayi, bwalu nebikwaciibwe pa mikaba." Nebiye.

<sup>357</sup> Nenku bantu nebaseke Mukenji ewu. Bidi anu bîmpè, kakwakwikala mushindu wa kukudimuka kabidi to, dimwe dya ku matuku adi panshi aa. Tungunuka, ikala wêwè anu cidimba cya ekeleesiya. Kosa wêwè anu nsuki yebe ayi, ikala anu udilaaba bilaabu kwîsù. Tungunuka, ikala anu wangata “Taattù, Mwânà, ne Nyuma Mwîmpè,” pawikala muswe, aci, ucivwije Nzambi isatu bwa wikale mumpangaanu. Tungunuka, shaala mukwate anu ku bulongolodi bwenu abu. Enza wêwè anu nanku, pawikala muswe.

<sup>358</sup> Udi wamba ne: “Nkaadi muje maja mu Nyuma, nkaadi mwakule mu myakulu; ndi muMupete.”

<sup>359</sup> Mêmè nkaadi mumonemone démons yenza cintu cimwecimwe aci. Nkaadi mumone balozi bakaji baakula mu myakulu ne bayandamuna; ne bafunda mu myakulu myenyi, bayandamuna; biine abu biikale banwine mashi mu kabalubalu kaa mutu wa muntu, ne biikale basoka dyabulu, baja maja mu nyuma.

<sup>360</sup> Ba-Muzulumanyi batu baja maja mu nyuma, mushindu awu, bakafika too ne ku dyangata bilangilangi badipayikabi mwinshi mwa minu; ne bangata difuma badibwejadi mu mpala batubula, mushindu awu, kadi badipatula, kakuyi kamata kaa mashi nansha kakese kapatukamu to.

<sup>361</sup> Ba-Indiens batu bendele mu mudilu, ku makàsà kutupu, mudilu wa bule bwa centimètres makumi citeema; ne centimètres lukama ne makumi abidi, makumi citeema, anyi lukama ne makumi abidi mu bucylama; bapwidija, bapuupula makala awu too ne padiwu ashaala matooke zee ne mudilu; kadi kabayi bapetaku nansha kaadibuba mu makàsà amu to, cibi biikale bavila ne kakutuku cintu paaci ne n’Yesu Kilisto to.

<sup>362</sup> To, to, mulunda wanyi. Dîyì ndidi dicyamba edi. Bikengela bantu ne Dîyì bilwe cintu cimwe. Nwamonu anyi? Yesu ne Dîyì bavwa cintu cimwe; Yéyè uvwa Dîyì. Ne padi Yesu ne mwoyi munda mwa muntu, aci cidi cimuvwija yéyè ne Dîyì bilwa cintu cimwe. Kwikadi . . . Nsòmbelu webe ngudi wamba cyûdì.

<sup>363</sup> Mpindyewu uditangile anu wêwè mwine mu lumwenu lwa Nzambi, wamba ne: “Ndi ne mmwenekelu kaayi mu dinda emu?” Patudi tusambilà apa.

<sup>364</sup> [Mwaneetu wa balume kampanda udi wakula mu mwakulu mukwabo. Mukwabo mwaneetu wa balume udi ufila dyandamuna. “Bânà Baanyi, leelu ewu, nyewu Nkwambila. Eyo, Mêmè mwine, Nzambi wa Bukole bwônsò, ngâtàngidi pa buloba leelu ewu. Ngámònu bubi kudibu bufikishe bufuki ebu. Eyo, Ndi mmona mpekaatu udi muntu, dituku edi, mudyélèmu. Eyo, wêwè kwêna mumanye ne Ndi mukwenzele cintu cinene anyi? Eyo, Ndi mutume muntu mu dituku dya ndekeelu edi, eyo, bwa yéyè kwikala cikolokolo bwa lukongo elu. Kadi Ndi nkambila, dituku edi, wêwè cisamba Cyanyi, bààbûngì mbasekeseka dînà

edi. Eyo, mbakome nyima ku bintu bidiye mwambe. Kadi Ndi nkwambila wêwè ne, aba biìkalà mwa kuteeleja Mèyì aa, Nêndokeshè mabeneshà manene pambidi paabo. Mêmè Ndi Nzambi wa Bukole bwônsò. Mêmè ki wâfuta, mu dituku edi, aba biìkalà mwa kwakidila Mèyì aa ne meeji matooke ônsò, mudi Mukalenge wamba.”—Muf.]

. . . mulalakane kule ne Nzambi,  
Mpindyewu ndi mpingana kumbelu;

Sambilaaku, piikalabi ne ukaadiku musamble!

Baalulaku bikole maboko Ebe a dinanga awu,  
Mukalenge, ndi mpingana kumbelu.

Mpingana . . .

<sup>365</sup> Panucidi nutungunuka ne kwimba apu, ndi muswe kunukonkaku cintu kampanda. Kudiku kaaba kampanda mu mwoyi webe amu kadi kamweka bu kafìkisha ne mìdimà kudi mpekaatu anyi? Piikalaku mwòmò, mpindyewu ki dìbà ndyòdì edi dya kukùumusha, mpindyewu mene, piikalabi ne kucidi luse.

<sup>366</sup> Eci, ndi ntekemena ne, kabyena nanku to. Ndi ntekemena ne katwena kaaba aku to. Kadi kabyenaku bimweka bu ne tudi bafwanyine kwikalapu anyi? Wikale muteeleje cyàmbì Nyuma Mwímpè munkaci mwa cisamba aci, paanyima paa mêmè mumane kujikija ne: “Cidi n’Dîyì bwenu *nwènù*.”

<sup>367</sup> Nenku piikalabi ne kadiku, pawikala ne mìdimà kampanda mu nsòmbelu webe, kwènàku muswe bwa kulwa apa ku nyungulukilu wa cyoshelu eku mpindyewu, patucidi tutungunuka ne kwimba apa anyi? Mpindyewu mene, piikalaku dilubakaja kampanda dya meeji, piikalaku katoba kampanda, kwikadi walaadikija bwalu abu to.

<sup>368</sup> Ndi ntekemena ne mutwishiibwe ne kabyena nanku to; kadi ki ciìkalàku, dimwe dya ku matuku adi pansi aa, ne ncifwanyine kwikalala leelu ewu.

Mpindyewu, Mukalenge, ndi mpingana . . .

<sup>369</sup> Ne mupuuya wa mu mimpempe yebe anu mu nyungulukilu webe amu! Badi bateeleja mukaba wa mèyì biìkalapù nanshà mwa kumona cidi munkaci mwa kwenzeka mwab’ewu mpindyewu’s we; nkacya anu bàmbatangana, badila myadi, bafumina myaba yônsò.

<sup>370</sup> Cikeena-kumona aci, cya pâncìvwà mwânà mutekete aci, dìbà adi dyákùmbanyi anyi? Eci ki cikondo cidi bantu baa mmwenekelu wa muzengele, wa dibungama awu . . . iferno mwikale ufukiibwa apa mene pa buloba ebu anyi?

<sup>371</sup> Byoshelu ne tujila, ne byônsò, mbyûle tente patudi twakulangana apa. Pawikala kuyi ne mushindu wa kufika ku nyungulukilu wa cyoshelu anyi mu tujila, nansha penyi munkaci mwa nkama ya bantu eyi, juukila wêwè anu kuulu, pawikala

wamba ne: “Ndi muswe kujuukila kuulu bwa kusambila, anu bwa bantu bamanye,” anyi kutwa binù, cyônsò cyûdì muswe kwenza aci. Kaa, ekelekele! Mpindyewu kamwenaku mushindu wa wêwê kumona muntu kampanda musòmbèle pansi to. Bantu mbiimanyine kuulu myaba yônsò.

<sup>372</sup> Swaii ngämbèku eci nunku ewu: Nzambi kiitabiku, Nzambi kiitabiku bwa cîngämbì eci ciikale mpindyewu to. Swaii ngümvwè eci nunku, muntu ne muntu; Nzambi kiitabiku to. Kudi... Ndi ne bânà badi kabayi banji kubwela to. Ndi ne bânà baa bakaji babidi ne wa balume umwe. Ndi ne bânà beetu baa balume. Ndi ne baa kwetu badi kabayi banji kubwela to. Nzambi kiitabiku ne ngâsà ikale ukaadi mutushiye nansha; bwa ne byônsò ebi kabiikadi anu didicinkila cyanaana.

<sup>373</sup> Kucidi kushaadileku ndambu wa ngâsà anyi’s, Mukalenge? Biikaleku ne ndi mutupakane pa bwalu ebu, Mukalenge. Ciikaleku ditupakana bwa ne mmpidyewu. Bwa ne mêmè, kabiikadiku ne mmwômò to, biikaleku ne bantu bacidi anu mwa kusungidiibwa. Enzaku nanku, Mukalenge. Ndi ndomba, ne ndambula bateeleji aba kûdì Wêwê mpindyewu, mu Dînà dya Yesu Kilisto.

<sup>374</sup> Muntu ne muntu asambile mpindyewu, anu bu... Äpu ne bidi nanku? Mpindyewu, ncyêna mumanye ne bidi nanku to, kadi äpu ne bidi nanku? Sambila mu mushindu webe wêwê. Sambila anu mushindu wûdì wêwê muswe kusambila awu. Kadi bu ne civwa bulelala, citudi bafwanyine kwenza ncinyi, balunda baanyi? Citudi bafwanyine kwenza ncinyi? Neinyi, ncinyi cîlkalà mwa kwenzeka? Mpindyewu sambilaayi, nwénù bônsò. Ela wêwê anu—anu mbila, sambila wêwê anu mu mushindu wûdì muswe kusambila awu. Ela wêwê anu mbila uididila Nzambi, mu mushindu webe wêwê. Éyi Nzambi wa yaaya!

...maboko Ebe a dinanga awu,  
Éyi Mukalenge, ndi mpingana kumbelu.

<sup>375</sup> “Mukalenge, mvwa ne meeji a kucyenza kukaadi ntanta mule. Ndi mwindile ntanta mupitepite bule anyi’s, Mukalenge? Eci, kwamanyi kujika anyi? Éyi Nzambi, baalulaku maboko Ebe a dinanga awu ungaakidile. Cintu kampanda munda mwa mwoyi wanyi nyewu cikusengeleela bwa kucipeta, Mukalenge. Baalulaku maboku kabidi musangu ewu. Piikalabi ne dînà dyanyi divwa mu Mukanda wa Mwânà wa mukooko, akulaku naanyi mpindyewu, Mukalenge. Enzaku ne ncyâkidilè mpindyewu mene. Swaku wënzèku nanku, Nzambi.”

Mpingana kumbelu, mpingana kumbelu,  
Kaa, kashidi (Kashidi kaanyi, Mukalenge.)  
bwa kubenga kulalakana kabidi;  
Baalulaku bikole maboko Ebe a dinanga awu,  
Éyi Mukalenge, ndi mpingana...

<sup>376</sup> Bible mmwambe, paajingululabo Yesu, ne: “Muntu ne muntu neadile mwadi byenze bu ne mmwanende wa balume umwepele mulela udibo bashipe.”

Mpingana kumbelu,

<sup>377</sup> Nwêñù badi pambelu, nwêñù badi mu mashinyi enu a tudyendelandela, ku bisanji, nwêñù badi biimane mu nyungulukilu wa citanda, bààbûngì beenu, eyemejila anu mutu webe ku nzubu aku, wâmbè ne: “Mukalenge, ikalaku ne luse kündì.”

Baalula . . .

Ikalaayi ne meeji matooke a nwamba kufwa, balunda baanyi! Anji elaayi meeji ne ncikondo kaayi citudi ne mwoyi eci! Tukaadi penyi?

. . . dinanga

Mukalenge, ndi mpingana mpindyewu kumbelu.

Mpingana kumbelu, . . .

<sup>378</sup> Mukalenge Yesu, ngënji mwanyi paanyi mwônsò mûndì mumanye mwa kwenza. Ngënji cyônsò cîndi paanyi mumanye mwa kwenza. Enzaku, Mukalenge, biikaleku ne biibi bya luse bicidi anu byunzulula. Mu nkama ne nkama eyi, nkama yetu ya bushuwa badi bakukeba Wêwè pa dîbà edi aba, umushaku ditoba dyônsò dya mpekaatu, Mukalenge, ne ubabweje leelu ewu.

<sup>379</sup> Ndi—ndi mbaakwila, ne mwoyi wanyi wônsò, patudi tumona ne kî ng'anu muntu kampanda wakula to, kadi, mMufundu Wôwò mwine mwikale utufikisha ku dîbà edi. Ne cikeena-kumona aci, cya pâncivwà mwânà mutekete aci, mmona bantu abu mu ngiikadilu awu; nenku mpindyewu, ngeela meeji ne, iferno awu yêyè mwine, luse lukaadi lumane kuumushiibwa pa buloba, ne patudi twakulangana apa iferno yêyè mwine ki ukaadi mwaba ewu, ne bantu biine, Mukalenge, bakaadi mu ngiikadilu wa ukwacisha bwôwà.

<sup>380</sup> Éyì Nzambi wa Bukole bwônsò, pa Ekeleeziya Musungula ewu, nyewu ndomba, Nzambi, bwa Wêwè kupongolola mabeneshá Ebe, bwa kupetabo mu—mudimu wa bwambi wa bujaadiki, wà bwena ùvvà naawu Lota, wà bwena ùvvà naawu Noa, wà bwena ùvvà naawu Yesu, bwa badi bajimine Cyendeleele, piikalabi ne wôwò awu ûdikù; bwa bôbô biine batwibwe citampi mu Bukalenge bwa Nzambi, kadi biikale bafidila Yesu Kilisto bujaadiki ne udi umwèumwè awu makeelela, leelu, too ne kashidi. Enzaku nanku, Mukalenge. Swaku witabuuje dilomba dyetu, patudi tulomba mu Dînà dya Yesu apa.

<sup>381</sup> Sambila anu mushindu wûdì muswe kusambilà awu mpindyewu. Kwikadi ulwijakaja to. Kwikadi ulwijakaja to. Kadi

amba tûng ne wêwè ki mwena dîna dya ndekeelu didi ne cya kufundiibwa mu Mukanda?

. . . mpingana kumbelu.

Mpingana kumbelu, mpingana kumbelu,

<sup>382</sup> Mwaneetu Neville, bânda uye kabasambidila. Mpaasata nyawu ukaadi ulwa kusambilâ neenu panudi nusambilâ apu. Mêmè nêngìikalè ngimba musambu.

Baalulaku bikole maboko Ebe a dinanga awu,  
Mukalenge, ndi mpingana kumbelu.

Mpingana kumbelu, mpingana kumbelu,  
Bwa kubenga kulalakana kabidi kashidi;  
(Eyowa's, Mukalenge.)

Baalulaku bikole maboko Ebe a dinanga awu,  
Mukalenge, ndi mpingana kumbelu.

Mpingana kumbelu, mpingana kumbelu,  
Bwa kubenga kulalakana kabidi kashidi;  
Baalulaku bikole maboko Ebe a dinanga awu,  
Mukalenge, ndi mpingana kumbelu.

<sup>383</sup> [Mwaneetu Neville udi utungunuka ne kusambilâ. "Nenku swaku bwa muntu ne muntu, Mukalenge, ikale musankishiibwe, mu dituku edi ne, Wêwè udi Nzambi wa Bukole bwônsò. Piikalabi ne ki dyalabaja dya luse ndyôdì edi, enzaku bwa lwikale kudi muntu ne muntu, sungasunga."] Enzaku nanku, Mukalenge. ["Bìikalèku nanku mpindyewu, Taatù. Ne ditalala dya Nzambi, ditu misangu yônsô anu dipita cyumvwilu adi, dilwe cyakabidi kudi myoyi yidi munkaci mwa kwindila eyi."] Eyowa's, Mukalenge. ["Eci ciikale dîbâ mene."] Eyowa. ["Tudi twitabuua ne Wêwè wâmanyì kuteelejila mu Dyulu amu."] Nzambi, enzaku nanku. ["Cyônsò cîdî mu cibucilu bwetu twêtù aci, cyôcî cijike, pa dîbâ adi, Mukalenge, tudi tumanya cidi ndekeelu ne ncinyi."] Eyowa's, Mukalenge. ["Kadi, byôbì kabiyi nanku to, Ntemu awu alwe."] Eyowa's, Mukalenge. ["Badi balwe aba, enzaku bwa bapete ditalala mu dituku edi,"] Enzaku nanku, Mukalenge. ["kupicila ku Yesu Kilisto. Ne mu Dînà Dyende mmutudi tulomba emu. Amen."—Muf.]

<sup>384</sup> Mukalenge Yesu, ndi ndombaku bwa Wêwè kusungila Becky ne Sarah ne Joseph, ne bakwabo, kabidi, Mukalenge. Eci kacyenzekediku bânà baanyi to, Mukalenge. Kacyenzekediku bânà beetu ne balunda baanyi to. Enzaku nanku, Mukalenge.

<sup>385</sup> Katwena bamanye to, katwena bamanye to, kadi tudi munkaci mwa kumona cintu kampanda, Mukalenge. Ncimanyinu cya dinyungishangana naaci mpindyewu mene kumpala kwetu anyi? Enzaku nanku's, Mukalenge. Utuseemejeku bônsò pabwîpì Neebe, lukasa, Mukalenge. Tudi baKunange ne tudi Neebe dijinga. Bìikalèku nanku, Taatù, Nyuma Mwîmpè atupeku busambi mu myoyi yetu mpindyewu.

<sup>386</sup> Tudi tulomba bwa ne twamonaku mwa kwikala bantemu Beebe mu dîbà edi, bwalu tudi bamanye ne cyôci eci cidi ne cya kwenzeka. Cyakadyanjila kwambibwa munda mwa bikondo, ne butudi naabu mbwa kukungamangana naaci, bwa ne tudi ku cikondo cya nshiikidilu patudi tumona bimanyinu ebi bimweneka apa. Tudi bamanye, ne bakaadi batwâmbile kukaadi bidimu byâbûngì mpindyewu ne, cintu eci necyenzeke. Mpindyewu nyewu tucimwena anu mu ciibi cyetu mene, ciiji cikole cinene cya bucole cya Nzambi cyendakana mu misèèsù, cikwata badi kabayi batengula cipita naabo. Mwaba udiku kawuyi Mashi ku ciibi awu, mwanjelo wa lufu udi utuutapu; kadi bóbò badi anu batungunuka ne kwikala ne mwoyi, kadi biikale bafwe padibo ne mwoyi apu, kabayi bapete luse, kabayi ne Nzambi, ne kabacyiyiku mwa kusungidiibwa nansha.

<sup>387</sup> Nzambi, mushindu mwine utudi tuKusakidila bwa badi basungidiibwe aba! Mushindu mwine utudi... Ndibenesha bunene kaayipu didi mu myoyi yetu, dya kwikala basanganyiibwe munda mpindyewu, mwinshi mwa Mashi, padi mwanjelo wa ndekeelu awu mwikale upitakana pa buloba, wenda ubakula...

<sup>388</sup> Aba bavva pambelu paa mashi, baakafwa kakuyi luse to. Aci ncivwa nkokelu wa ndekeelu wa Môsà. Wa kumpala, nso—nsongaalume wa citende wakula ne Izaleela; mwibîdi, upweka bwa kuya kabasungila; mwisâtù, civwa mmukenji wa ndekeelu. Bishima bikaavwa byenjiibwe, Môsà ukaavwa mu njila mutangile ku buloba bulaya, ne bapikula. Éyì Nzambi wa yaaya, ikalaku ne luse, nya' ndomba, mu Ðinà dya Yesu.

<sup>389</sup> Mpindyewu ndi musweku kulomba nunku: Wêwè udi munkaci mwa kusambilu awu, wêwè udi muumvwe ne wâpeci luse awu, ne udi (Nzambi) mwikale muumvwe ne ukaadi mu Bukalenge bwa Nzambi awu, mudyûmvwè ne—ne ukaadi mwele lwongo mu mushindu kampanda anyi mushindu kansanga, ne mu Kilisto mmûdì ne diitabuuja dya kwitabuuja ne ukaadi mwena Kilisto, ukaadi mulediibwe cyakabidi ne mumanye ne ukaadi mwena Kilisto, ne kakuyi mpatà to. Ndi njinga bwa nwénù bônsò nujuukile kuulu, nwénù badi baswe ciine aci abu, biikale nwitatuuja ne, luse alu ndwalabajiibwe too ne kunudi mpindyewu, ne nukaadi beena Kilisto, ne biikale—ne biikale nwitatuuja ne—ne Mashi akaadi malaabiibwe ku mwoyi webe, ne—ne—ne nudi bafwidiibwe luse ku mpekaatu ne mpekaatu yônsò.

<sup>390</sup> Eci civwa ncintu cikole be bwa kunwambila nwénù aba. Ndi ne kusakidila kwâbûngì, ne pândì mmona bantu bajuukile myaba yônsò. Ne nwénù, ndi—ndi menemene...

<sup>391</sup> Ncyéna mumanye ne cintu eci ncilelela to, kadi cidi ne cya kwikala mushindu awu, dîngà dituku. Nwamonus, cidi ne cya kufika ku cyôci aci, ne ncifwanyine kwikala

mpindyewu. Nwamonu anyi? Mu mushindu wônsò, baa pa buloba nebatungunuke anu kutungunuka. Bantu nebiikale anu batungunuke ne kulwa ku cyoshelu, nebatungunuke anu ne kwela kwa mbila mikole, kadi kabyakwikalaku ne dikwacisha nansha dikese to. Nwamonu anyi? Kwabo nekwikale kujike, nwamonu's, nekwikale kumane kujika. Kakwakwikalaku luse to nansha lukese. Nwavulukaayi bwalu abu. "Ne ntempelu wakalwa mûle tente ne mishì." "Ewu udi mukoooyike, udi utungunuka ne kwikalala anu mukoooyike; ewu udi mwakane, udi utungunuka ne kwikalala anu mwakane; ne ewu udi wa cijila, udi utungunuka ne kwikalala anu wa cijila." Kakucyena kabidi luse to, padi Mwânà wa mukooko wangata Mukanda; ki cyôcì aci, ki cyônsò ncyôci aci. Kadi mbimweneke bikole menemene anu bu ne mbifwanyine kwikalala mpindyewu.

<sup>392</sup> Pàmwäpa tudi ne dituku dikwabo; pàmwäpa leelu ewu ki dituku adi mene. Pàmwäpa maalaba ki dya ndekeel-... Pàmwäpa dilolo edi ki dilolo dya ndekeelu. Pàmwäpa eci ki cidimu cya ndekeelu. Ncyêna mumanye to, nwénù balunda baanyi. Ki mêmè udi unwambila awu, ncyêna mumanye to. Kabaadyakucingambilaku to.

<sup>393</sup> Kadi pangata Nzambi dînà dya ndekeelu adi ne kudipikula mu Mukanda wa Mwoyi awu, bwa aci budi bumba bujika. Nwamonu's, kakwena mwa kwikalaku ménà makwabo to, nansha bishi. Kakwena mwa kwikalaku makwabo to, nansha bishi. Kwajiki. Kwamanyi kujika.

<sup>394</sup> Mbanganyi badi bamanye ne mbulelela? Eyo. M—mbulelela. Mpindyewu utudi tudyumvwa bulelela ne...

<sup>395</sup> Ne ndi mmona disangisha edi dîndì muyisheyiishe ne mudimwijedimwije edi, bidimu byônsò ebi, ne mumone Mukenji bu ewu wûndì...wûndì muyishe mu mmwenekelu wa kânâkânà ewu. Kadi vulukaayi anu ne, ndi ncyamba mu mushindu wa nwénù kucyumvwa, mmwenekelu wa kânâkânà; bikwabo bintu mbifwanyine anu kununyukulula bônsò kadi kunushiya anu tusunsukila, nwamonu's. Kadi ndi anu mubyümushè cyanaana, mudyümvwè anu bwa kwenza nanku, bwalu ncyêna mutwishiibwe to. Pândì nciyi mutwishiibwe bwa mwaba wûndì ndyata dikàsà, nêndyatè biteketebitekete, nwamonu's, kadi nnwambila anu cyanaana.

<sup>396</sup> Teelejaayi. Kanwena ne disanka anyi? Nkufwanyineku kwikalala cintu kampanda citambe bunene, cyûdì mufwanyine kwelela meeji, cyûdì mwenze mu nsòmbelu webe anyi?

<sup>397</sup> Apu ne kwajiki mpindyewu? Apu ne kwônsò nkujike? "Kaa," mûdì wamba, "Mwaneetu Branham, pàmwäpa's..." Eyo, ndi mumanye. Mbafwanyine kwikalala anu batungunuka. S'bakaadi bacyéñènze, misangu yônsò. Nkaadi mumane kucyumvwija ne mucijaadike ku Mifundu, nwamonu's, baa pa buloba

baakatungunuka anu ne diya, kadi's kukaavwa kumane kujika. Nwamonu anyi?

<sup>398</sup> “Dicimbakana dya diyisha ditu disungila bajimine. Nenku didi ndicimbakana, bwa bantu. Didi lungenyi lwa Nzambi.” Nwamonu anyi? Nzambi udi Nyuma. Ùtu ukwata mudimu mu mishindu ya nyuma, nwamonu's, bwa kwenza maalu Ende a kukema; mishindu ya yikemesha. Kadi, twêtù tudi bantu, tudi ne mikalu. Katwena bamanye to; tutu twêtù tutangila anu bitudi mwa kumona abi. Kadi Cintu kampanda munda mwetu . . .

<sup>399</sup> Pawapatuka mu cibambalu aci mwaba ewu, pawikala kuyiku mwanji kucimona kacya baakulela to, kacya kuyiku mwanji kumona bukènchè bwa dìbà to, udi mufwanyine kumanya ne udi muumuke mu cibambalu eci, mubwele mu bukènchè bwa dìbà anyi mu cintu kampanda. Kuvwa luuya. Uvwa mufwanyine kuluumvwa. Nansha kwòkò kakuyi cyumvwilu kampanda cya mubidi webe bwa kwamba ciine aci to, udi mufwanyine kumanya, kaa, cyumvwilu nansha cimwe cya lumono bwa kubumona. Kakuyi mushindu wa kumona mici ya mâyì a matamba ayi, wa kumona bufuki; bu ne kuvwaku ne lumono to, muntu nansha umwe kayi naalu. Udi mufwanyine kumanya ne udi mufwanyine kwikalà mu bwikadi bwa cintu kampanda; cyumvwilu cyebe cya lulengu ncifwanyine kukwambila cyôcì aci. Udi mufwanyine kumanya cyôcì aci. Bu mêmè mwa kuteeta kukwambila ne: “Ndìbà. Didi difila nsesa. Dyôdì ki didi dileeja binto,” wamonu's, udi mufwanyine kumanya ne dìdikù bwalu udi mwa kuumvwa dyôdì adi ne byumvwilu byebe. Nyaya bushuwa anyi?

<sup>400</sup> Mpindyewu, tudi bamanye ne Kilisto udi mwaba ewu. Wamonu anyi? Pàmwàpa kwêna uMumona ne mêsù ebe to. Wamonu anyi? Pàmwàpa kwêna umona to. Kadi ku cikeena-kumona, mêmè ndi nkawambila ne, Yéyè udi mwaba ewu. Tudi tuumvwa Cyôcì aci. Tudi bamanyè ne kudi Cintu kampanda mwaba ewu cidi byumvwilu byetu kabiyi byamba to. Nyuma ngudi ucyamba ne, Kilisto udi mwaba ewu.

<sup>401</sup> Ndi ngumvwa ne Yéyè mmutupikule. Ndi ngumvwa ne ménà etu adi mu Mukanda Wende. Ndi ngiitabuuja ne tudi bapikudiibwe ku Mashi a Mwânà wa mukooko.

Mêmè ndi mununange, ne ndi mumanye ne nwêñù nudi banangangane.

Kaa, mwonji udi uswikakaja myoyi yetu  
Mu dinanga dya bwena Kilisto ubeneshiibwe;  
Bwobumwe bwa meeji a buuwetu  
Mbufwanangane ne bwa ku Dyulu.

<sup>402</sup> Biwwa bikengela bwa twêtù kwikalà anu tudyumvwa mushindu awu muntu bwa mukwende. Nwamonu's, tudi ne cya, tudi ne cya kwikalà tudyumvwa mushindu awu muntu bwa mukwende. Nwamonu anyi? Bwalu, patudi tunangangana

muntu ne mukwende, tudi tunanga Nzambi. “Udi mwa kukina mwaneenu ûdì mumone, kadi kwamba ne udi munange Nzambi Ûdì kuyi mumone anyi?” Tudi ne cya kunangangana muntu ne mukwende. “Muntu nansha umwe katuku ne dinanga dinene kutamba Yêyè wâkatèèka mwoyi Wende pansi bwa mwena lukuna Wende to, bwa bôbô kushaalabo balunda Bende.” Kaa!

<sup>403</sup> Nutu bamanye musambawu wa ne, *Mwonji Ûdì Ùswikakajanganà Ûbeneshiibwè* anyi? Kî mbilenga bya dikema anyi? Mwonji awu ubeneshiibwe! Udku mufwanyine kutupa cyona cya wôwò awu anyi, mwaneetu wa bakaji, mwaba awu? Anji kulekela cisanji ciikale cimba ndambu.

<sup>404</sup> Àpu nî nkujike? Àpu ne Nkokelu Mwisâtù, udi munkaci mwa kulwa mpindyewu awu, mbwa kuyisha badi bajimine? Àpu ne bifwanyikijilu byônsò nebidileeje mpindyewu? Ne twêtù biikale munda, ne twêtù biikale munda, aci kî ncifwanyine kwikalala cilenga menemene anyi? Bwobumwe kaayipu's we!

Kaa, mwonji udi uswikakaja myoyi yetu  
ubeneshiibwe (Cidì cicyenza ncyôcì eci:)  
Mu dinanga dya bwena Kilisto ubeneshiibwe;  
Bwobumwe bwa meeji a buuwetu  
Mbufwanangane ne bwa . . .

<sup>405</sup> Ciine aci civwa ncinyi? “Bwobumwe bwa meeji a buuwetu.” “Bukalenge Bwebe bulwe. Diswa Dyebe dyenzeke.” Nwamonu anyi?

<sup>406</sup> Twêtù tutu tukeba kuvwija Nzambi bu mwânà wa kwikalala kutumakaja, mwena mudimu wa kutambakaja anyi cintu kampanda ne: “Nzambi, enza *cikampanda*, enza *cikansanga*.”

<sup>407</sup> Yesu wakamba ne: “Nusambilaa yi ne: ‘Bukalenge Bwebe bulwe. Diswa Dyebe dyenzeke pa buloba, bu mudidi dyenzeka mu Dyulu.’” Pa dîbâ adi, Dyulu ndipwekeshiibwe too ne pansi patudi twêtù apu, ne twêtù tudi—tudi babandishiibwe too ne mu Dyulu, ne biikale basòmbe mu myaba ya mu Dyulu mpindyewu mu Kilisto Yesu. Tudi bônsò twitabuuja ne Mukenji awu udi Bulelela, wa ne Yesu Kilisto, Mwânà wa Nzambi, ngudi utupikula.

<sup>408</sup> Tubwitaayi kwîsù mpindyewu biikale beeble byanza muulu, patudi tuwimba apa.

Mwonji udi uswikakaja myoyi yetu  
Mu dinanga dya bwena Kilisto ubeneshiibwe;  
Bwobumwe bwa meeji a buuwetu  
Mbufwanangane ne . . . (Tungunuka anu ne  
kuwimba ku cisanji.)

<sup>409</sup> Mpindyewu, mumwemwe nansha umwe. Edi dîbâ kî ndya kufukisha mimwemwe to. Biikale ne ndondo wa meeji matooke, padi musambu awu wenda wimbiiwba ku cisanji apu, tulabulaayi muntu kampanda udi ku luseke lwetu ku cyanza,

twamba ne: “Nzambi akubeneshe, mwena Kilisto,” ne meeji matooke ônsò.

<sup>410</sup> Nzambi akubeneshe, Mwaneetu Neville. [Mwaneetu Neville udi wamba ne: “Akubeneshe, Mwaneetu Branham.”—Muf.] Ne bidimu makumi ataanu ne citeema. [“Ncyà bushuwa.”] Kule be!

Nzambi akubeneshe, Mwaneetu . . . ? . . .

Mpindyewu twélààyi byanza muulu kudiYe.

Patudi tutapuluka,  
Bidi bitupa kusaama munda;  
Kadi netwikale anu baswikakane mu myoyi,  
Ne biikale tutekemena bwa kusangila kabidi.

<sup>411</sup> Mpindyewu twinyikaayi mitu yetu, ne, cyapamwe, katuyi bamanye cìíkalà matuku acivwawwa mwa kututwadila, pa díbà edi, katuyi bamanye ne nkujike to. Mêmè ncyêna mumanye to. Ncyêna mwa kwamba to. Ncyêna mwa kwamba to. Ncyêna mumanye to. Kadi kumpala kwa maalu atudi babuulule mu dinda emu awu, tusambilaayi disambila ditu Mukalenge mutwâmbile bwa kwikala kusambila adi. Nansha biikale nanku: “Bukalenge Bwebe bulwe. Diswa Dyebe dyènzekè.” TUDisambilaayi cyapamwe:

Taatù wetu udi mu Dyulu, Dînà Dyebe  
Dijidiibwe.

Bukalenge bwebe bulwe. Diswa Dyebe  
dyènzekè pa buloba, bu mudidi dyenzeka  
mu dyulu.

Utupe mu dituku edi dyâmpà dyetu dya ku  
dituku ne ku dituku.

Ne utufwile luse ku matomboka etu, bu  
mutudi tufwila luse aba batu batwenzela  
matomboka.

Ne kutulombolu mu diteeciibwa to, kadi  
utusungile ku bubi; bwalu Bukalenge  
mbwebe Wêwè, ne bukole, ne butumbi,  
kashidi. Amen.

<sup>412</sup> Mpindyewu ne myoyi yetu miinyika. Bible mmwambe ne: “Baakimba musambu, ne baakapatuka.” Vulukaayi ne, paakenzabo cyôci aci mu Mifundu, mbwalu baakapoopela mudimu wa bwambi wa Nkokelu Mwibidì wa Mukalenge wetu pa nkuruse, ne Nkokelu Mwisâtù mwikale pabwipì ne kubwela mu cyalu. Nkwenze anu ndambu wa mèbà paanyima paa cyôci aci, Yéyè wàkabànda mu iferno ne wakayiisha bajimine bavwa babenge luse lwabo abu.

<sup>413</sup> Cyona cya *Ditabuuja Dyànyì Ndítàngile Kûdì*.

Diitabuuja dyanyi—dyanyi nditangile Kûdì,  
 Wêwè Mwânà wa mukooko wa ku Kalvariyo,  
 Musungidi wa kudi Nzambi;  
 Mpindyewu ngumvwileku pândì nsambila apa,  
 Umusha mpekaatu yanyi yônsò,  
 Kundekediku ndal-... anyishaku bwa  
 kuumukila ku leelu ewu  
 Mêmè yônsò ngiikale anu Webe!  
 Pâncidì ngendela mu nyongolo wa mîdimà wa  
 njila mibwelakane wa panwapa apa,  
 Ne padi lutatu lupaasalala lunnyungulukila,  
 Wêwè ikala Mulombodi wanyi;  
 Tumina mîdimà dîyì bwa yandamuke muunya,  
 Kupula kanyinganyinga, ne bwôwà,  
 Éyi anyishaku bwa kuumukila ku leelu ewu  
 Mêmè yônsò ngiikale anu Webe!

<sup>414</sup> Mukalenge anubenesheku, énzèku bwa Mwân'Ende ne ngâsà bikenkeshe pambidi peenu. Ne Mukalenge anupe Mwoyi wa Cyendeleele, ne ikale neenu panu pa buloba ebu, ne mu buloba bwikala mwa kulwa paanyima. Kabidi, Mwoyi wa Cyendeleele, nuMukwacileku mudimu mu mikùngùlù mileemile yônsò ya bikondo biciwwawwa.

<sup>415</sup> Piikalabi ne dîbà edi ki dyôdî mene, ne tukaadi bafike pa kiine kaaba aku, mêmè ncýêna ngumvwa bundu bwa cîndì muyiishe to. Ne piikalabi bikengela bwa muyiishi yônsò imane ne disangisha dyende bwa kulumbulwishiibwaye, bu mûngààkamònà mu cikeena-kumona amu, ndi ne kusakidila bwa Evanjeeliyo wûndì muyiishe, bwalu ng'Evanjeeliyo anu umweumwe awu wâkayiishabò kudi Pôlò ne bakwabo abu.

<sup>416</sup> Ndi ne disanka bwenu nwêñù. Ndi ne disanka dya munudi baakidile Kilisto bu Musungidi wenu. NuMunangaayi, ne nwikalaaayi nusambilà.

<sup>417</sup> Nenku nênnùmònè mu mapingaja emu, bu Mukalenge mwa kwanyisha, pa dîbà mwandamatukete, mu ekeleesiya emu. Nzambi anubeneshe. Nudi mwa kutangalakaayi.



*MISÙÙKÀ YÌDÌ MU BÙLOKÒ MPINDYEWU AYI* LUA63-1110M  
(Souls That Are In Prison Now)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 10 a ngondo wa dikumi ne umwe, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mèyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)